

續名醫西類案

續名醫類案卷三十四

錢塘魏之琇編集

海昌王士雄孟英
定州楊照藜素園 同校

時上丹

此症感四時邪毒之氣，其發於鼻面耳項咽喉赤腫無頭或結核有根寒熱頭痛狀如傷寒此乃時行溼毒之氣發於頭面所謂大頭瘟也以其能作膿出毒故入外科

少宰李蒲汀患時毒用發散之藥耗損元氣患處不消體倦惡寒食少口乾用益氣湯加桔梗及托裡消毒散而愈

秋官陳同野患時毒元氣素弱脈微細而伏此形病俱虛也用參朮芎歸陳皮柴胡升麻炙草以升舉陽氣用牛蒡元

參連翹桔梗以解熱毒二劑腫頓消而脈亦復矣苟以脈微細爲屬陰以腫赤爲屬陽而藥之鮮有不誤者

一婦人時毒潰後腫赤不消食少體倦膿清色白乃脾肺氣虛也先用六君加桔梗芩歸後用益氣湯加桔梗而效春官袁谷虛之妹患時毒表散過度腫硬不痛脈浮大按之而短此真氣絕也辭不治後果歿

一男子患此症腫痛發熱作渴脈實便秘以五利大黃湯下之諸症悉退以葛根牛蒡子湯四劑而痊

一男子患此症表裡俱解腫痛尙不退以葛根升麻湯二劑而腫消

一男子患此症腫痛發寒熱脈浮數以荆防敗毒散二劑少
愈以人參敗毒散二劑勢減半又二劑而痊

一男子患此症耳面赤腫作痛咽乾發熱脈浮數先以荆防
敗毒散二劑勢退大半以葛根牛蒡子湯四劑而痊

一婦人患此症表邪已解腫尙不消診之數脈滑而數乃瘀
血欲作癟也以托裡消毒散潰之而愈

一男子患此症焮腫脹痛作渴煩熱便祕脈數按之尤實用
防風通聖散一劑諸症頓退以荆防敗毒散加元參牛蒡

黃芩二劑而痊

一老人冬月頭面耳項俱腫痛甚便祕脈實此表裡俱實病

也飲防風通聖散不應遂砭患處出黑血仍投前藥卽應
又以荆防敗毒散而瘳蓋前藥不應者毒血凝聚上部經
絡藥力難達故也惡血既去其藥自效或拘用寒遠寒及
年高畏用硝黃而用托裡與夫尋常之劑或不砭泄其毒
專假藥力鮮不危矣徐靈胎曰通聖散乃治表裡俱熱之
方所謂兩解法也須審定內外俱熱
之症乃可消息施用又曰荆防敗毒

散爲時毒主方惟人參不宜輕用

一男子患此症表裡俱解惟腫不消以托裡消毒散四劑膿
成針之而愈

一婦人患此症腫痛用硝黃之劑攻之稍緩翼日復痛診之
外邪已退此瘀血復作膿也用托裡消毒散潰之而愈

一男子頭面腫痛服硝黃敗毒之劑愈甚。診之脈浮數。邪在表。尙未解。用荆防敗毒散二劑。勢退大半。更以葛根牛蒡子湯四劑而痊。內經曰。身半以上腫。天之氣也。身半以下腫。地之氣也。乃邪客心肺之間。上攻頭目而爲腫。此感四時不正之氣爲患。與夫膏梁積熱之症不同。硝黃之劑。非大便祕實不可用。若不審其因。不辨其虛實。表裡概用攻之。必致有悞。常見飢餓之際。芻蕘之人多患之。乃是胃氣有損。邪氣從之爲患。不可不察。常治邪在表者。用葛根牛蒡子湯。人參敗毒散。或普濟消毒飲。子邪在裡者。五利大黃湯。梔子仁湯。表裡俱不解者。防風通聖散。表裡俱解而

腫不退者犀角升麻湯加腫甚者砭患處出惡血以泄其
毒或用通氣散取嚏以泄其毒十日外自愈若嚏出膿血
卽愈欲其作膿者用托裡消毒散欲其收斂者用托裡散
此法最爲穩當五七日咽喉腫閉言語不出頭面不腫食
不知味者不治此乃時行怪毒之氣發於頭面所謂大頭瘟也以其能作膿出毒故入外科

一男子患此症服表散藥愈熾發熱便祕診其脈沈實此邪
在裡也以大黃湯下之裡症悉退以葛根牛蒡子湯浮腫
亦消惟赤腫尙存更以托裡藥潰之而愈齊氏云時毒者
爲四時邪毒之氣而感之於人也其後發于鼻面耳項咽
喉赤腫無頭或結核有根令人增寒發熱頭痛或肢體痛

甚者恍恍不寘咽喉閉塞昧者將謂傷寒便服解藥一二日腫氣增益方悟始求醫原夫此症古無方論世俗通爲丹瘤病家惡言時毒切恐傳染考之于經曰人身忽經變赤狀如塗丹謂之丹毒此風熱惡毒所爲與時毒特不同耳蓋時毒初起狀如傷寒五七日間乃能殺人治者宜精辨之先診其脈滑數浮洪沈緊弦濶皆其候蓋浮數者邪氣在表也沈濶者邪氣深也氣實之人急服化毒丹以攻之熱實不利大黃湯下之其有表症者解毒升麻湯以發之或年高氣軟者五香蓮翹湯主之又於鼻內噙通氣散取十餘嚏左右看病之人每日用噙藥嚏之則不傳染

其病人每日亦用嚏藥三五次以泄熱毒此治時毒之良法也經三四日不解者不可大下猶宜和解之服犀角連翹散之類至七八日大小便不通利頭面腫起高赤者可服托裡散黃芪散宜鑲砭割出血泄其毒氣十日外不治自愈也此病若五日以前精神昏亂咽喉閉塞語聲不出頭不腫食不知味者必死治之無功矣然而此疾有陰有陽有可汗有可下常見粗工但云熱毒就用寒涼殊不知病有微甚治有逆從不可不審也

徐考功年逾三十耳面焮腫寒熱拘急脈浮洪此時毒症也邪在表以荆防敗毒散加牛蒡元參治之漸愈更以升麻

葛根連翹桔梗。川芎銀花牛蒡而平復。

疔

羅謙甫云丙午歲予居藁城人多患疔瘡縣尹董公謂予曰今歲患疔瘡者極多貧民無力醫治近於史侯處得數方用之者無不效官給藥錢君當捨手治之遂諾其語董公膀示通衢命予施藥如此一年全活甚衆其用保生錠一千金托裡散神聖膏藥破棺丹凡四方保生錠金脚信二錢雄黃三錢輕粉二錢礀砂三錢麝香一錢半巴豆四十九粒蟾酥一錢爲細末用黃蠟五錢溶開將藥和成錠子

原书缺页

原书缺页

以泄其外。托裡散以補其內。八味丸以回其陽。則治之失宣。必致不救。慎之慎之。

長洲庠蘇子忠鼻梁患疔症屬表邪。但氣血俱虛。不勝發散。遂以補中益氣爲主。佐以防風白芷而愈。

張所望治理安寺一僧。患水疔走黃。絕水穀者已三日。衆莫能治。延所望入視曰。毒已入內。奈何。須下一針方可。因向

瘡頂刺入寸餘。始聞痛聲。曰生矣。隨以膏塗之。復投丹藥。

數粒拔其疔根寸許。堅黑如鐵。遂愈。

錢塘縣志

立齋治一男子足患疔。作痒惡心。嘔吐時發。昏亂脈浮。數明灸二十餘壯。始痛。以奪命丹一服。腫起。更以荆防敗毒散。

而愈

一男子患疔發熱煩躁脈實以清涼飲下之而愈。
一男子胸患疔遍身麻本脈數而實急針出惡血更明灸數壯始痛服防風通聖散得利而愈。

一男子左手背患疔是日一臂麻木次日半體皆然神思昏濁遂明灸至二十餘壯尚不知痛又三十餘壯始不麻至百壯始痛以奪命丹一服腫始起更用神異膏及荆防散敗毒散而愈。

一老婦足大指患疔甚痛令灸之彼不從專服敗毒藥致真氣虛而邪氣愈實竟至不救蓋敗毒散雖能表散瘡毒然

而感有表裡所發。有輕重體段。有上下所稟。有虛實。豈可一概而用之耶。且至陰之下。藥力之所難到。耑假藥力。則緩不及事。不若炙之爲良。故下部患瘡。皆宜隔蒜炙之。痛則炙。至不痛。不痛則炙。至痛。若炙之而不痛者。宜明炙之。及針疔四畔去惡血。以奪命丹一粒入瘡頭孔內。仍以膏藥貼之。若針之不痛。或無血者。以針燒赤。頻烙患處。以痛爲度。或不痛。眼黑如見火光者。此毒氣入臟腑也。不治。若患在手足。紅絲攻心腹者。就于絲盡處刺去惡血。宜服荆防敗毒散。若絲近心腹者。宜挑破瘡頭去惡水。亦以膏藥貼之。如麻木者。服奪命丹。如牙關緊急。或喉內患者。並宜。

噙一二丸。凡人暴死多是疗毒用鑑照看遍身若有小瘡
卽是宜急炙之俟醒更服敗毒藥或奪命丹人汗入肉食
之則生疔瘡不可不慎。

劉禹錫纂柳州救三死方云元和十一年得疔瘡凡十四日
益篤善藥傳之皆莫知長樂賈方伯教用蟻螂肉一夕而
百苦皆已明年正月食羊肉又大作再用亦如神效其法
一味貼瘡半日許可再易血盡根出遂愈蟻螂心腹下度
取之其肉稍白是也所以云食羊肉又大作者蓋蟻螂食
羊肉故耳用時便禁食羊肉其法蓋出葛洪肘後方也本草
韓光治疗腫人也正觀初衛州徐使君訪得此方用艾蒿一

擔燒作灰入竹筒中淋取汁一二合和石灰如麵漿以針

刺瘡中至痛卽點之點三遍其根自拔亦太神驗正觀中

用治三十餘人得差故錄之

千金方

綱目公日疔瘡全看部位如部位不佳者

甚爲難治觀其毒將走之症用針破其四圍插入拔

疔之藥其浮腫處用針刺之出其惡血此法甚妙

繆仲淳治顧博士伯欽內人左耳患疔時方孕令先以白藥

子末雞子清調塗腹上護胎次以夏枯草甘菊貝母忍冬

地丁之屬大劑飲之一服痛止疔立拔胎亦無恙白藥子

療馬病者

廣筆記

馬銘鞠治顧聖符幼弟患疔醫者先用火針圍腫腫脹至

目與鼻俱隱入肉牙關緊急用患者耳垢齒垢刮手指甲

屑和勻如豆大放茶匙內鐙火上炙少許取作丸令洗淨
園藥將銀簪挑開疔頭抹入外用棉紙一層津濕覆之痛
立止半日腫半消目可開次日服仙方活命飲二劑愈此
法兼可治紅絲疔長洲華承溪指節間患之得此而痊又
云可治面白疔未試也此方傳自道人

廣筆記

廣筆記云用陳年露天鐵鏽研如飛麵將金簪脚挑破毒處
一孔納鐵鏽末于內仍將皮蓋好少頃黑水流盡中有白
絲如細綫慢慢抽盡此疔根也盡卽立愈又方用甘菊花
并根葉搗汁以酒下之立消

二方俱神效
驗

立齋治劉貫卿脚面生疔形雖如粟其毒甚大宜峻利之藥

攻之。因其怯弱。以隔蒜灸五十餘壯。痒遂止。再灸片時。乃知痛。更用膏藥封貼。再以人參敗毒散。一服漸愈。夫至陰之下道遠位僻。且怯弱之人。用峻利之藥。則藥力未到。胃氣先傷。虛脫之禍。有所不免。不如灸之爲宜。

松江諸大尹唇生一疔。已五日腫硬。脈數煩躁喜冷。此胃經積熱所致。先以涼膈散一服。熱去五六。更與奪命丹二粒。腫退一二三。再與荆防敗毒散四劑而愈。

楊錦衣唇下生疔。脈症俱實而不下。反用托裡。致口鼻流膿而死。是謂實實之禍。

馬氏室忽惡寒作嘔。肩臂麻木。手心騷痒。遂脅悶不自知其

故與卒然暴
厥者不同。但手有一泡，此乃疔疔毒也。令急灸患處至

五十餘壯，知痛投以荆防敗毒散而愈。古人謂暴死多是疔毒，急用燈照遍身。若有小瘡，即是此毒，宜急灸其瘡。但是胸腹溫者可灸。先君云：有人因剝死牛脅悶，令看遍身俱有紫泡，便急灸泡處，良久遂甦，更以敗毒藥而愈。

張都憲夫人面生疔腫，焮痛甚，數日不潰，服症俱實，以荆防敗毒散加芩連治之，稍愈。彼以爲緩，乃服托裡一劑。其勢愈甚，痛極始悟，再用涼膈散二劑，痛減腫潰。又與連翹消毒散十餘劑而愈。

鄭氏舉家生疔，在四肢，皆由食死牛肉所致。刺去黑血，更以

紫金丹服之悉愈。

王檢討汝和感痘毒，面生疔十餘枚，腫疾脈數以荆防敗毒散治之，雖小愈，尚可畏，更以奪命丹一服而痊。

陸宣子，山東名醫也。言京師李公子某，指甲中生肉管赤色，頃刻長三尺餘，垂至地能動，動則血昧欲死。諸醫束手。公子乃取酒痛飲，引刀自斷之，出血數斗，良久復生如初，自分死矣。有乞兒自言能治，召之肩大蛇至，顧罵諸醫者曰：公子蛇頭疔也。其管通四肢百骸，絕則又出。若輩何能爲。蓋乞兒初饒于財，嘗患此破家求醫，不可得。遇一丐，命其妻納大蛇袴中，穴袴出蛇首握之，與肉管相向，蛇以氣吸

之不移時而消蛇則紅絲百道僵死矣及如其法治之公
子亦愈竟分其產之半與乞兒云。蔣湘帆

治疔瘡方松香二十兩白蠟二兩乳香二兩去油研細黃蠟
十兩銅綠五兩研細麻油六兩沒藥三兩去油研細百草
霜五兩須山莊人家淨燒草者佳先將麻油煎滾次下松
香三下白蠟四下黃蠟五下乳香六下沒藥七下銅綠八
下百草霜。滾過數次或傾磚地或卽在鍋內冷透搓成條
子用時以圓眼核大丸呵軟捏扁貼患處是疔卽粘否則
不粘如粘片時即可止痛次日消腫少出黃水卽愈忌蓋
腥生冷辛竦每丸約重四分

又方白菊花四兩。甘草四錢。水煎服。不過二劑卽消。一切
消疔之藥。皆不及此。蓋菊花全身皆治。疗之聖藥也。

疣癰

周漢卿治山陰楊翁項有疣如瓜大。醉仆階下。潰血不能止。
疣潰者必死。漢卿以藥塗其穴。血卽止。明史

薛立齋治長洲庠王天爵辛丑春左腿近環跳穴患瘤狀如
大桃。按之濡軟。恪服除溼流氣化痰之劑。惡寒發熱食少。
體倦形氣俱虛。脈洪大而虛。氣瘤也。肺主之。蓋肝屬木。肺
屬金。然發于胆經部分。乃肺金侮肝木。元氣虧損。而其體

已內潰矣。遂用十全大補湯數劑。出清白稀膿甚多。頓加
寒熱煩渴頭痛。殊類傷寒狀。此因膿泄而血氣益虛。仍用
前藥。其勢益甚。脈洪數大。按之如無。乃加附子一錢。其勢
愈甚。而脈復如前。此虛甚而藥不能及也。更加附子二錢。
三劑諸症頓退。乃朝用補中益氣湯。夕用十全大補湯。各
三十餘劑。出腐骨五塊。瘡口將完。後因不慎起居。患處復
潰。諸症更發。咽間如焚。口舌無皮。用十全大補加附子一
錢服之。諸症卽愈。二日不服。內病悉至。患處復潰。一年後
又患服前藥不應。診其尺脈微細如絲。此屬命門火衰。用
八味丸爲主佐。以十全大補湯稍愈。至乙巳仍患虛寒之

症而歿

一男子左腿外側近脣腫一塊。上有赤縷。三年矣。飲食起居如常。觸破涌出血膿。發熱惡寒。此胆經受症。故發于腿外側。診其脈。左尺洪數。左關弦洪。此腎水不能生肝木。用補中益氣湯。六味地黃丸而痊。

一老嫗右腋下生一瘤。漸長至尺許。其狀如長瓠子。久而潰爛。一方土以長柄鮮葫蘆燒存性研末。搽之水出消盡而愈。

繫瘤法。芫花淨洗帶溼。不得犯鐵器。於木石器中搗取汁。用線一條。浸半日或一宿。以綫繫瘤。經宿即落。如未落再換。

線。不過兩次自落。後以龍骨并訶子末傅瘡口即合。依上法繫嫋痔累用得效。繫瘤法蘇沈良方有用蜘蛛絲者。然費力不如此徑捷。如無根只用花泡濃水浸綬亦得。趙氏家姊嘗用繫腰間一瘤。不半日即落。亦不痛。百乙方

琇按。芫花用之繫瘤即落。雄猛可知。蟲門中孫文垣嘗用三分。以治某氏婦。立下其癥。苟非實積。未可輕試。孫真人治癰一二年者。以萬州黃藥子半斤。須繫貫者。若虛而輕。卽他處產者。用一斤。取無灰酒一斗。浸回膀器口。以糠火燒一伏時。停待酒冷。卻開令患者日飲之。不令酒氣絕。經三五日後。以綫圍頸。覺消。卽停飲。否則合項細也。用

火時不可多。惟燒酒氣出瓶頭，有津即止火，不待經宿也。
已驗如神。忌毒食。

黃履素曰：予年三十時，臀生一小瘤，根細如線而頭如豆大，越十年漸大如荔，有妨跨馬。予有鑒于決瘤之說，不敢醫，常歎曰：吾年若六七十，此瘤當如碗大，必妨行坐矣，奈何？既而歎曰：七十卽碍行坐，亦何妨？遂安意養之。及四十七歲時，偶察傷瘤皮水滲出不止，懼其成漏，乃延潘惠峯問之，云欲去此瘤甚易，欲塞此漏甚難。瘤去則漏自塞矣。不得已聽其治，潘以藥塗瘤甚痛，其肉盡黑，少頃血出津津，子甚懼且悔，不復求治，但求止血之藥，越宿則黑肉已堅。

如石片數日脫去其根尙存如豆水出仍不止復商之潘
潘曰不去其根漏仍不可塞也又以前藥點之痛甚肉黑
如初次日復點凡三次內復托裡散每劑用黃芪五錢凡
旬日堅肉脫去則根已平仍服托藥散外用長肌收口藥
絕慾色勞以漸收滿肌乃完好予之服藥勤守戒慎者而
潘君亦可謂妙手矣

張子和在西華衆人皆訕以爲吐瀉一日魏壽之與張入食
肆中見一夫病一瘤正當目之上綱肉皆色如灰李下垂
覆目之睛不能視物乃謂壽之曰吾不待食熟立取此瘤
魏未之信也語其人其人曰人皆不敢割曰吾非用多割

別有一術焉。其人從之乃引入一小室中。令俛卧一牀。以繩束其脅。刺乳中大出血。先令以手揉其目瘤上。亦刺出雀糞立平。壽之大驚。張曰。人之有技可盡窺乎。

一女子未嫁年十八。兩手背皆有瘤。一類雞距。一類角丸。腕不能馴。向明望之。如桃膠然。夫家欲棄之。張見之曰。在手背爲膠瘤。在面者爲粉瘤。此膠瘤也。以銚針十字刺破。按出黃膠三兩匙。立平。更不再作。非素明者不敢用此法。

一婦人年四十餘有癰。三辨。張令以鹹吐之。三涌三汗。三下癰已半消。次服化癰之藥。遂大消去。夫病在上。皆宜吐。亦自有消息之法耳。

張景岳三旬外忽脣下肛門前骨際皮裡生一小粒初如粟豆許不以爲意及半年大如黃豆又一年如棗核復如栗矣乘馬坐榻皆有所碍且漸痛料此非敷藥可散又非煎藥可及若漸長大如升如斗懸挂腰股間行動不便將奈何謀之識者皆云不可割刺恐爲害初亦不敢然熟思此時乘小不取則日久愈大愈難矣遂決意去之乃飲酒承醉以柳葉針刺之所出如豆腐白皮之類蓋粉瘤也刺後頓消兩日後則腫如熟癰以會通膏貼三日膿潰而愈不兩日又腫起更熱更大始悔其刺之誤再以會通膏貼之又三日而大潰潰出一囊如魚脬者然後收口全愈使治

之再遲，則難瘳矣。蓼按徐靈胎云：凡形體有形之症最宜外治。此語極爲有見。余鄉一人項生瘤大如拳，已十餘年。一日忽消去，問之，則曰：近得一膏藥貼之，故遂愈。急索其方，視之不過半夏貝母花粉陳皮芥子當歸川芎紅花降香桂枝山甲薑活防風麻黃大黃等藥，大意消痰活血通經絡，並無奇特。然用之輒應手取效。後用之以貼流注，亦卽消散可見。藥不在奇，對症卽能取效。景岳以瘤爲非敷藥可散，亦未明此理耳。

一人眼皮下弦生一小瘤，初如米粒，漸大如豆。外科用攢針三四枚，翻轉眼皮，刺其內膜，少少出血。如此二三次，其瘤日縮，竟得盡消。

一人臂上生一瘤，漸大如龍眼。其人用小艾於瘤上灸七壯，竟爾漸消。亦善法也。或用隔蒜炙之，亦無不可。

一人腹上生一瘤，大如胡桃。治者以蛛絲撚成粗線，扎其根。

數日其絲漸緊瘤根漸細屢易屢細不十日竟脫落誠奇
法也可見他幾日鬆唯蛛絲日緊物理之妙有當知者如
此然纏之亦宜早若形勢既大恐不宜也

方出焦氏筆乘
舊案已載其畧

沈樞文幼齒指甲及長不能自禁此肝火血躁也又頸側常
生小疣子屢散屢發又臂生一塊如菜豆大若觸碎則如
斷束縷扯之則長縱之則縮後兩鬚發白點求治曰子素
肝病此部亦屬肝胆經也夫爪爲筋之餘但行人身之側
正與瞤爪生疣等症相應須滋補腎水以生肝胆則諸症
自愈與六味地黃丸服之一年白點自退瘤亦不生

一男子小腹中一塊不時攻痛或用行氣化痰等藥不應猶

以爲血鱉，服行氣逐血之劑。後手背結一疣子，漸長寸許，形如鱉狀。肢體間如豆大者甚多。彼疑鱉生子，今發于外，亦用行血虛症悉至。左尺洪數，關脈洪數而弦，謂腎水不能生肝木，以致肝火血燥而筋攣。用六味丸滋水，左肝三月而愈。

陶氏佃民有病瘻者，嘗與陶僕輸穀如市道，遠勞極。瘻攖其頸氣幾不接。陶僕素愚，忽遽間削竹爲銳鋩刺之。瘻穿氣溢，頸復完復。荷擔而起，一無所苦。說 雄按可謂其頤愚不可及也

予兄奇峯生兩瘤，大如拳。僧傳一方，用竹刺將瘤頂上稍稍撥開油皮，勿令見血。細研銅綠少許，放于撥開處，以膏藥

貼之數日即潰出粉而愈。續金陵瑣事

錢國賓治山西神池百長張姪女年十七自八歲左手背生
瘤日大已如鐘許看係粉瘤可治與方用巴豆草麻子
肉各四兩大杏仁二兩香油一斤二兩血丹八兩熬膏藥
貼之一日一換其皮漸厚旬日皮紅半月皮破出膿碗許

瘤消日平

辛酉夏廣陵各鹽場大行時疫人多溼熱病若傷寒頭疼發
熱不惡寒身體痛舌紅昏睡不食思涼飲肌黃大便結小
便紅醫用發散清涼劑罔效錢亦臨症治復不投病勢數
日如故前後胸背漸長數十瘤如核桃大其皮甚薄以針

挑破每瘤出風數于遍孤四處。人人寒禁。莫敢近視。瘤破風出調服。後人倣此俱愈。

氣頸之症。乃人項下墜如長瘤也。山東多有此症。雖風水所致。亦臥熱炕過食辛辣而然。他方間有此根由足厥陰肝經之脈。循喉嚨之後。上入頤頷。屬肝。統于足陽明胃經。此蓋起于肝胃二經。瘤長挂下。雖非致命大不美觀。古今並無治法。錢訪海上仙方。遇異人傳授。用青皮六錢疏肝桔梗六錢引導。木鑊頭一名鬼鑊頭。煅存性一兩消癰散肝。胃二經結氣。共末酒下一錢。凡氣頸小者。三四月消。大者七八月或一年消。其功雖緩。其方百發百中。卽錢已治蘭。

溪王元直兗州趙瑚璉二人矣。不惜良方。普利後世。

會溪黃元亮文士也。年五旬。頸生氣瘤。候其六脈衝旺。榮衛俱足。精神元氣亦厚。止肝部沉滯氣結成瘤。錢告之曰。公無病人也。氣瘤結于頸下。不過不美觀耳。然無大害。書云。凡粉瘤。痰瘤。蠱瘤。石瘤。腿瘤。虱瘤。發疽瘤可治。凡氣瘤。筋瘤。肉瘤。肩瘤。癰瘤。血瘤。助瘤。乳瘤。肘臂瘤不可治。治之破膜泄氣。不救。宜絕此念。勿信庸愚。以輕性命也。黃拜謝而去。

結核

王洪緒治一婦項上痰核三處年久生管以拔管藥插入日易半月愈其二惟一管漸淺不意其夫遠歸兩日管深如前後其母接女歸治之卽愈。

一壯年臂上有二管王問其有暗疾否曰素患夢遺乃以六味去澤瀉增綫膠龍骨芡實蓮鬚爲丸鹿含草煎湯早晚送下三錢服半料愈愈後卽用拔管藥仍服前丸二管皆愈。

一人耳下患惡核被醫穿生管以陽和湯小金丹輪服未潰者全消復求消管王曰消管甚易管消卽斂倘將斂時一經走洩管卽復生矣喜其謹疾遂愈消管方皂角刺尖五

錢柘樹膜五錢。紅腹金錢鱉三錢。榆樹皮一錢。真蟾酥一
錢研極細。每遇漏管。先以豬鬃探通。料其淺深。然後以棉
紙捲藥爲條塞入。日易日塞。至愈乃止。

薛立齋治一婦人經事不調。肢體結核如棟如豆。不計其數。
隱于肉裡。其色不變。三年餘矣。大按則痛。或投以降火消
毒。乃不按自痛。發熱作渴。日晡益甚。經水過期。左關脈數。
此肝火血躁也。用清肝益榮湯六十餘劑。諸症已愈。惟項
核未消。又以當歸龍薈丸散服。及八珍湯加柴胡山梔三十
十餘劑而痊。

一婦人久鬱怒。胸脇內股外廉各結核。寒熱往來。經候不調。

胸膈不利飲食少思大便不調左關弦洪右寸弦數右關
弦緊曰左關弦洪肝經熱也左寸弦數本生火也右關弦
緊肝克脾也右寸弦浮木侮金也法當生肝血遂用加味
四物湯而諸症退用加味道遙散而經候調用加味歸脾
湯而全愈。

一婦人因怒肢體結核睡中發搐左關弦洪此肝火血燥筋
攣當清肝火養元氣逐用加味小柴胡湯加味道遙散漸
愈又用八珍湯加丹皮柴胡山梔鈎藤而愈。

一婦人肢體結核胸腹痞悶氣泄稍寬此肝脾鬱滯不信服
降火行氣化痰病愈甚而氣愈虛用加味道遙加味歸脾

二藥間服半載而痊。

一婦人項間結核不時寒熱。左目緊小頭項振掉四肢抽搐。此肝火血虛風熱也。用加味道遙加鈎藤數劑諸症漸愈。又用八珍湯調理而痊。

一婦人耳內耳後項側結核作痛。寒熱口苦月經不調。此肝膽經火而傷脾胃也。用四君柴胡丹皮及六味丸而愈。一婦人因怒結核經行不止。發熱晝安靜而夜譖語。此血分有熱用小柴胡加生地頓安其核尙在。經來先期。肝脈弦數。此肝火血涸而筋攀也。用加味道遙加生地月經如期而核消。

一婦人項臂結核頭疼寒熱乳內時疼兩脇焮痛此肝脾鬱火而血燥先以加味道遙散再用加味歸脾湯而愈。

一婦人素鬱怒患結核內熱晡熱久而不愈若面色痿黃則月經過期而少若面色赤則月經先期而多曰面黃過期脾經虛弱也面赤先期脾虛火動也朝用補中益氣升舉脾土以益氣血夕用加味道遙滋養肝血以息陰火復以歸脾湯解鬱結半載元氣復而痊又有患前症因脾虛下陷而發熱乃專治其瘡變療而歿。

一女子耳下結核焮痛寒熱此屬肝經風熱用枝子清肝飲一劑諸症悉愈後因怒耳後井額兩角作痛寒熱此兼少

陽經症。仍以前藥加羌活二劑而瘥。

一婦人項患五核時常寒熱。肝肺弦長。而出寸口。此血盛無
耦之症也。用小柴胡湯加生地烏梅治之而愈。雄按陰虛者每見此

脈治宜壯水小柴加梅
地不過用法之一格耳

施二守項右患一核用涼藥貼頸皆腫。又敷之腫連胸脇冷
應腹內。不悟涼藥所致。尙以爲毒盛形體困憊。自分不起。
見其敷藥處熱氣如霧急令去藥。良久瘡色變赤。刺出膿
血。用托裡藥而愈。

舉人江節夫兩耳下兩臂兩肋結核。咯服祛痰降火軟堅之
劑益甚。薛曰。此胆經血虛火燥也。蓋胆經行人身之側。前

藥必致虧損。至明年七月復請視。各核皆潰脈浮大而澁時金旺于秋木受金克。必不治果卒。

周上舍兩耳下項間筋牽壅腫堅硬。咳嗽氣喘內熱益汗所服皆化痰散堅行氣之劑。勢益甚。診之左關弦溢左尺洪數。此怒氣傷肝。房勞損腎。須滋腎水生肝血。慎調攝。至水旺之際庶可愈矣。彼欲速效。乃外敷商陸石灰等藥內服海藻蓬朮之類。至秋金旺之際元氣愈虛。腫甚而歿。

一上舍素豪善怒。耳下結一核。後潰而瘡口翻張如菌。焮連頭痛或胸脇作脹。或內作寒熱。或用清熱消毒之藥。年餘未瘥。用補中益氣湯六味地黃丸而尋愈。瘡口翻出亦名翻花瘡

邵黃門子手合骨處患一核，半年後潰一小孔，如粟，又年餘不合。日出清膿數滴，或止三四滴，面上赤脈數口，乾夜則發熱，晝則惡寒，行履如故。此氣血俱虛也。辭不治，月餘後他處相會，彼云小兒有不藥之功矣。辭曰：過火令方為善也。已而果癒。

繆仲淳治一女子，頰下發一硬塊而不痛，有似石癰，用貞母首烏各三錢，連翹白芨花粉各二錢，牛蒡蒼耳清水香各一錢半，銀花鮮菊地丁各五錢，先用夏枯草五兩，河水五碗煎三碗去渣，納前藥煎至一碗，服十劑全消。外敷方，南星三兩，海藻昆布，枳榔，羌黃，白芷牙皂一兩，未醋調。

藻昆布，枳榔，羌黃，白芷牙皂一兩，未醋調。

薛立齋治一男子神勞多怒頸腫一塊久而不消諸藥不應
以八珍湯加柴胡香附每日更隔蒜灸數壯及日飲遠志
酒三盞而漸消

瘰 瘤

薛立齋治一男子患瘰瘤腫痛發熱大便秘結以射干連翹
散服六帖熱退大半以仙方活命飲四帖而消

一男子患此症腫硬不作膿脈弦而數以小柴胡湯兼神效
瓜蔞散各數劑及隔蒜灸數次月餘而消

一婦人頸腫不消與神效瓜蔞散六劑少退更以小柴胡湯

加青皮枳殼貝母數劑消大半。再以四物對小柴胡數劑而平。

一男子因怒項下結核腫痛痞悶兼發熱用方脈流氣二帖胸膈利以荆防敗毒散二帖而熱退肝脈尚弦濇以小柴胡加芎歸白芍四劑脈症頓退以散腫潰堅丸一料將平惟一核不消乃服遇仙無比丸一二兩而痊。

薛立齋治一婦人久癰患瘰癧不潰既潰不斂發熱口乾月水短少飲食無味曰晡尤倦以益氣養榮湯二十餘帖少健謂須服百帖庶保無虞彼欲求速效反服斑貓之劑及數用追蝕毒藥去而復結致不能收斂出水不止遂不救。

此症屬虛勞氣鬱所致。宜補形氣調經脈。未成者自消。已成自潰。若投慄悍之劑。則氣血愈虛。多變爲瘵症。然堅而不潰。潰而不合。氣血不足明矣。況二經之血原自不足。不可不察。

一男子瘰癧潰久不斂。神思困倦。脈虛欲投以托裏。彼以爲迂。乃服散腫潰堅湯。半月餘果發熱。飲食愈少。復求治。投益氣養榮湯。三月喜其謹守。得以收效。齊氏云。結核無膿。外症不明者。並宜托裏。膿未成者。使膿早成。已潰者。使新肉早生。血氣虛者。托裏補之。陰陽不和。托裏調之。大抵托裏之法。使瘡無變壞之症。所以宜用也。

一男子癧癩久不歛，膿出更清而黃羸瘦，每清晨作利瀉與二神丸數服瀉止，更以六君子湯加菖歸月餘肌體漸復，炙以豆豉餅及用補劑作膏藥貼之三月餘而愈。

一婦人患此症，潰後核不腐，以益氣養榮湯三十餘劑更敷針頭散腐之，再與前湯三十餘劑而歛。

一男子癧癩未潰，倦怠發熱，以補中益氣湯治之少愈，以益氣養榮湯月餘而潰，又一月而痊。

一婦人肝經積熱，患癧癩作痛，脈沉數，以射干連翹湯四帖少愈，更用散腫潰堅丸月餘而消丹溪云：癧癩必起於足少陽一經，不守禁忌，延及足陽明經，食味之厚，鬱氣之久。

曰毒曰風曰熱皆此二端。拓引變換。須分虛實。虛者可慮。此經主決斷。有相火。且氣多血少。婦人見此。若月水不調。寒熱變生。稍久轉爲潮熱。自非斷慾食淡。神醫不能療也。一室女年十七。項下時或作痛。乍寒乍熱。如瘡狀。肝脈弦長。此血盛之症也。先以小柴胡湯二劑少愈。更以地黃丸治之而痊。婦人良方云。寡婦之病。自古未有言也。惟倉公傳與褚澄畧爲論及。言寡者。孟子所謂無夫曰寡是也。如師尼喪夫之婦。獨陰無陽。欲男子而不可得。是以鬱悒而成病也。易曰。天地絪緼萬物化醇。男女媾精萬物化生。孤陽獨陰可乎。夫處閨門。慾已萌而不遂。致陰陽交爭。乍寒乍

熱有類瘧疾久而爲癆。又有經閉白滯痰逆頭風膈氣痞悶面黔瘦瘠等症皆寡婦之病。診其脈獨肝脈弦出寸口而上魚際究其病源其疾皆血盛而得經云。男子精盛則思室女人血盛則懷胎觀其精血思過半矣。雄按此脈有由陰虛火動所致未可均

指爲血盛

一男子耳下患五枚如貫珠年許尙硬面色痿黃飲食不甘勞而發熱脈數軟而濇以益氣養榮湯六十餘劑元氣已復患處已消一核尙存以必効散二服而平。

一男子因勞而患怠惰發熱脈洪大按之無力謂須服補中益氣湯彼不信乃服攻伐之劑吐瀉不食而死大抵此症。

原屬虛損若不審虛實而犯病禁經禁鮮有不悞常治先以調經解鬱更以隔蒜灸之多自消如不消卽以琥珀膏貼之自有膿卽針之否則變生他處設若兼痰兼陰虛等症只宜兼症之劑不可干擾餘經若氣血已復而核不消却服堅散之劑至月許不應氣血亦不覺損方進必效散或遇仙無比丸其毒一下卽止二藥更服益養榮湯數劑以調理若瘡口不斂宜用豆豉餅灸之用琥珀膏貼之氣血俱虛或不慎飲食起居七情者俱不治此症以氣血爲主氣血壯實不用追蝕之劑亦自腐但取去使易收斂若氣血虛不先用補藥劑而數用追蝕之藥適足取敗耳

雄按洪大無力之脈顯屬陰虧攻伐固謬補中益氣亦豈可投其餘議論皆是見到之言

一男子體素弱瘰癧潰後肉不腐此氣血皆虛用托裏養榮湯氣血將復核尚在以簪挺撥去又服前藥月餘而愈。

一男子患此症氣血已復核尚不腐用針頭散及必効散各三次不旬日而愈。

一男子患瘰癧痰盛胸膈痞悶脾罔脈弦此脾土虛肝木乘之也當以實脾土伐肝木爲主彼以治痰爲先乃服苦寒化痰藥不應又加以破氣藥病愈甚始用六君子加菖歸數劑飲食少思以補中益氣湯倍加白朮月餘中氣少旺健又以益氣養榮湯兩月腫消而血氣亦復矣夫右關脈

弦弦屬木乃木盛而剋脾土爲賊邪也。虛而用苦寒之劑。是虛虛也。況痰之爲病。其因不一。主治之法不同。凡治痰利藥過多。則脾氣愈虛。則痰愈易生。如中氣不足。必用參朮之類爲主。佐以痰藥。

一婦人因怒項腫。月經不通。四肢浮腫。小便如淋。此血分症也。先以椒仁丸數服。經行腫消。更以六君子湯加柴胡枳殼數劑。項腫亦消矣。亦有先因小便不利。後身發腫。致經水不通。名曰水分。宜葶藶丸治之。婦人良方云。婦人腫滿。若先因經水斷絕。後至四肢浮腫。小便不通。名曰血分水化爲血。血不通則復化爲水矣。宜服椒仁丸。若先因小便

不利後身浮腫致經水不通名曰水分宜服草薢丸。
一室女年十九頸腫一塊硬而色不變肌肉日削筋攣急痛。
此七情所傷氣血所損之症也當先滋養血氣不信乃服
風藥後果不起盧砥鏡曰經云神傷於思慮則肉脫意傷
於憂愁則肢廢魄傷於悲哀則筋攣魄傷於喜樂則皮槁。
志傷於盛怒則腰脊難以俛仰何侍郎有女適人夫早逝
患十指攣拳垂莫能舉膚體瘡瘍如粟粟果然又湯劑雜
進飲食頓減幾於半載適與診之則非風也正乃憂愁悲
哀所致耳病屬內因藥仍以鹿角膠畫多用麝香熬膏貼
瘡處攣能舉指能伸病漸安。

一癪婦四肢倦怠類瘧症以養氣血健脾胃藥而愈。

一室女性急好怒耳下常腫痛發寒熱肝脈弦急投以小柴胡湯加青皮牛蒡荆防而寒熱退更以小柴胡對四物數劑而腫消其父欲除病根勿令再發謂肝內主藏血外主榮筋若恚怒氣逆則傷肝肝主筋故筋畜結而腫須病者自能調攝庶可免患否則肝迭受傷則不能藏血血虛則爲難瘳之症矣後不戒果結三核屢用追蝕藥而歿。

一少婦耳患腫毒勤苦發熱口乾月水每過期而至且少一老嫗以爲經閉用水蛭之類通之以致愈虛而歿夫月水之爲物乃半太陽半少陰二經主之此二經相爲表裏主

上爲乳汁下爲月水爲經絡之餘氣。苟外無六淫所侵內無七情所傷。脾胃之氣壯。則衝任之氣盛。故爲月水適時而至。若面色痿黃。四肢消瘦。發熱口乾。月水過期且少。乃陰血不足也。非有餘熱之症。宜以滋養血氣之劑。徐而培之。則經氣盛而經水自依時而下。

一放出宮女年逾三十兩胯作痛肉不腫色不變大小便作痛如淋登廁尤痛此瘀血潰入隧道爲患乃男女失合之症也難治後潰不斂又患瘰癧而歿此婦爲湯氏妾湯爲商常在外可見此婦在內久懷憂鬱及在外又不能如願是以致生此疾愈見流注瘰癧乃七情氣血皆已損傷不

可用攻伐之劑皎然矣。故精血篇云：精未通而御女以通其精，則五體有不滿之處。異日有難狀之疾，陰已痿而思色，已降其精，則精不出而內敗。小便道塞而爲淋，精已耗而復竭之，則大小便道攀疼。愈疼，則愈欲便。愈便，則愈疼。女人天癸既至，踰十年無男子合，則經不調。未踰十年，思男子合，亦不調。不調，則舊血不出，新血悞行，或潰而入骨，或變而爲腫，或雖合而難子。合男子多，則懨枯虛人，產乳衆，則血枯殺人。觀其精血，思過半矣。

一室女年十七，患癧癩久不愈，月水尙未通，發熱咳嗽，飲食少思，有老嫗欲用巴豆肉桂之類，先通其經，謂此症潮熱。

經候不調者不治。但喜脈不滯，且不潮熱，尚可治。須養氣血益津液，其經自行。彼惑於速效之說，仍用之。薛曰：非其治也。此類乃慄悍之劑，大助陽火，陰血得之則妄行，脾胃得之則愈虛。經果通而不止，飲食愈少，更加潮熱，遂致不救。經云：女子七歲腎氣盛，齒更加髮長。二七天癸至，任脈通，太衝脈盛，月事以時下。然過期而不至，是爲失常，必有所因。夫人之生以血氣爲本人之病，未有不先傷陰血者。婦女得之多患於七情。寇宗奭曰：世有室女、童男，積想在心思慮過多，當多致勞損。男子則神色先喪，女子則月水先閉，何以致然？蓋憂愁思慮則傷心，心傷則血逆竭，血逆

竭則神色先散而月水先閉也。火既受病不能榮養其子故不嗜食。脾既虛則金氣虧故致咳嗽既作水氣絕故四肢乾木氣不充故多怒鬚髮焦筋骨痿俟五臟傳遍故卒不能死者然終死矣。此一種於勞中最難治。蓋病起於五臟之中無有已期藥力不可及也。若或自能改易心志用藥扶接如此則可得九死一生。舉此爲例其餘諸方可按脈與症而治之。

一男子先於耳前下患瘰癧將愈次年延及頂側缺盆三年遂延胸及腋不愈診之肝脈弦數以龍鬚散堅二丸治之將愈肝脈尚數四年後小腹陰囊內股皆患毒年餘不歛

脈診如前。以清肝養血。及前丸而愈。

薛立齋云。一富商頸有瘻痕一片。頗大。云因怒而致。困苦一
年。百法不應。忽方士與藥一服。卽退二三。再服頓退四服。
而平。以重禮求之。乃必効散。又一嫗治此。乃用中品錠紅
瘡內。以膏藥貼之。其根自腐。未盡再用。更搽生肌散藥數
日。卽愈。又一道人治此。用雞子七箇。每箇八班貓一枚。飯
上蒸熟。每日空心食一枚。求者甚多。各書瘻癰門及本草
云。合前二法觀之。惟氣血不虛者有驗。虛者恐不能治也。
薛立齋治一瘻。婦面黃體倦。嚥酸噯氣。此中氣虛弱。欲用補
中益氣湯。加伏苓半夏。不信。反降火利氣。胸膈痞滿。瘻瘍

腫痛又散堅利氣。喎氣不絕。大便不實。四肢時冷。曰今變
中氣虛寒矣。用六君子湯加薑桂少用升麻柴胡漸愈。更
佐以補中湯全愈。

一婦人患癩癰。嘔氣用降火清胃。食少。吞酸。胸膈痞悶。用利
氣消導。吐痰氣促。飲食日少。用清熱化痰。大便堅澀。內熱
身瘦。曰吞酸嘔氣。脾胃氣虛也。胸痞痰喘。脾胃氣虛也。大
便堅澀。內熱。日瘦。肺血虛也。遂以補中益氣湯。加炒黑
吳茱萸三分數劑。佐以六味丸。諸症頓退。乃用歸脾湯逍
逍散間服而愈。

一男子患瘰癧。腫硬久不消。亦不作膿。服散堅敗毒藥不應。

令炙肩尖肘。尖二穴更服益氣養榮湯月餘而愈。

一婦人瘰癧久潰發熱。月經每過期且少。用逍遙兼前湯兩月餘氣血復而瘡亦愈。但一口不收。敷鍼頭散灸前穴而痊常治二三年不愈者。連炙三次。兼用托裏藥必愈。

田氏婦年逾三十。瘰癧已潰不愈。與八珍湯加柴胡地骨皮夏枯草香附貝母五十餘劑。形氣漸轉。更與必効散二服。瘡口遂合。惟氣血未平。再與前藥三十餘劑而愈。後田生執此方。不問虛實。概以治人。殊不知散中斑貓性毒。雖瘰癧多服則損元氣。若氣血實者。以此下之而投補劑或可愈。或虛而用下藥。或用追蝕藥。瘀肉雖去而瘡口不合。反

致難治

一儒者癒愈後體瘦發熱晝夜無定此足三陰氣血俱虛用八珍湯加麥冬五味二十餘劑又用補中益氣加麥冬五味及六味而愈。

儒者張子容素善怒患癰癧久而不愈瘡出鮮血左關弦洪重按如無此肝火動而血妄行症屬氣血俱虛用補中益氣湯以補脾胃六味丸以滋腎而愈。

陸子溫病兩耳下腫硬用伐肝軟堅之劑益甚其脈左關弦緊左尺洪數此腎水虧損而筋攀也當生肺金滋腎水則肝得血而筋自舒矣彼不悟仍服前藥竟至不起。

楊乘六治愈某患瘰癧，左右大小十餘枚，俱堅硬如石。頭項腫大，不能轉側。吐血咳嗽，夢遺半年，皆服滋陰降火固精伐肝之劑。脈之弦勁中兼見躁動，左關尺獨緊細，如刃口舌青嫩而胖滑，知其肝胆用事。肝膽先病，延及心脾。其痰嗽不絕者，肝氣虛逆，痰隨氣上也。其夢泄不止者，肝血虧損，疎泄失職也。其瘰癧腫大，肝火鬱結不舒也。乃以養榮湯內加肉桂，月餘已有痊意。更以前方佐歸脾養心二方消息守服，三月而愈。

周漢卿治錢塘王氏女，生瘰癧，環頭及腋，凡十九竅，竅破白瀦出，將死矣。漢卿爲剔竅貫深二寸，其餘烙以火炙之數也。

日結癩愈。明
史

張子和治一婦人病瘰癧，延及胸臆，皆成大瘡，相連無好皮肉。張曰：火淫所勝，治以鹹寒。命以滄鹹吐之，一吐而著癩，再用涼膈散解毒湯等劑，皮肉乃復如初。

灸瘰癧，以手仰置肩上，微舉肘，取肘骨尖上是穴，隨所患處左卽炙，左右卽炙右。艾炷如小筋頭許，三壯卽愈。復作卽再灸，如前不過三次。永絕根本，先淬湯壽資室，鐘離有一小鬚，病瘡已破，傳此法於本州一漕官，早灸晚間，膿水已乾，凡兩灸遂無恙。後屢以治人，皆驗。駱安之妻患四五年，瘡癩如田螺殼，不破退，辰時著艾，申後卽落，所感頗深。凡

三作三炙遂除安矣

薛立齋治一男子，素嗜慾且勞神，惡熱喜冷。仲冬始衣綿，乃患瘻癰，脈洪大無力。曰：此陰氣耗散，陽無所附，陽氣浮散於外而惡熱也。敗毒散加芩連山梔，服四劑少愈，再以四物湯加芩連白芷、桔梗根、甘草、金銀花數劑而消。雄安既爲陰耗陽浮，何以第十三條主以補中？此云此脈益氣耶？此用敗毒亦係發表太過也。

繆仲淳治朱文學罐，患瘻，爲灸肩井肘尖兩穴各數壯而愈。

廣筆記

薛立齋治一婦人，患瘻癰，延至胸腋，膿水淋漓，日久五心煩熱，肢體疼痛，頭目昏重，心忪，頰赤，口乾咽燥，發熱盜汗，食

少嗜臥。月水不調。膀腹作疼。謂非瘡故。乃血虛而然也。服逍遙散。月餘少可。更服八珍湯加丹皮香附。又月餘而經通。再加黃耆白朮。兩月餘而愈。

沈氏室患瘰癧。久而不消。自汗惡寒。此氣血俱虛也。遂以十全大補湯。月餘而潰。然堅核雖取。而瘡口不斂。更炙以豆豉餅。仍與前藥加烏藥香附。兩月而愈。大抵堅而不潰。潰而不合。皆由氣不足也。嘗見患此者。瘡口雖合而不加補。往往變爲療症。

薛立齋治一婦人。因怒耳下腫痛。以荆防敗毒散加連翹黃芩四劑而愈。嘗治此旬日不消者。以益氣血藥及飲遠志。

酒。遠志一味未之酒一盞調澄清飲之以其腫自消若無
渣敷先宜泔浸患處治女人乳疽尤効其腫自消若無
膿者亦自潰不戒忿怒者難治。

一婦人發怒耳下焮腫頭痛寒熱與荆防敗毒散加黃芩表
症悉退但飲食少思日晡發熱東垣云雖有虛熱不可太
攻熱去則寒生也遂以小柴胡湯加地骨皮川芎當歸茯
苓白朮陳皮十餘劑而愈次年春復腫堅不潰來索方與
八珍湯加香附柴胡地骨皮桔梗自製服之至六七劑以
爲延緩仍服人參敗毒散勢愈甚又服流氣飲則盜汗發
熱口乾少食至秋復求治診視氣血虛極辭不治果歿今
人有瘡瘍不審元氣虛實病在表裏便服敗毒流氣藥殊

不知敗毒散乃發表之劑果有表症亦只宜一二服多則元氣反損其毒愈甚雖有人參莫補流氣飲乃耗血之劑果氣結膈滿亦只宜一二服多則血氣愈傷反爲敗症雖有芎歸莫救丹溪云此不因膏梁丹毒之變因虛勞氣鬱所致也

一婦人患癩癪不消膿清不歛以八珍湯治之少愈忽肩背痛不能回顧此膀胱經氣鬱所致當以防風通氣湯治之蓋膀胱之脈始於目內眞上項巔至腦後過風府下項走肩膊一支下腰脅是經氣動則脊痛項強腰似折按此非膀胱經症而何彼乃云癩癪胆經病也其脈主行項側卽

是經火動而然。遂自服清肝降火之藥，反致不食痛盛。復求治診其脈，胃氣愈弱。先以四君子湯加陳皮炒芍半夏，羌活蔓荆子四劑食進，痛止繼以防風通氣湯二劑而愈。又一婦流注潰久，忽發熱乃虛也。與補藥二劑不用，另用人參敗毒散大熱而斃。夫老弱之人雖有風邪亦宜以補中益氣湯治之。况又非表症而峻表不死何俟。瘍癰乃虛損之症，最難治。古人雖有成法，而用之多不驗。余得一膏藥方，用紅毛雄雞壹隻，取全骨一具，先用麻油煎枯去渣，入降香五兩，千里奔，即驃馬修下蹄甲五錢，當歸甘草各一錢，槐枝三十寸，煎枯去渣，黃丹收膏，紅絹攤貼。未成者，即消已潰者，卽變出稠膿，累試累驗，並治一切。

腫毒未成者，貼之卽行消散，神妙無比。

一男子因怒耳下及缺盆患癰，潰延腋下，形氣頗實，瘡口不

合以散腫潰堅丸治之而愈。一婦患此氣血不弱亦服此丸其核並消而瘡口不斂更以十全大補湯及炙以豆豉餅始痊。

江中翰姪年及二十耳下患癰焮痛左關脈數此肝經風熱所致以荆防敗毒散三貼表症悉退再與散腫潰堅丸月餘而復。

一婦年二十耳下結核經水每過期午後頭痛服頭風藥愈甚以八珍湯加柴胡地骨皮二十餘劑而愈。

治癰癧丸方元參蒸牡礪假醋炒川貝母去心各四兩煉蜜爲丸每服三錢開水下日二服此方神效治愈不計其數

王洪緒治一人年十七頸患瘰癧成片延爛耳腋及腰如手
掌大數塊瘦弱成怯初以洞天救苦丹與服毒水大流十
日後以陽和湯醒消丸每日早晚各一服十日頃能舒轉
飲食日增外貼陽和膏內服大棗丸始終用荆芥湯洗以
山蓮散敷九十日收功因未服子龍丸小金丹其毒根未
除後腋生惡核仍以子龍丸消之洞天救苦丹方露蜂窠
要內有子者兩頭尖青皮苦棟子立冬後佳各用瓦上炙存
性爲末等分研和每服三錢陳酒送服務要隔兩日再服
醒消丸方乳香沒藥各一兩麝香一錢五分明雄黃五錢
用飯一兩搗爲丸如茶服子大日乾忌烘每服三錢陳酒

送服醉葢取汗。陽和解凝膏方。新鮮大力子根梗葉三斤。
活白鳳仙花梗四兩用麻油十斤煎枯去渣。次日入生附
子桂枝大黃當歸五靈脂肉桂川草烏地龍赤芍殭蚕白
芷白蘞各二兩廣木香一兩白芨二兩川芎四兩續斷防
風荆芥香圓陳皮各一兩再煎枯去渣隔宿油冷每油一
斤加炒透黃丹七兩攪和文火慢熬至滴水成珠爲度。移
鍋冷處加入乳香末一兩麝香研細一兩蘇合油四兩入
膏和勻半月後攤貼專治一切爛潰陰疽凍瘡瘍疾貼背
心大棗丸方山羊屎晒乾入鍋炒如炭存性爲末用大棗
去皮核先搗爛然後入前粉搥成丸遇毒爛不堪將見內

癰者。黑棗湯送服四錢。山蓮散方。大活蟬魚一尾破腹去雜。以山羊屎塞實魚腹瓦上慢火炙乾研末加腐香一錢。磁瓶蜜收。如遇爛潰不堪。與內臟腑止隔一膜者用此敷立見奇功。子龍丸方法。製甘遂每一斤用甘草四兩煎湯浸三日。湯黑去湯河水洗淘取清水日淘日洗日浸。每日換水數次。三日後去心再淘浸四五日。取一撮入白磁盆內。隔一宿水無異色乃撈起瀝乾。以麵裹如團。入糠火內煨黃透。取出入鍋炒磨粉聽用。法製大戟去旁枝用水煮透去骨切片晒乾聽用。白芥子炒以上三物各等分爲末。煉蜜爲丸。日服三次每服三分。淡薑湯送下。此治癰癧惡。

核流注之專藥也

王姓媳頸內瘰癧數個。兩腋惡核三個。又大腿患一毒。不作痛癢。百餘日後日漸發大。形大如斗。按之如石皮。現青筋。常作抽痛。王視之曰。此石疽也。初起時可消。今日久發大上。現筋紋。雖按之如石。然其根下已成膿矣。如偶作一抽之痛。乃是有膿之症也。上現青筋者。其內已作黃漿可治。如上現小塊高底如石巖者。不治。三日後主發大痛。不潰而死。如現紅筋者。其內已通血海。不治。倘生斑點。卽自潰之症。潰卽放血。三日內斃。今患現青。若醫至軟爲半功。潰後膿變稠後。可冀收功也。外以活商。陸根搗塗。內服陽

和湯。十日則止。一抽之痛。十三劑內外作癢。十六劑頂軟。
十八劑通患軟。頸項之癰。兩腋之核。盡行消散。止刺石疽。
高起內膿袋下。令服參一錢。於筋絡處先以銀針穿之後。
以刀濶其口。以紙針塞入口內。次日兩次流水斗餘大劑。
滋補托裏。刪去人參。倍用生芪。服十劑甚相安。一醫令將。
芪草俱炙。用三日四圍發腫。內作疼痛。復延王治。王照前
方。服二十餘劑。外以陽和膏滿貼患處。獨留患孔加以布。
綑綁。王曰。凡經潰陰疽將愈。則外皮漸活。而內膜生。斯爲
佳兆。所出之膿在皮裏膜外。僅以空術。又不能以生肌散
藥。放入內服。溫補滋陰養血。溫暖膏藥之用。綑使其皮膜

相連。易於膿盡且又易於連接生肌。果綁後數日內膿濃厚。加參服兩月收功。

化核膏。專治癰癧。貼卽暗消。內服子龍丸方可除根并杜後發。壁虎十四個。蜘蛛二十八個。蝸牛三十六個。用菜油四斤。熬枯去渣再入鮮首烏藤葉甘菊根薄荷牛旁草蒼耳草各半斤。用武火熬枯去渣。俟油冷再入連翹元參苦參白蘚白芥子殭蚕水紅子大黃荆芥防風各四兩。浸一宿。熬枯去渣再熬至滴水成珠。每油一斤。加黃丹七兩。熬黑。加入丁香油二錢。麝香二錢。蘇合油一兩。攪勻退火散貼。凡治癰癧忌用海藻夏枯草。久服則成癰勞。後數年內

忌食香橙食則復發

流注

徐靈胎曰流注者纏綿不已或五或七或九
愈者愈發者發變化萬端若新生一兩個旋
卽消潰非真流注也

薛立齋治一婦人因暴怒而腰腫一塊或胸膈不利或走氣
作痛此營氣鬱滯與方脈流氣飲數劑而止更以小柴胡
湯對四物加香附貝母月餘而愈

一婦人患流注遇勞必痛衆手按之痛乃止屬氣血俱虛用
十全大補湯六味丸逍遙散而愈

一婦人先肢體作痛後患流注發熱惡寒食少脇脹月經不
調痰盛喘噦五心煩熱健忘驚悸盜汗無寐悉屬肝脾虧

損氣血不足用十全大補加味歸脾兼服諸症悉痊

一婦人素頭暈患流注月經遲少此屬中氣虛弱用補中益氣湯而愈後因勞仆地月經如涌此勞傷火動用前湯加五味子一劑而愈

一婦人患前症用行氣化痰等胸膈不利飲食少思用疏利之藥大便作泄中滿不食此脾胃復傷用補中益氣湯加炮薑脾胃健飲食進又用六君子加芎歸百餘劑始全愈一婦人素鬱結肩臂各腫如覆杯此肝脾虧損用加味逍遙散多於補氣藥右手脈不足補氣藥當多於補血藥切不可發表

薛立齋治一男子腿患腫肉色不變不痛脈浮而滑以補中
益氣湯加半夏茯苓枳殼木香飲之以香附餅熨之彼謂
氣無補法乃服方脈流氣飲愈虛復求治以六君子湯加
芎歸數劑飲食稍進再用補劑月餘而消夫氣無補法俗
論也以其爲病痞悶壅塞似難於補殊不知正氣虛而不
能運行則邪氣滯而爲病經云壯者氣行則愈弱者則著
而爲病苟不用補法氣何由而行乎

經語在流注門尤爲吃緊

一婦人潰後發熱以爲虛彼不信仍服敗毒藥果發大熱竟
至不救夫潰瘍雖有表症發熱宜以托裏藥爲主佐以表
散之劑何況癰癰流注乎若氣血充實經絡通暢決無患

者此症之因皆由氣血素虧或七情所傷經絡鬱結或腠理不密六淫外侵墮道壅塞若不審其所因辨其虛實鮮不誤人

一男子腿患流注久而不歛飲大補藥及附子餅更用針頭散綰之而愈

一男子患臂年餘尙硬飲食少思朝寒暮熱以八珍湯加柴胡地骨皮丹皮月餘而寒熱少止繼以益氣養榮湯及附子餅炙之兩月餘膿成針之更服人參養榮湯半載而瘡一婦人患此症膿潰清稀脈弱惡寒久而不愈服內塞散灸以附子餅而痊

一婦人腰間患一小塊肉色如常不潰發熱。謂當以益氣養榮湯解鬱之藥治之。不信別服流氣飲。後針破出水年餘而歿。

一婦人流注久不歛。忽發寒熱。決其氣血俱虛。彼反服表散之劑。果大熱亦死。大抵流注之症多因鬱結。或暴怒或脾氣虛。濕氣逆於肉理。或腠理不密。寒邪客於經絡。或悶撲或產後瘀血流注關節。或傷寒。餘邪未盡爲患。皆因真氣不足。邪得以乘之。常治鬱者開之。怒者平之。悶撲及產後瘀血者散之。脾虛及腠理不密者除而補之。傷寒餘邪者調而解之。大要以固元氣爲主。佐以見症之藥。如久而瘡

寒者更用豆豉餅或附子餅炙之。有膿管或瘀肉者用針
頭散腐之自愈。錠子尤效。若不補氣血及不慎飲食起居
七情俱不治。雄按因于痰飲者亦甚多也

一男子元氣素弱時患流注。胸膈不利。飲食少思。欲治健脾
胃。解鬱結養氣血。彼不從。乃服辛香流氣之劑。到腹脹又
服三稜蓬朮厚朴之類。飲食愈少。四肢微腫。兼腰腫一塊
不潰而歿。蓋此症本虛痞。今用剋伐之劑。何以不死。況辛
香燥熱之劑。但能劫滯氣。取快於一時。若不佐制。過服益
增鬱火。煎熬氣液爲痰。日久不散。愈成流注之症。

一聘土流注久潰。肌肉消瘦。發熱作渴。惡寒飲食。以六君子

加歸耆附子服敷劑患處遂紅活。又服十全大補湯三十
餘劑膿漸稠而愈。後惑於人言謂盛暑不宜用附子。彼又
因場屋不遂意復患前症。專服敗毒流氣之劑。元氣消爍。
肌肉日瘦。醫以爲不治。自分不起。其師勝洗馬云。向者病
危得附子藥而起。今藥不應。以致危篤。何不仍服附子藥。
遂復求治。其脈微細。症屬虛寒。並無邪毒。仍用附子藥乃
得愈。

賈閣老子患流注。脈數作渴。不喜飲冷。膿水清稀。面帶赤色。
曰此氣血虛而兼火也。治難奏功。彼以爲迂別。服燥濕分
利之劑。兩月餘反加煩渴。寒熱往來。復邀治形體已脫。曰

雖治亦無功矣。後果不起。

陳進士遂初年逾三十患腹腫硬逾年而瘡頭破時出血水此七情所傷榮氣絕於內理而然名曰流注診之肝脈濇蓋肝病脈不宜濇小腹正屬肝經須濇脈退乃可愈欲以甘溫之劑補其氣血令自消潰不信仍服攻伐之藥致氣血愈虛果歿於金旺之月丹溪云諸經惟少陽厥陰之生瘡疽宜預防之以其多氣少血也少血而肌肉難長瘡久不合必成敗症苟不知此輒欲用峻利毒藥以伐其陰分之血則其禍不旋踵矣

一室女背腫結一塊如鈔大而不焮但倦怠少食日晡發熱

脈軟而濇此虛勞氣鬱所致也用益氣養血開鬱之藥。又令飲人乳精神稍健彼不深信又復流氣飲飲食遂少四肢痠軟乃悔之復求治以爲決不可起矣後果斃。

一男子年三十餘素肌寒患右肋腫如覆瓢轉作水聲脈數經曰陰虛陽氣湊襲寒化爲熱甚則內腐爲膿卽此症也及按其腫處卽起是膿已成矣遂以濃煎黃耆六一湯草六一者令先飲一鐘然後針之膿出數椀而虛症並至遂以大補藥治之三月餘而愈大抵膿血大泄氣血必虛當峻補之雖有他病皆宜緩治益元氣一復諸症自退若老弱之人不問腫潰尤當補也。

一婦人十九腰間腫一塊無頭色不變三月不潰飲食少思
肌肉日瘦此寒搏腠理榮氣不行鬱而爲腫也名曰濕毒
流注百餘劑元氣復而腫消後因勞役怒氣經行不止服
涼血之劑其血如崩此因脾氣復傷下陷而血從之朝用
補中益氣湯夕用歸脾湯而愈

一婦人稟弱性燥脇臂腫痛胸膈痞悶服流氣敗毒藥反發
熱以四七湯數劑胸寬氣利以小柴胡對因物加陳皮香
附腫痛亦退大抵婦人性執著不能寬解多被七情所傷
遂致遍身作痛或肢節腫痛或氣墳胸滿或如梅核塞喉
嚥吐不出或痰涎涌盛上氣喘急或嘔逆惡心甚者渴悶

欲絕產婦多有此症。宜服四七湯。先調帶氣。更以養血之藥。若因憂思致小便白濁者。用此湯吞青州白丸子屢效。一婦人腿患筋攣骨痛。諸藥不應。脈遲緊。用大防風湯二劑頓退。又二劑而安。又一婦人亦然。先用前湯二劑。更服黑丸子而痊。此二患失治必潰成敗症。

一老人傷寒表邪未盡。股內患腫發熱。以人參敗毒散二劑熱止。炙以香附餅。又小柴胡加二陳羌活川芎歸身白朮枳殼數劑而散。

一男子肩胛患之。微腫形勞氣弱。以益氣養榮湯。服黑丸子及木香生地作餅。覆患處熨之。月餘腫成針之。仍服前藥。

而愈。

一男子臂腫筋攣骨痛年餘方潰不歛診其脈更虛以內塞散一料少愈以十全大補湯及附子餅炙之而痊精要云留積經久極陰生陽寒化爲熱以此潰多成瘻宜早服內塞散排之。

一男子腿患流注潰而不歛用人參養榮湯及附子餅更以補劑煎膏貼之兩月而愈。

通府李廷儀患流注唾痰氣促自恃知醫用化瘀理氣等劑半載而潰用托裏等劑膿水淋漓腫硬不消寒熱往來飲食少思肌肉消瘦大便不實手足時冷兩尺脈浮大按之

微細曰此屬命門火衰當用八味丸不信乃服參芪歸朮之類更加痰喘泄瀉服八味丸益氣湯年餘而痊

一婦人背患流注內潰脹滿服流氣化痰之劑自汗盜汗脈大而弱此元氣虧損之症也與參耆各一兩歸朮各五錢肉桂二錢服而針之至夜半始出稀膿二碗許翼日大汗倦甚頑熱作渴揚手氣促脈洪大而數仍用前藥加附子一錢炙草二錢二劑脈症悉退又以六君加薑桂二十餘劑始離床褥後因勞復寒熱作渴汗出時仲冬寢帷氣出如霧用十全大補湯加桂附二劑而痊

一學士年十六患此症一載矣脈洪大而數膿清熱渴食少

卷之三十一
體倦夜間盜汗午前畏寒曰真氣不足邪氣有餘治之無功矣午前以四君子湯加芎歸灸草午後以四君子加五味麥冬參耆兩月諸症遂可一二又有用滻利之劑保其必生者三月後形體骨立後竟不救

一弱人患流注內潰出敗膿五六碗是時口眼歪斜以獨參湯加附子二錢二劑少愈更以十全大補之劑月餘而痊大抵瘡瘍膿血既泄當大補氣血爲先雖有他症當以未治之凡癰潰發熱惡寒皆屬氣血虛甚若左手脈不足者用補血藥元戎云若人飲食疎精神氣血弱肌肉消薄榮衛之氣短促而滯滯故寒搏腠理閉鬱而爲癰腫當補之

以接虛怯之氣遂以十全大補加香附陳皮三十餘劑始
針之出自白膿一碗仍用前藥倍參及以豆豉餅灸之漸愈
彼欲速效內服敗毒外貼寒涼反致食少膿稀色紫喜得
精氣未喪仍以前藥加遠志貝母白斂百劑而愈

劉文通室年逾二十腰間突腫寸許肉色不變微痛不潰發
熱脈大此七情所傷氣血凝滯於隧道而然也當益氣血
開鬱結更以香附餅熨之使氣血充暢內自消散雖潰亦
無虞不聽乃服十宣流氣藥氣血愈虛破出清膿不斂而
癰

王洪緒治陳姓婦年七十餘膝下患陰疽流注潰經數月患

下及旁又起硬腫二塊與前患相連一醫誤以爲前患旁腫與托毒藥二劑致新發者被托發疽始延王治王令服陽和丸湯三劑新發之二毒皆消接服小金丹十九後服滋陰劑以杏仁散敷半月膿厚令再服保元湯加玉桂十餘劑愈流注之症毒發陰分蓋因痰塞清道氣血虛寒凝結一曰寒痰一曰氣毒初起皮色不變惟腫惟痛雖身體發熱內未作膿二陳湯加陽和丸同煎數服即消消後接服小金丹七丸杜其復發如皮色稍變極痛難忍須服陽和湯以止其痛消其未成膿之毒氣使已成膿者至不痛而潰如患項軟卽爲穿之膿多白以陽和膏貼之但此症

潰後定增毒痰流走。患生不一。故卽潰之後五日內宜服小金丹十丸。以杜後患。接用犀黃丸。陽和湯早晚輪服。使毒消盡方可收功。

王洪緒治一兒甫歲半。太陽一毒背上心臍對處。二毒頸口此一毒腰腹二毒。二腿五毒共十一毒。皆皮色無異。其大腿二毒已經醫開刀。王以小金丹令日每服二次。至五日九毒俱消。又以小金丹日服一次。十日後二孔皆紅活。以保元湯。芪草皆用生者。加內桂三分煎服。另以參六分水煎和入。半月後芪草皆易炙者。一月收功。小金丹方。白膠香一兩五錢。草烏一兩五錢。地龍一兩五錢。木鱉一兩。

五錢五靈脂一兩五錢。沒藥七錢五分乳香七錢五分炮
薑一錢一分當歸身七錢五分麝香三錢共研未以糯米
粉一兩一錢爲糊搗干錘爲丸如芡實大此一料約爲丸
二百五十丸晒乾忌烘臨用取一丸布包於石上敲碎入
杯內以好酒浸之約一二時以銀物加研陳熟酒送下醉
蓋取汗如流注初起及一切痰核瘻癰乳岩癧服至消
乃止如流注等症成功將潰及潰久者當以十丸作五日
早晚服之以杜流走後患但方內有五靈脂不可與人參
同服又方中乳香沒藥每一斤用燈心四兩同炒至圓脆
可粉爲度扇去燈心磨粉草烏去皮取白肉每斤用綠豆

半斤同煮俟豆開花去豆取草烏切片晒乾。木鱉子用水
浸半月入鍋煮數滾再浸熱湯中數日刮去皮心入香油
鍋中煮至油沫盡再煮百滾透心黑脆以鐵絲篩撈出卽
用土末拌拌至土末有油氣入粗篩篩去油土另換土末
拌至三次淨以木鱉同土炒入盆中拌罨一夜取鱉磨粉
聽用以上各藥須如法泡製方可用

續名醫類案卷三十四終

1641

續名醫類案卷三十五

錢塘魏之琇編集

海昌王士雄孟英
定州楊照藜素園同校

膿疥

蘇頌曰、黔人治疥癬遍體諸藥不効者、生取白花蛇切斷。以
磚燒紅沃醋。令氣蒸。置蛇于上。以盆覆一夜。如此三次去
骨取肉。以五味令爛頓食之。瞑睡一晝夜乃醒。瘡疘隨
皮便退。其疾便愈。本草綱目

張子和曰、貨生藥焦百善云、有蕪夫來買苦參、欲治疥、不識

藥性緩急。但聞人言可治。濃煎一碗服之。須臾大吐痰涎一盆。二三日疥作癩矣。

潘墳曰。予蔓孫患膿疥三年。身無完膚。下體尤甚。內治外治百無一效。乃治製一方。名和中固氣湯。以蒼朮一錢燥濕。白朮一錢固脾。黃耆一錢實腠理。升麻八分。柴胡一錢引清氣。元參八分散上焦火。芩連各七分。清中焦火。黃柏七分。伏下焦火。歸身一錢養心血。甘草陳皮人參各五分。調中氣。煎服存渣。加白蒺藜金銀花煎洗。十數劑而全愈。褚記

室

姚應鳳診一人。遍體發小疥如粟。應鳳曰。是名潰海瘡不治。

生治死。其人不信治之死。

錢塘縣志

元希聲侍郎治卒發疥秘驗方石灰隨多少和醋漿水調塗。隨手卽滅。一法用石灰炒紅出火氣。香油調傅。

薛立齊治稽勲李龍岡患疥腿足爲甚。日晡益熾。口乾作渴。小便頻赤。此腎經虛熱用補中益氣湯五味丸而痊。

一儒者善嘔。患疥以爲內有濕熱。腠理不密。外邪所搏也。與補中益氣湯加白芷川芎治之。不從。自服荆防敗毒散。痛處發腫。小便赤澀。此肺腎陰虛用補中益氣湯加五味麥冬而愈。

一儒者患疥。誤用攻伐之劑。元氣虛而不能愈。用補中益氣

續名醫錄卷三十五
二
湯加茯苓。其瘡頓愈。又因調養失宜。日晡益甚。其腿日腫。夜消以爲氣血虛而有熱。朝用補中益氣。夕用加味逍遙而愈。

一男子時疫愈後。所患如前。用前藥補養而愈。有同患用砭法出血而死。此因陰虛血熱色黑作癰也。何乃反傷陰血哉。

一婦人疥久不愈。食少體倦。此肝脾虧損而虛熱。先用補中益氣湯。加川芎炒梔元氣漸復。更以逍遙散而愈。若復間譖語。此熱入血分。用小柴胡湯加生地治之。血虛者四物合小柴胡湯熱退。却用逍遙散以補胃生陰血。或有寒熱。

如瘧亦治以前藥。

一婦人患疥作癢，膿水不止，脈浮無力，以消風散四劑少愈。
更以四生丸月餘而平。

一男子癰少痛多，無膿水，以芩連荆防山梔薄荷白芍歸梢。
治之而愈。

一男子患疥，燬痛，發熱，脈浮數，以人參敗毒散四劑少愈。
更以當歸飲子數劑而愈。

一男子患疥，燬痛，寒熱，便秘，脈數有力，以防風通聖散二劑。
少愈，更以荆防敗毒散加黃芩山梔四劑而愈。

一婦人患疥作癢，午後尤甚，以當歸飲子數劑少愈，更以人

參荆芥數劑而安。

薛立齋治一男子患疥久不愈。搔起白屑耳作蟬聲以四生

散白附子黃耆數服癥止更以當歸飲子數劑而痊。

一男子患疥下體居多焮痛日晡尤甚腿腕筋紫而脹脈洪大此血熱而然也就於紫處刺去瘀血以四物湯加芩連地骨皮柴胡四劑而安患在上體若臂腕筋紫脹亦宜刺去其血以前湯加柴胡黃芩卽愈。

一男子搔癩成瘡日哺痛甚以四物加芩連荆防數劑而止更以四物加蒺藜首烏黃耆二十劑而愈。

智化寺一僧病瘡疥自用雄黃艾葉等藥燃於被中熏之翌

日遍身焮腫皮破出水飲食不入投以解藥不應而死蓋
藥熏入腹內而散真氣其禍如此

丁丑予舉家生瘡家人亦用此方熏之瘡不愈未幾鑾
兒出痘症極凶藥不能下咽而歿殆亦受其毒耳

一男子患瘡疥搔破出膿水面赤作渴大便堅實脈洪數左
關寸爲甚此木火相搏也先用瀉青丸料煎服熱勢頓減
又用梔子柴胡散加味道遙散而瘡愈

一儒者遍身生瘡癩癰膿水淋漓自知醫服八珍荆防之類
益甚脉洪大按之無力謂此氣血虛熱也用八珍湯加丹
皮治之而愈繼娶後兩足生瘡久不愈尺脉數而無力用

地黃丸八珍湯而痊。

一男子患疥乾癩作痛。以芩連荆防山梔薄荷白芍歸硝治之而愈。

蔣仲芳治一僧。初患疥。自以水銀蘄艾熏之。遂喘息胸滿。遍身浮腫。或投五皮飲不效。投椒目大黃等喘腫愈甚。曰氣道皮膚肺氣熱也。復以火熏。火毒傷肺。遂失降下之令氣道。塞水道閉。喘息溺澁浮腫之所由來也。今復推蕩陰血。又傷若非童真。難免于死矣。以麥冬、黃芩、山梔、桑皮、花粉、滑石木通燈草與之。四劑而愈。薛案有一僧亦用薰法致死

胡氏子年二十餘生膿窠。已一年服藥無算。長卧床席二三

日間昏暈數次入其室穢氣盈溢膿血痛苦仰卧不能轉側兩手背皆瘡不能診候問其飲食惡心否云尙可飲食曰胃氣在可生也卽以黃耆白朮當歸甘草廣膠爲主佐以銀花浮萍煎之以酒六劑瘡愈大半二十劑而全愈

姚氏婦有子而胸乳肥瘡如桃背及下半身俱滿異痛異癢膿血淋漓已經三月不時寒熱漸作惡心蔣曰病急矣但喜其日未久因乳子而氣血驟虛因多卧而飲食不運也亦以前方加黃柏連翹陳皮香附外以大黃樸硝松香東丹爲末少加飛鹽麻油調敷亦不久而愈此二人者胡子清熱消運之品俱爲日久虛弱者設也若初起壯實者粒

如小粟而多癢。曰疥瘡。風熱爲勝。理以苦參黃柏荆芥。防風爲君。膿泡如痘而多痛。曰膿窠。濕熱居多。理宜蒼朮秦艽銀花連翹爲主。俱加天麥門冬酒炒黃芩。以清肺。蓋肺主皮毛。肺熱則皮毛有是疾也。若日久則肺虛。又宜補肺。而不宜清肺矣。此意先哲未及故附之。

癬

張子和治一女子年十五兩股間濕癬。長三四寸下至膝發癢時爬搔湯火俱不解癢。定黃赤水出又痛不可耐。炙病熏焯硫黃蕷茹僵蠶羊蹄跟之藥皆不效。其父母來求療。

張曰能從予言則瘥。父母諾之。以排針磨尖快。當其瘡處于癬上各刺百餘針。其血出盡。煎鹽湯洗之。如此四次大病方除。此方不盡以告後人。恐爲癬藥所誤。溼淫于血。不可不砭者矣。

薛立齋治一人生風癬似癬。三年不愈。五心頻熱。脈洪。按之則澁。此血虛之症。當以生血爲主。風藥佐之。若專攻風毒。則血愈虛。而熱愈熾。血被煎熬。則發瘰癧。或爲性症。遂以逍遙散數劑。及人參荆芥散二十餘劑而愈。

劉禹錫傳信方云。予少年曾患癬。初在頸項間。後延上左耳。遂成溼瘡浸淫。用斑蝥。狗膽桃根諸藥。徒令蟄蠶。其瘡轉

盛偶于是州賣藥人教用蘆薈一兩研甘草炙半兩相和
令勻先以溫漿水洗癬乃用舊乾帛子拭乾便以二味合
和傅立乾瘥神效本草

立齋治一男子面青腿內曠患癬色赤作癢或爲砭刺出血
發熱焮痛服消風散而益甚服遇仙丹愈加發熱作渴仍
服之膿水淋漓其脈洪數左關爲甚此肝經血虛火內動
復傷其血而瘡甚先用柴胡清肝散數劑又用四物山梔
治之諸症漸退用八珍湯地黃丸兩月餘而瘥。

張子和治一童子病滿胸腹溼癬每爬搔則黃水出已年餘
先以末作丸上涌次以舟車丸瀉川散下三五行次服涼

膈加樸硝，並成時時呷之不數日而愈。

疙瘩

翟立之素善飲，遍身疙瘩，搔起白屑，上體爲甚。面目焮腫，成瘡結痂，承漿眼赤，出淚，左關脈洪數有力。或作癟風治之，膿潰淋漓，此肝火溼毒以四物湯加乾薑、連翹、山梔、柴胡。一劑諸症悉退，四劑全退。兩睛各顯青白翳一片，亦屬肝火，再劑翳去，乃用六味丸而愈。

一儒者身發疙瘩，時起赤暈，憎寒發熱，服癘風之藥，肩落筋攣，後疙瘩漸潰，日晡熱甚，肝脈弦洪，餘脈數而無力。此肝

經血虛風熱也。先以小柴胡合四物湯加丹皮酒炒黑枝再與加味逍遙散加蓼朮鈎藤服兩月瘡悉愈而眉漸生後因怒復作用小柴胡湯加菖歸鈎藤木賊而愈後勞役發熱誤用寒劑不時身癢日晡赤暈早與補中益氣湯加五味麥冬山藥午後與加減八味九尋愈後食炙燉等物仍發疙瘩小便白濁關脈滑大有力用補中益氣湯加山梔諸症悉退。

一男子秋間發疙瘩兩月餘漸高有赤暈月餘出黑血此風熱血虛所致先用九味羌活湯風熱將愈再用補中益氣湯而愈後不慎房慾復作盜汗晡熱口乾唾痰體倦頰黃。

用補中益氣湯加減八味丸頓愈。

一婦人遍身疙瘩搔癢，敷追尋之藥成瘡，出水寒熱，脇痛小便不利，月經不調，服祛風之藥劑形體消瘦，飲食少思。此肝火血燥生風也。前藥益傷肝血，先用歸脾湯二十餘劑，又用加味逍遙散二十餘劑，諸症漸愈，乃用六味地黃丸調理而瘥。此等症候，服風藥而死者多矣。

一男子不時患疙瘩搔癢成瘡，膿水淋漓，惡寒發熱，先用羌活當歸散而癢止，又用易老祛風丸而不發，後飲燒酒，起赤暈二便不通，口舌生瘡，熱渴不安，用防風通聖散，二便遍利，但口乾體倦，飲食不入，用七味白朮散去木香四劑。

而愈

一男子遍身患疙瘩作癢。勞而益甚。用參耆歸朮爲君。佐以柴胡炒芩桔梗川芎炙草而痊。更用補中益氣湯之劑後不再發。

一男子患疙瘩發熱形氣虛弱。口鼻氣熱。且喜飲冷屬外邪也。以消風散二劑。外邪悉解。但倦忘少食。更以參耆陳皮炙草五味而健。又以補中益氣湯去柴胡升麻。加茯苓白芍乃痊。

一男子患疙瘩多在臂腳勞役則癢甚。小便色黃服敗毒散芩連之。劑思處癢痛夜不能寐。此脾氣下陷。用補中益氣

湯加五味麥冬。炒黑黃柏治之而痊。凡病日間如故。日晡倦怠。遇勞愈加。晨起如故。皆元氣虛也。宜用前藥補而治之。

一男子患疙瘩。色黯作癢。出黑血。日晡至夜益甚。其腿日腫。夜消以爲氣血虛而有熱。朝用補中益氣湯。夕用加味道遙散而愈。

一儒者應試後遍身搔癢。後成疙瘩。此勞傷元氣。陰火內熾。秋寒收斂。腠理鬱熱。內作補中益氣湯。加茯苓。川芎。白芷。而愈後復勞仍作。惑于人言。服祛風敗毒藥。如大風之狀。又發熱作渴。倦怠。嬾食。用補中益氣湯。倍參耆歸。朮半夏。

茯苓五味麥冬而愈。

一婦人遍身患疣瘡，發熱作癢。內服敗毒祛風，外搽攻毒追
蝕，各潰成瘍，膿水津淫，形氣消瘦，飲食日減，惡寒發熱，作
渴飲冷，脈浮數，按之則澁，此元氣復傷也。先用七味白朮
散數劑，其渴漸止，飲食稍加。乃用八珍湯加柴胡丹皮，膿
水漸乾，又用六君子歸丹皮山梔，瘡漸收斂。仍用八珍山
梔丹皮而愈。

一婦人因怒寒，熱發赤暈，服祛風之劑，發疣瘡或砭出血患
處，焮腫發熱頭痛，內服外敷俱係風藥，膿水淋漓，服花蛇
酒之類，前症益甚，更加晡熱煩渴不寐，脈洪大，按之如無

此血脫煩燥先用補血當歸湯稍緩用四君當歸數劑得
睡但倦怠頭暈少食用補中益氣湯加蔓荆子稍可又用
八珍湯加用芎芍信用參尤三十餘劑而能步履又復月
餘而痊

一婦人性急善怒月經不調內熱口苦患疙瘩作癢服敗毒
之藥，膿水淋漓，熱渴頭眩，日晡益甚，用加味逍遙散漸愈。
後因大怒，月經如涌，眼出淚，用四物湯加山梔柴胡連芩
數劑而愈。年餘左足臂腕起白點漸大，搔起白屑，內熱盜
汗，月經兩月餘一至，每怒或惡寒頭痛，或不食作嘔，或胸
乳作脹，或腹內作痛，或小便見血，或小水不利，或白帶注

下此皆肝木制伏脾土。元氣虛而變症也。用補中益氣湯。
加炒黑山梔。及加味歸脾湯。服半年而愈。後每怒惱患赤
暉。或以風疾治之。發疙瘩。又服遇仙丹。赤腫作癢出膿水。
外敷追蝕之藥。寒熱作渴。又服胡麻草烏之藥。遍身癩癰。
眉毛脫落。膿水淋漓。咳嗽發熱。月經兩月一行。用四君當
歸丹皮。月餘熱渴稍止。飲食少進。又服月餘。咳嗽少可。却
用八珍湯加丹皮二十餘劑。患處漸乾。經水如期。復因傷
食作瀉。不食用六君子湯。飲食漸進。又因怒發熱作渴。患
處作痛。經行不止。用加味逍遙散漸可。仍用四君子湯而
全愈。

一女子二十歲月經先期或過期或怒則身發赤暈或患瘧
瘧六七日方退服祛風藥搔癢作渴搔破成瘡膿水浸淫
曰此肝火生風再服是藥必致筋攣不悟後兩手拘攣始
信先用地黃丸四物湯月餘熱渴頓減乃佐以加味逍遙
散又月餘患處膿少又用四君子山梔丹皮二十餘劑指
能伸屈因怒發熱經水不止睡中筋脈抽動不安以加味
逍遙散加鈎藤治之而痊仍用四物山梔鈎藤丹皮而瘡
結膿乃去鈎藤調理元氣復而瘡膿乾

一女子常患癰疹作癰因怒發熱變爲疮瘡腫甚用梔子清
肝散治之而愈後又怒患痕起赤暈遊走不定自砭出紫

血甚癢徹骨。其熱如炙。如大麻風。欲用風藥治之不效。乃以當歸補血湯四劑。其熱悉止。又用聖愈湯加味逍遙散而痊。

一婦人身發痃癧。或如丹毒。癧痛不常。搗碎成瘡。膿水淋漓。發熱渴煩。頭目眩。日晡益甚。此血虛內熱之症。以當歸飲加柴胡山梔治之而愈。

一婦人患前症。肢體疼痛。頭目不清。自汗盜汗。月水不調。肚腹作痛。食少倦怠。先用人參荆芥散。後用逍遙散。治之而痊。

一婦人因忿怒。身發痃癧。憎寒發熱。此肝火用小柴胡湯加

山梔黃連治之而愈。後口苦脇痛，小便淋漓。復用前藥遂全愈。

一婦人患前症，發熱夜間譖語。此血分有熱，以小柴胡湯加生地治之而安。後用四物湯加柴胡山梔丹皮而熱退。又用逍遙散全愈。

一女子常患疙瘩，時或作癢服消風之類，搔破成瘡。其癢不止延及頭面，先用羌活當歸散。其癢頓止，用加味逍遙散。其熱頓痊，又用當歸飲而瘡亦愈。用八珍柴胡山梔而不
再作。

血風癰瘍

編者醫案卷三十五

薛立齋治一男子面赤作渴，面常患小瘡作癰。服祛風藥，遍身發赤癟，服白花蛇酒，更發赤暈，遍行砭刺，又服消風散，發熱口渴，飲水不止。謂肝經血虛而風熱也。用梔子清肝散，及地黃丸料煎服，熱渴漸止，瘡漸結屬。用八珍湯，地黃丸，瘡屬漸脫，又復月餘，瘡漸愈。

一男子面生粉刺，或生小癟，服消風散，瘡益甚。服遇仙丹，加骨立，先用四君子，當歸，桔根，四劑飲食稍進，又用八珍湯。

數劑而痊

一男子嗜膏梁炙燙醇酒辛辣之物遍身生瘡癟甚癢服消風散之類更起赤暈又砭出血其癢益甚敷敗毒之劑遂各成瘡膿水津溼眉毛漸脫赤癢益甚此脾經積熱傷血所致先用犀角地黃湯加黃連治之膿水漸止乃以八珍湯加山梔丹皮眉毛漸生因飲食失宜胸腹作脹飲食少思或大便下血用五味異功散加升麻飲食漸進又用補中益氣湯而血止仍用異功散加當歸丹皮而痊

一女子性急多怒月經先期患瘡癟色赤作癢搔破膿水不止服祛風藥其瘡益甚服花蛇酒四肢癰癧眉毛脫落先

用柴胡清肝散加鈎藤數劑。又用加味逍遙散加鈎藤。諸症漸愈。又用易老祛風丸而安。

一女子年十四。腕軟處生物如黃豆大半在肉中紅紫色痛甚。諸藥不效。一方土以水銀四兩白紙一張。揉熟蘸水銀擦之。三日自落而愈。李摶 怪症

朱丹溪治朱院君三十餘久患癰疹。身痺而紫色與防風通聖散加牛蒡爲極細末。每一錢水盞半入薑汁令辣。煎食熱飲之。

汪石山治一人。年逾六十。形瘦蒼紫。夜常身癢。搔之熱蒸皮肉磊如豆粒。癢止熱散。肉磊亦消。醫用烏藥順氣升麻和

氣等不效。診之脈皆細濡近駛。曰此血虛血熱也。而爲順氣和血。所謂誅罰無辜。治非所宜。遂以生地元參白蒺藜歸芍耆芍黃芩甘草陳皮煎服月餘而愈。

一老人患疹色微赤作癢發熱。以人參敗毒散二劑少愈。以補中益氣湯加黃芩山梔而愈。

一婦人遍身搔癢。秋冬則劇。脈浮數。此風邪客於皮膚而然也。名曰血風。飲以消風散及搽蛇床子散少可。更以四物湯加荆防數劑而愈。一婦患此。夏月尤甚。脈洪大。以何首烏散一。婦患赤斑瘡。搔破成瘍。出水久而不愈。內服當歸飲。外搽蛇床子散。並愈。又一婦患此。諸藥不應。以四生

散數服而愈。大抵婦人體虛，風邪客於皮膚，則成白癬。寒溼客於肌肉，鬱熱而爲赤癩。色雖有異，治法頗同。凡人汗出，不可露臥及浴。經云：汗出見溼，乃生瘡痏。雷公云：遍身風癬，酒調生側柏用之，屢驗。

瘡痏

薛立齋治一男子，遍身瘡痏，後成瘡，出水，酒漬惡寒，皮膚皴起，眉毛漸落，大便秘結，小便赤少。此屬肺火爲患，用補氣瀉榮湯四劑，諸症漸退。但倦怠惡寒，小便清少，此邪氣去而真氣虛也。用補中益氣湯，兼換肌散，半載元氣復而諸

症退時中秋忽大便不實小便頻數體倦食少酒漸體重此溼邪乘虛而作用東垣益胃湯二劑頓安仍用前藥調理三月餘全愈。

一男子兩目俱赤遍身癢痛搔起白皮此肝肺陰虛誤服驅風燥劑鼻赤面紫身發疙瘩搔出血水用升麻湯下瀉青丸數服又用加味逍遙散數劑身鼻漸白疙瘩漸消又用四物湯加參耆柴胡山梔并換肌散各百餘服喜其年少謹疾全愈

一婦人日晡身癢外內用追毒祛風之劑膿水淋漓午前畏寒午後發熱殊類癘風用補中益氣湯加山梔鈎藤又以

加味逍遙散加川芎而愈

一婦人手心赤搔癢發熱頭暈作渴晡甚服祛風清熱之藥
膚見赤痕月經過期用加味逍遙散倍熟地熱止癢退更
以四物湯加柴胡參耆炙草茯苓頭清渴止再用四物湯
加參朮茯苓山梔赤暉亦消

一男子患瘡癰破而成瘍如大麻風服遇仙丹發熱作渴大
便秘結脈沈實右關爲甚此熱畜於內也先用黃連內疎
湯而大便通利又用防風通聖散去硝黃而熱渴止却用
八珍湯而瘍愈

一男子脾腎氣虛血熱遍身搔癢時喜熱水浴之後患瘡癰

破而出水用風藥益甚或赤或白眼作花癢先用胡麻散六味丸而痊次年兩股小腹頸項復作癢用四生散六味丸而愈。

一婦人經水先期勞役或氣惱則寒熱瘡癢服祛風降火等藥不勞怒而白癢發熱更加痰喘氣促服化痰清氣之藥形氣倦怠食少胸痞身發瘡疹服消毒之類膿水淋漓服大麻風藥口乾作渴欲水而不敢飲經水又過期眉間若動又復月餘眉毛脫落經水淋漓此心肝二經風熱相搏制金不能平木木克脾土而不能統血肝火旺而不能藏血也經云水生木遂朝用地黃丸以滋腎水生肝血夕用

加味逍遙散。以清肝火。生肝血。月餘諸症漸愈。又佐以四君芎歸丹皮。月餘而經水旬日而止。又兩月餘。經水五十餘日而至。乃夕用五味異功散。加當歸。服兩月。經水四十餘日而至。因怒寒熱。經水如崩眉稜角動脈洪數弦。肝脾二脈爲甚。用柴胡梔子散二劑。以平肝火。用五味異功散二劑。以補脾氣。發熱頓退。經水頓止。更以八珍湯倍加參丸及地黃丸。兩月餘經水如期。眉毛漸生。因食停滯。腹脹作痛。另服祛逐劑。泄瀉不止。小腹重墜。飲食甚少。先用六君子湯送四神丸。數劑。瀉漸止。飲食少進。又用補中益氣湯。倍用升麻。數劑。瀉漸愈。後因勞心。發熱。飲食難化。嘔

吐涎水。其熱自臍上起。覺飢熱頻作。乃用六君子湯加炮
薑治之。熱時飲稠米湯稍安。兩月餘又常服加味歸脾補
中益氣二湯而痊。

一婦人秋間肢體作瘡。時發寒熱。日晡熱甚。口苦喜酸。月水
先期。面色常青。熱甚則赤。恪服清熱涼血。後發瘧瘈。赤瘈
益甚。乃清熱敗毒。破而膿水淋漓。謂此肝脾血虛燥不信。
仍治瘡毒。其瘡益甚。形氣倦怠。飲食減少。先用補中益氣
湯。間佐以六君當歸元氣。稍復乃以八珍湯。倍用參朮。少
用川芎白芍。間佐以補中益氣湯。諸症漸愈。又以四君子
湯。佐以加味逍遙散。兩月餘。膿水漸少。又復月餘。瘡漸結

屬因怒寒熱腹脹飲食少思患處復甚。用六君子湯加山梔柴胡。乃用四君子湯爲主。而瘡漸愈。又因怒月經甚多。發熱作渴。瘡痛出血。用柴胡清肝散。熱退止痛。仍用四君子湯而結屬。又用八珍湯。山梔丹皮而愈。

一婦人遍身瘡癩。膿水淋漓。發熱。身如蟲行。月經不調。先用升麻湯送瀉一丸。熱癩頓退。又用加味逍遙散。經行如期。用換肌丸。而瘡愈後。因怒經行不止。筋骨作痛。用秦艽地黃湯。易老祛風丸而愈。

一婦人性沈靜。懷抱不樂。月經過期。遍身作癢。服祛風清火之劑。搔破成瘡。出水不止。其癢益甚。或用消風散之類。眉

稜跳動，眉毛折落。又服遇仙散，患處俱潰，咳嗽發熱，飲食日少。月經先期，作肝脾鬱怒，而血燥，前藥復傷而益甚。先用四君子，芎歸山梔丹皮，飲食漸進，服月餘而嗽止。又以加味逍遙散，加鈎藤二十餘劑，而眉不動。乃去鈎藤，倍加參朮，當歸月餘，瘡結膿叉以八珍湯加山梔丹皮而痊。一婦人患前症，膿水淋瀝，發熱作渴，體倦惡寒，經水不利，久而不愈。此肝脾虧損而虛熱也。先用補中益氣湯加山梔川芎，而元氣漸復。又用逍遙散，而瘡漸愈。又虛後患疥，遍身作癢，搔起疣瘻，破而出膿，或出血水。誤服醉仙散，殊類風症，用八珍湯數劑而安。又用十全大補湯，患處漸乾矣。

一婦人日晡身癢，素清苦，因肝鬱怒，遍身晡熱，內熱自汗溢。汗月經不行，口乾咽燥，用歸脾湯數劑，諸症稍退。後兼加味逍遙五十餘劑而痊。

一婦人癰癧發熱，日晡益甚，皮膚赤暉，月經過期，此血虛而有熱也。以逍遙散倍加熟地，熟地止癢退。更以四物加柴胡參耆炙草茯苓，調理而愈。

一婦人懷抱久鬱，患前症，膿水淋漓，服連翹消毒散，食少胸痞，服清氣化痰丸，作嘔吐痰，服清熱化痰丸，煩熱畏寒，四肢焮熱，面目赤色，脈大而無力，此脾胃虧損，而虛寒隔陽，氣于外。遂用六君子湯加炮薑治之，諸症少愈，飲食頓進。

又佐以四物湯。諸症漸愈。又以四君子。每味各一錢。四物湯每味各五分。諸症全愈。

一婦人每秋間兩手心作癢。搔起白屑。因勞役惱怒。則發寒熱。遍身作癢。起疣瘩。或以爲風症。內服花蛇等藥。外敷硫黃之類。又服遇仙丹。諸熱渴益甚。月水不通。謂脾肝二經血燥生風。先用加味逍遙散。熱渴漸減。又用八珍柴胡山梔。患處少可。後因怒氣發熱。腸痛。患處焮腫。用加味逍遙散。四劑而安。又用四君芎歸山梔丹皮。至半載而痊。

一男子遍身瘡癩。諸藥不效。脈浮。按之而澁。以生血藥爲主。間以益氣百貼而愈。

宋生遍身作癢搔破成瘡出水脈浮數此手足陽明經風熱所致以人參敗毒散對四物湯加芩連服之外以松香一兩枯礬五錢輕粉三錢爲末麻油調敷月餘而愈又一人患此但脈沈以前藥加大黃治之漸愈再服人參敗毒散而平

黃錦芳治一僧身癢異常服驅風敗毒藥不愈診其脉左手俱平靜惟脾脉湧突異常詢得飲食無味飽脹時嘔此內氣不清而濁邪外溢於經絡也用茯苓三錢半夏二錢木香八分廣皮五分川厚朴一錢日服二劑遂愈

瘡癩

陸肖恩治徐邑宰秋未冬初遍身生癩大小不一紅痛焮瘡
黃水淋漓或謂風熱用防風通聖數劑不減或謂諸痛瘡
瘍皆屬心火用芩連山梔生地等十劑益甚且飲食漸減
脈之浮按微數沈按中按皆緩而弱曰凡風熱大都爲瘧
疹未必爲瘡癩至瘡瘍之爲心火經固言之第脉微弱爲
多此元氣不足也緩者濕也數雖爲熱而微數不可純責
之火據今日之症火爲標溼爲本原得病之由又溼爲標
元氣不足爲本此必乘虛汗出深浴溼漬肉腠久而熱蝕

爲膿水。發爲痛瘡也。用蒼朮薏仁茯苓燥溼爲君。人參白朮黃芪甘草補氣爲臣。連翹蟬退清熱爲佐。葛根白芷入陽明肌肉爲使。二劑痛瘡頓減。胃少開十劑全愈。

張子和治頸臙韓吉卿自髀至足生溼瘡大者如錢小者如豆癰則搔破水到則浸淫類虫行袴襪愈而復生瘢痕成四十餘年不瘥。張哂之曰此溼瘡瘍也。由水溼而得故多在足下。以舟車濟川大下十餘行一去如掃。

一省掾背項常有瘻瘍愈而復生張曰太陽血有餘也。先令涌泄之。次于委中銛鍼出紫血病更不復作也。張君袁常喜熱火烘灼其背及兩足。又食自死肉久而兩足常生瘍。

毒愈而復生。半月餘以清涼飲子下之得紫黑血積于便中去者月餘其積毒頓除。是知積執毒致癰腫者如此。

薛立齋治春元沈霓川之內暑月面生瘡癰乘涼入風面目浮腫越二日左臂腫痛癰疼如丹背脇髀股等處發腫塊三四肉色不紅痛甚晝夜號呼寒熱往來飲食不思服活命飲及行氣敗毒之劑其勢愈熾肝脉浮濶脾脉弦弱此屬二經榮氣不從風邪乘虛流注經絡爲患先以八珍加黃芪柴胡青皮數處漸漸紅熾又以十全大補加銀花白芷龍膽草貝母十餘劑脇腿二處潰膿碗許餘塊漸平仍服十全大補湯調理月餘而安向使專于祛風攻毒鮮不

敗事矣

張仲安治凍瘡用黃柏燒存性研細以雞子清調敷破者乾
癬上神妙。

治暑月肌膚瘡爛或因搔成瘡多是大暑汗出坐卧溼地致
肌膚多瘡爛汁出有一乳母曰此易瘥也取乾壁細土末
敷之隨手卽瘥。

治一切惡瘡遍用藥不效者陳米飯緊作團火煅存性麻油
膩粉調敷蘇滔光丁亥年耳上病碎瘡或痛或癢兩月餘
百藥不效季倅子長傳此方初不之信試用之果日卽愈。
辛丑年再作呂仲發顯謨云此症夏以痰飲法治之故只

用肥皂燒存性。生油膩粉調敷尤佳。

薛立齋治一男子年四十三歲。自四十已來。每至夏發熱而倦。日午益甚。晚涼少可。面生瘡癰。耳下筋微腫。更結小核三四枚。附筋上。曰此火令不慎房營。虧損腎水。不能制火然也。名曰注夏。彼不信。服降火敗毒藥。加口乾倦怠。夜間熱甚。午後腿軟足心熱。筋牽痛。復來問治。曰口乾倦怠。此中氣陷下也。夜間發熱。陽氣陷于陰分也。午後腿痠足熱。陰虛火甚也。耳下筋牽痛。血虛不能潤筋也。先以補中益氣湯。少用柴胡升麻。加五味麥冬。熟地治之。諸症頓退。更服滋腎丸而痊。若以每至火令而然。用敗毒涼藥。鮮不危。

矣。凡春末夏初患頭痛脚軟食少體熱此仲景云春夏劇秋冬瘥而脈弦大者正世俗所謂注夏病也

趙州守北方人年踰四十頭面生瘡瘍數枚焮痛飲冷積日不潰服清熱消毒藥不應診其脈數按之則實以防風通聖散二劑頓退又以荆防敗毒散而愈又一男子患在四肢審其脉症亦屬有餘以黃連解毒湯治之亦愈

繆仲淳治一婦人生癰臂上用連翹白芷白芨花粉各二錢甘菊一兩紫花地丁金銀花各五錢甘草生地茜草各三錢地榆四錢角刺牛蒡各一錢服之半日立出膿血而愈

又治一男子生癰膝下加牛膝三錢立破出鮮血愈

廣筆記

丁右武親驗坐板瘡方。松香五錢雄黃一錢均研細。如濕痒加蒼朮三錢。各末和勻。以絲紙包裹。撲成紙燃二條。臘月猪油浸透。點火燒著。取滴下油搽上立效。全上

立齋治一男子年逾四十。胃氣素弱。面常生瘡。盜汗發熱。用黃芪建中湯少愈。更以補中益氣湯而平。東垣云氣虛則腠理不密。邪氣從之逆于肉裏。故多生瘡。若以甘溫之劑。寢其根本。則腠理自固。卽無他疾。

張生患漆瘡作嘔。由中氣弱。漆毒侵之。以六君子湯加砂仁。藿香酒芍治之。彼不信。另服連翹消毒散。嘔果盛。復求治。仍以前藥。外以麻油調鍤鏞末塗之而愈。

趙千兵患兩腿生瘡，每服敗毒藥，則飲食無味，反增腫脹。此脾虛濕熱下注也。以六君子湯加蒼朮升麻酒芍服之，以黃蠟麻油各一兩，輕粉三錢爲膏貼之而愈。大凡下部生瘡，雖屬溼熱，未有不因脾腎虛而得者。

一男子溼熱下注，兩腿生瘡，以人參敗毒散加蒼朮黃柏服之以金黃散敷貼。又一人患此久而不愈，以船板灰存性一兩，輕粉三錢爲散，麻油調敷，更以黃柏知母防已龍膽草茯苓當歸川芎黃芪白朮服之亦愈。若人兩腿作痛，或遍身作痛，以當歸枯痛湯治之。

一婦人兩腿腕紫黯寸許，搔破出水，或用祛風砭血之劑，筆

餘漸平如掌乃服草烏等劑遍身瘙痒有時出血水內熱體倦飲食無味月經三月一至脈洪而數按之則澀此燥劑愈傷脾血也先以補中益氣湯加白芍川芎五味十餘劑乃與加味道遙散加熟地鈞藤二十餘劑再用歸脾湯加川芎熟地治之而不發

一婦人素清苦四肢似癬疥作痒出水怒則起赤暈服祛風敗毒等劑赤暈成瘡膿水淋漓晡熱內熱自汗盜汗月經不行口乾咽喉腫痛此鬱傷脾血也用歸脾湯逍遙散兩月而痊

一儒者素食膏梁發熱作渴飲冷患瘡如大麻風大便出黑

血服清熱祛風等寒藥益甚。謂血分有熱火也。故寒之不
寒。用四物二連湯以清熱涼血。用六味丸以補腎生水而
熱退。又用柴胡梔子散調理而痊。

一婦人性急善怒。月經不調。內熱口苦。患時瘡。服敗毒藥。膿
水淋漓。熱渴頭痛。日晡益甚。用加味逍遙散服之漸愈。因
大怒月經如湧。眼赤出淚。用四物湯加山梔柴胡芩連數
劑而愈。年餘手足臂腕起白點漸大。搔起白屑。內熱盜汗。
月經兩月餘一至。忽怒或惡寒。頭痛或胸乳作脹。或腹內
作痛。或小便見血。或小水不利。或白帶下注。此皆肝木制
伏脾土。元氣虛而變症也。用補中益氣湯加黑山梔。及加

味歸脾湯間服半年而愈。

一婦人久鬱恚在四肢，腿腕尤甚。誤用敗毒寒涼之劑，晡熱內熱自汗盜汗，月經不行，口乾咽燥。此鬱火傷脾也。用歸脾湯數劑後，兼服逍遙散，五十餘劑而痊。

劉松篁經驗方云：會水灣陳玉田妻患天蛇毒瘡，一老翁用水蛇一條去頭尾，取中截如手足指長，刮去骨肉，勿令病者見。以蛇皮包手指，自然束緊。以紙外裹之，頓覺遍身皆涼。其病即愈。數日後解視，手指有一溝如小蠅，蛇皮內宛然有一小蛇頭目俱全也。木草綱目

孫思邈以貞觀五年七月十五日夜，以左手中指觸著庭木，

至曉遂患痛不可忍。經十日痛日深。瘡日高大色如熟小豆色。嘗聞長者論有此方。遂用治之。手下卽愈。痛亦除。瘡亦卽瘥。未十日而復如故。方用蒲公英搗爛取汁塗之愈。

全上

張子和曰。麻先生妻病足指痛不可忍。酒調通經散一錢半。夜先吐。吐畢而痛減。余因歎曰。向見陳五曾病此。醫以爲小蟲傷。或以草上有毒物觸之。遷延數月。膿盡方已。今日觀方可發大笑。

王思中治一人患瘡疹。陰囊腫脹如斗升。不能跬步。王曰。此瘡蠱也。就外科劑中加麥稈四十九莖。遂消。吳江縣志

戊申之水乃二百餘年創見之變人足浸水中數日卽皮破
生瘡痛不可忍一法取水荆條煎水浴之立愈續金陵
瑣事

梁谿一男子生瘡膝下楚甚仲淳適至卽于席間作劑服之
飲酒數杯瘡立破出鮮血愈連翹三錢白芷二錢粉甘草
水炙三錢金銀花五錢牛膝三錢生地三錢地榆四錢皂
刺一錢風粘子酒炒研一錢

瘡症

魏玉橫治吳性全忽患症如癰風眉毛脫落面額褪皮皮去
肉色又如白癬風耳前後目上下多生小瘡乳旁及腮上

亦有頗多曠血，往時久病喘，予以養肝之劑愈之。自是足趾縫及兩旁常作痒，出稠水及面瘡既發，足疾頓愈。有指爲風者，有指爲溼者，指爲牛皮癬、大麻風者，幸渠素不輕藥，守至數月不愈，乃就診。余曰：前所指皆非也。此卽往時喘之變症耳。良由肝火熾甚，火極似風，上淫于肺，蓋火就燥也。前在經絡則爲喘，今在皮毛則爲瘡。薛立齋謂之瘍瘍瘍類症，治之必五十劑乃瘳。與生地、杞子、蔓仁、赤芍、甘草、麥冬、淨銀花、首烏之屬，出入加減，果五十劑而愈。夫肝木爲龍，龍之變化莫測，其于病也亦然。明者遇內傷症，但求得其本，則其標可按藉而稽矣。此天地古今未洩之秘。

內經微露一言曰肝爲萬病之賊六字而止似聖人亦不欲竟其端矣殆以生殺之柄不可操之人耳余臨症數十年乃始獲之實于慮之一得也世之君子其毋忽諸雄接橫案余謂外感由肺而入內傷從肝而起魏氏長于內傷此言先得我心惟各門附案悉用此法豈生平得意在此而欲獨鑒一職耶

瘍症便秘

薛立齋治一男子患癰久作膿廻痛煩躁便閉脈實用內疎黃連湯二劑諸症悉退以四物湯加芩連四劑而消

一男子瘍症潰後便濇脉浮按之則濇以八珍湯加紅花桃

仁陳皮杏仁治之而愈。

一弱人患瘍潰後便秘而脈濶以四物湯加紅花桃仁黃芪治之而愈。

薛立齋治一男子患瘍潰後便秘而脈浮以四君子湯加陳皮杏仁當歸治之而愈。雄按此症宜養血

一老人患瘍潰後大便秘小便赤澀診之脈浮數而澀以八珍湯加知柏治之而愈後小便復數而赤大便秘日乾目花以加減八味丸滋腎九治之而愈此症乃陰血虛陽火盛故用前藥有效若投苦寒之劑必致有誤矣

一男子患瘍潰後便瀉肌膚作痒謂氣血虛不能營于腠理

用補劑治之不信。乃服風藥致不救。大抵瘡瘍始作。便秘脈數而濇者。宜降火涼血爲主。潰後便秘脈濇者。宜補血氣爲主。若投風藥禍在反掌。

鄺進士患癱將瘻大便秘結。服大黃等藥反廢飲食。乃用補氣血之劑。加桃仁麻仁未效。更以猪膽汁深納穀道。續以養氣血而愈。原病式云。諸瀝枯涸。皆屬於燥。燥者火之病氣。病後血衰。故大便秘澀。宜以辛甘潤之。如用苦寒。則胃氣乏矣。凡老弱產後便難者。皆氣血虛也。膽汁最效。

腎臟風

薛立齋治一男子患腎臟風，飲燒酒，發青暈，砭出血，敷追毒之藥成瘡，出水日晡益甚。類大麻風，服遇仙丹，眉毛折落，大便下血，虛羸內熱，飲食甚少，勢誠可畏。先用聖濟犀角地黃湯，其血漸止。又用五味異功散，加當歸升麻，飲食漸進。用四物加參朮丹皮，內熱漸減。用易老祛風丸，膿水漸少。又以八珍丹皮之類漸結膿。因思慮發熱，盜汗作痒，赤暈，用加味歸脾湯數劑，熱漸止。用加味逍遙散六味丸而痊。

一男子遍身生瘡，膿水淋漓，晡熱口乾，兩足發熱，形體消瘦，補服風藥六年未愈，尺脉洪數，而腎經瘡也。如小兒腎瘡。

之疹用加減八味丸不半載而痊

一男子遍身生瘡似疥非疥濃水淋漓兩腿尤甚作痒煩熱肢體倦怠年餘不愈以爲腎經虛火用加減八味丸而卽痊

一男子素膏梁醇酒患腎臟風延及遍身服癟藥益甚又用擦藥於被中薰之嘔吐腹脹遍身浮腫潰爛膿水淋漓如無皮而死

一男子患足三陰虛患血風瘡症誤服祛風敗毒之藥外敷班猫巴豆等藥肌肉潰爛嘔吐腹膨或泄瀉虛冷或煩熱作渴此症係脾胃虛敗也辭不治不越月歿

一男子患遍身小瘡或時作痒口乾作渴服消風散起赤痒
益甚服遇仙丹膿水淋漓飲食無度肌肉消瘦尺脈洪數
左尺尤甚謂腎水不足虛火上炎爲患先用加減八味丸
其渴漸止用補中益氣湯加五味肌肉漸生佐以八珍湯
加丹皮麥冬百餘貼而痊一年後不節房勞其瘡復作惑
於人言又服消風散之類其瘡復患仍用前藥不一月而

痊

一男子內廉作痒色黯搔起白皮各砭刺出血其痒益甚更
起赤暈延及外廉津淫不已服怯風之藥肢體亦然作渴
引飲左尺脈洪大而數無力謂此腎經虛火復傷其血火

益甚而患耳先以八珍湯加五味子丹皮三十餘劑諸症漸退乃佐以加減八味丸料又百餘劑而痊

劉鴻腿生濕瘡數年不愈尺脈輕診似大重按無力此腎氣虛風邪襲之而然名曰腎臟風瘡以四生湯治之不信自服芩連等藥遂致氣血日弱膿水愈多形症愈篤追二年復求治仍以前藥治之而愈夫肢體有上下臟腑有虛實世之患者但知苦寒之藥能消瘡毒殊不知腎臟風因腎氣不足所致當以蒺藜爲君黃芪爲臣白附子獨活爲佐使若再服敗毒等藥則愈耗元氣速其死矣

瘡風

竇材治一人病癰症，鬚眉盡落，面目赤腫，手足悉成瘡痍，令灸肺俞心俞二穴各十壯，服換骨散一料，一月全愈，鬚眉更生。

雄按竇氏治中風用換骨丹治癰風用換骨散此與第
三條所用皆是換骨散。

一人遍身赤腫如錐刺，竇曰：汝病易治，灸心俞肺俞二穴各一百壯，服胡麻散二服而愈。手足微不隨，復灸前穴五十壯，又服胡麻散二料全愈。雄按胡麻散用黑脂麻紫浮萍薄荷牛蒡子甘草竇氏方

此最
平穩

一人面上黑腫。左耳下起雲紫如盤蛇。肌肉中如刀刺。手足不知痛。詢其所以。因同僚邀遊。醉卧三日。覺左臂黑腫如蛇形。服風藥漸減。今又發。竇曰。非風也。乃溼氣客五臟之俞穴。前服風藥。乃風勝濕。故當暫好。然毒根未去。令炙腎俞二穴各百壯。服換骨丹一料。全愈。面色光潤如故。

張子和治桑惠民病。面風黑色。畏風不敢出。爬搔不已。眉毛脫落。作癩。治三年。張曰。非癩也。乃出素問風論曰。腎風之狀。多汗惡風。脊痛不能正立。其色焰面龐浮腫。今公之病。腎風也。宜先刺其面。大出血。其血當如墨色。三刺血變色。

矣。千是下針自額上下鉗針直至頭頂，皆出血黑如墨色。徧腫處皆針之，惟不針目銳，皆外兩旁，蓋少陽經此少血多氣也。隔日又針之，血色乃紫。二日外又刺，其血色變赤，初針時痒，再刺則額覺痛。三刺其痛不可在，蓋邪退而然也。待二十餘日，又輕刺一遍方已。每刺必以水洗其面。十日黑色退，一月面稍赤，三月乃紅白。但不服除根，下熱之藥病再作。張在東方，無能治者。雄按今更無能治之人矣，然不可不知有此證。

吳恕學如心錢塘人，博極羣書，少貧，貲烏蛇丸治瘋疾，時乘采風使適有患此疾者，召恕與談，驚服其議論，遂委托治

之，疾果愈。

杭州府志

秘韞治大風用大烏蛇一條打死盛之待爛以水二碗浸七日去皮骨入糙米一升浸一日晒乾用白雞一只餓一日以米飼之待毛羽脫去殺雞煮熟食以酒喫盡以熱湯一益洗大半日其瘋自愈

本草綱目

王海藏云王氏患大瘋病眉髮墮落掌內生瘡服紫苑丸半月瀉出癩蟲二升如馬尾長寸許紫苑丸吳茱萸菖蒲柴胡厚朴各一兩桔梗茯苓皂莢桂枝乾薑黃連蜀椒巴豆去皮膜肉油炒人參各五錢川烏三錢加羌活獨活防風各一錢蜜丸桐子大每服三丸漸加至五丸七丸生姜湯送下食後臨卧服孕婦服忌之此方治病甚多不能悉錄

周子固治王君海子病癰，眾醫莫能療。周授已七藥漱之，牙齦出穢血數升。既而形盡瘦骨立。後第以美味補之，數月

瘥。九靈山房集

薛立齋治一男子，冬間口苦耳鳴，陰囊濕痒，來春面發紫塊，微腫麻木。至冬遍身色紫，不知痛痒。至春紫處俱大。至夏漸潰，又至春眉落指潰。此患在肝胆二經。令刺手指縫，并臂腿腕出黑血。先與再造散二服，下毒穢，更以小柴胡合四物湯加白芷防風天麻角刺漸愈。又與換肌散，但遍體微赤，此血虛有火。因家貧未得調理。秋間發熱，至春面仍發塊。用前散并養血藥。喜年少謹疾得愈。

一膏梁之人鼻壞眉落指脫體潰熱渴晡甚四物湯加炒黑
知柏五味麥冬白芷天麻角刺三十餘劑熱渴少止時仲
夏精神倦忘氣喘身熱小便黃澀大便稀溏此元氣虛而
時熱勝也用補中益氣湯頓安乃與換肌散及益氣湯兼
服兩月更以生肌散代茶飲瘡少退至仲秋眩暉少食自
汗體重大便溏稀此亦時溼之症用清燥湯調理而愈又
用補中益氣湯少加酒炒黑知柏角刺天麻兩月餘而痊。
又因勞傷倦聾瞶熱渴誤服祛風藥病氣益劇身發赤疹。
與益氣聰明湯月許而愈大麻風症先麻木不仁次發紅班久則破爛浮腫無膿蓋皮死骨死鼻梁崩塌也又癲風症初起水泡作癢成瘡破流脂

水癆至澈骨久則成片傳及遍身好浴熱湯徐靈胎曰大
麻風症總屬不治遷延歲月則有之然患此者絕少若稍
似風症並非真風醫者竟以治風之惡藥治之反傷敗氣
血變成風症此等最多不可不知又曰癩風之症有似大
麻風而毒氣不深全在肌肉故尙可治喻嘉言曰治癩風
以清榮衛爲主汗宜頻發血宜頻刺皆清榮衛之捷法也
生虫由於肺熱宜兼清肺然清肺亦必先清榮衛蓋榮衛
之氣隔而不清傳入於肺先害其清肅之令故也治宜生
血清熱爲主驅風殺虫爲輔易老祛風九東坡四神丹最
爲平善可以久服取效奉以爲法焉祛風九黃芪枳壳防
風拘杞子白芍甘草地骨皮生地熟地等分蜜丸
四神丹羌活元參當歸生地等分或煎或丸服

一男子赤痛熱渴、膿水淋漓、心煩掌熱、目昧語澀、怔忡不寧、
此心經受症也。用安神丸兼八珍湯少加木通炒黑黃連
遠志。元氣漸復。卻行砭刺外邪漸退。但便燥作渴。用柴胡
飲并八珍湯而愈。再用換肌散劑而瘥。

一男子肚見赤筋，面起紫泡，發熱作渴，寅卯時甚，脈弦數，腿轉筋小便濇，此肝經火症。先用柴胡飲，熱退便利。卻用小柴胡合四物湯加龍膽草炒山梔三十餘劑，及八珍湯加柴胡山梔，調其血氣，乃用換肌散去其內毒而安。年餘因勞役飲食失宜，寒熱頭痛遍身赤疹，自用醉仙散而歿。

一男子面發紫疙瘩，膿水淋漓，睡中搐搦，遍身麻木，漸發赤塊，勞則麻，怒則癢，肝脈洪大，砭刺臂腿腕各出血，用清胃湯加大黃角刺四劑煎下，瀉青丸。肝脉少退，以升麻湯數劑下前丸。諸症少愈，卻用寶鑑換骨散斤許，又用小柴胡合四物湯加倉朮天麻角刺百餘劑，及六味地黃丸半載。

而愈後因勞遍身麻痺。脉微而遲此氣血俱虛。不能榮於
腠理用十全大補湯加五味麥冬。調理年餘而安。
一男子面赤發紫泡下體痒痛午後發熱大便燥黑此火盛
而血虛也。用再造散及四物湯加防已膽草及刺腿指縫
出毒血而便利。仍以前藥加白朮白芷茯苓羌獨活而便
黃仍以四物去膽草防已少用獨活加元參草薢五十餘
劑而瘡退却用補中益氣湯加天麻麥冬而氣血漸充時
仲秋霖雨遍身痠痛用清燥湯而安隨用換肌散胡麻散
八珍湯兼服而愈。

上舍面發腫肌如癰後變疣瘡色紫搔之出水此脾肺之

症也。先用清胃湯。以清胃熱而解表毒。又用四物湯。加山梔黃芩。柴胡角刺。甘草節。以養陰血祛風熱。又砭臂腿腕手足指縫。并患處。以出毒血。疎通隧道。乃與八珍湯。加白芷角刺五加皮全蝎。及二聖散。兼服月餘。以養陰血。治瘡毒。又與補氣瀉榮湯少愈。再與換肌散。而全愈。後因勞倦。遂發赤暈。日晡尤甚。以四物湯加丹皮。柴胡。山梔。并用補中益氣湯。年餘雖勞而不發。

一男子遍身如癬。搔癢成瘡。色紫麻木。搘之則痛小。便數而少。此脾胃受症。邪多在表。用清胃散。更砭刺患處。并臂腿腕。出黑血。神思漸爽。但惡寒體倦。口乾。此邪氣去而真氣

虛也。以大劑參芪芎歸蒺藜桔梗數劑元氣頓復。卻用八珍湯加黃芪白芷蒺藜天麻軟柴胡及二聖散治之。其瘡漸愈。後用換肌散八珍湯等藥調理半載而瘡後症仍發誤用尅伐攻毒。患兩感傷寒而死。

一男子遍身疙瘩。搔則痒。掐則痛。便閉作渴。此邪在內也。治以再造散二服微下三次。用桃仁承氣湯加當歸四劑。及砭出黑血。漸加痛痒。但形體倦怠。用培養之劑。復其元氣。又用二聖散。其瘡頓愈。更用大補年餘而康。後患痰涎壅盛。舌強語塞。用二陳湯。蒼朮知柏澤瀉數劑而愈。再用補

中益氣湯調理而安。

一男子素清苦。眉盡落。病在肝膽二經也。乃刺臂腮腕。及患處出黑血。空心服八珍湯。加五味胡麻首烏威靈。食後服換肌散。喜其無兼變之症。又能篤守禁忌。不半年而愈。

一儒者脚心或痒痛。或麻癢腫脹。二年後身體作痒。漸變疙瘩。發熱耳鳴。日晡益甚。此屬腎虛也。乃砭刺臂腮腕及手足指縫。去其瘀血。用六味地黃丸料。加五味柴胡五十餘劑。以補腎。又用換肌散。祛風丸各斤許。以治瘡漸愈。得滋補。守禁而痊。

一上舍遍身患之形病。俱虛謂須調補元氣。完復方治其瘡。不信。恪服蛇酒。以攻內毒。更敷砒霜等藥。以蝕外毒。頓加

嘔吐清水。體痛如錐。或以爲毒氣外發。不知脾主肌肉。此因毒藥傷脾而然也。反服祛毒之劑。吐瀉不止而歿。

一男子患癲風。用~~火~~熏洗。汗出不止。喘漱不食。腹鳴足冷。肢體抽搐。謂此因~~熱~~傷元氣。腠理不密。汗出亡陽耳。是日

果卒

下疳

此症與梅瘡無甚差別

丹溪治一隣人。年三十餘性狡而躁。素患下疳瘡。或作或止。夏初患白痢。膈上微悶。醫與理中湯四帖。昏悶若死。片時而甦。脉之兩手皆澀重。取畧弦似數。曰此下疳瘡之深重。

者與當歸龍蒼丸去麝四帖而利減與小柴胡去半夏加黃連白芍川芎生薑煎服五六帖而安。

薛立齋治一男子下疳腫痛不消一男子潰而腫痛發熱小便祕澀日晡或熱一小兒腫痛諸藥不應俱以小柴胡湯吞蘆蒼丸數服而愈。

一小兒十五歲患前症雜用消毒之藥虛冷悉具三年餘矣詢之乃稟受所致用草薢湯月餘諸症漸愈又用補陰八珍湯補中益氣湯而瘥。

一男子陽事腫痛小便如淋自汗甚苦或尿血少許尺脈洪數按之則澀先用清心蓮子飲加牛膝山梔黃柏知母柴

胡數劑。更以滋腎丸一劑而痊。王機微義曰。如自汗。小便自少。若再利之。則榮衛枯竭。無以制火。而煩熱愈甚。當俟熱退汗止。小便自行也。兼此症乃陽明經病。大忌利小便。張景岳治一少年。因偶觸礦毒。遽患下疳。始潰龜莖。敷治不效。旋從馬口延入尿管。以漸而深。真直至肛門。逐節腫痛。形如魚骨。每過夜則膿結馬口。脹不得出。潤而通之。則先膿後尿。敷洗皆不能及。張嘗遇一山叟。傳得槐花蓋方。因以治之。不十日。莖根漸愈。半月後。自內達外。退至馬口而痊。後現些微廣瘡。復與五加皮飲。十餘劑而愈。向傳方者曰。此方善治淫瘍。熱毒從小便泄去。且服此者可免終身。

瘡毒後患。然猶有解毒奇驗。則在發瘡之時。但見通身忽有雲井紅斑。數日而沒者。即皆瘡毒應發之處。瘡毒已解。瘡形猶見。是其驗也。張初未之信。及此人應發瘡之時。固不多。而通身紅斑果見。凡兩日而消。方在新因陣四十

立齋治州守姜節甫患下疳。膿水淋漓。作渴吐痰。午前惡寒。午後發熱。曰。午前惡寒。屬陽氣虛弱。午後發熱。屬陰血不足。不信。反服二陳知柏之類。飲食益少。大便不實。又目晡熱渴。小腹重墜。患虛廩腫。服四物知柏之類。飲食不思。此脾氣虛而下陷。先用補中益氣湯調養脾胃。以升陽氣。諸症漸愈。又用六味丸滋補腎水。以生肝血而痊。

一男子患下疳腫硬焮痛寒熱先以人參敗毒散二劑而止更以小柴湯加黃連青皮治之而愈。

一男子患下疳潰而腫痛小便赤澀以加減龍膽瀉肝湯加青皮黃連二劑少愈又以小柴胡湯加知柏當歸茯苓數劑而愈。

一男子因勞瘵竅作痒時出曰物發熱口乾以清心蓮子飲治之而安。

一男子患下疳潰而腫痛發熱日晡尤甚以小柴胡湯加黃連知母當歸而愈。

一男子患下疳已愈惟竅中一塊不散以小柴胡湯加青皮

荆防服之。更以荆防牛膝首烏滑石甘草名五錢。煎湯熏洗各數劑而消。

一男子莖中作痛。或筋急縮。或作痒。白物如精。隨溺而下。此筋疝也。並用龍膽瀉肝湯治之。皆愈。張子和曰。遺溺閉癃。陰痿。脬癥。精滑。白淫。皆男子之疝也。不可妄歸之腎冷。若血涸不月。月罷腰膝上熱。足麤隘。乾癃閉。小腹有塊。或定或移。前陰突出。後陰痔核。皆女子之疝也。但女子不謂之疝。而謂之瘕。

一男子下部生瘡。諸藥不應。延及遍身。突腫狀似翻花。筋牽骨痛。至夜尤甚。此肝腎二經溼熱所致。先以導水丸五服。

次以龍膽瀉肝湯數劑。再與除溼健脾之藥。外貼神異膏。
吸其膿血。蒜炙拔其毒而愈。若表實者。以荆防敗毒散。裏
實者。以內疏黃連湯。表裏俱實者。防風通聖散。表裏俱虛
者。八珍湯。氣虛者四君子湯。血虛者四物湯。俱加兼症之
藥治之並愈。瘍科大法畧具于此若服輕粉等藥。反收毒于內。以致
迭發。槩服防風通聖散。氣血愈虛。因而不治者多矣。

繆仲治數友下疳。用黃柏宮粉。膿粉。杏仁珠末。冰片。敷之。
無不愈者。後去膿粉。杏仁。加黃芩。更以大小薊。地骨皮。湯。

洗淨敷之效更良。

廣筆記

又下疳方。橄欖燒灰研細末。繆之。

仲淳治下疳極秘神方用鮮小薊鮮地骨皮各三兩煎濃汁
浸之不三四日卽愈。一切極痛者屢用神效。同上

立齋治一老人患下疳小便淋漓脈細體倦此氣虛兼溼熱
也。用清心蓮子飲及補中益氣湯治之而愈。又一弱人拘
中作痛小便淋瀝此因火燥下焦無血氣不能降而滲泄
之令不行用四物湯加黃柏知母茯苓牛膝木通十餘帖
痛止便利先君氣短拘中若瘡小便不通用四物湯加參
芪煎吞滋腎丸而愈蓋前症以虛爲本以病爲末益其本
則未自去設若不固元氣專攻其病害滋深矣。

王錦衣年逾四十素有疳瘡歟痛倦怠用小柴湯加黃連黃

柏青皮當歸而愈。

繆仲淳治下疳方。蟬退七分。白僵蚕用紫蘇葉包蜜炙七個。
杏仁去皮尖七粒。芭蕉根搗爛五錢。獨核肥皂仁七粒。雪
裏紅一把。打爛土茯苓去皮二兩。白蘚皮一錢。牛膝二錢。
黃柏一錢。木通七分。皂莢核七粒。薏苡仁二錢。連翹一錢。
漢防杞酒浸六分。甘草節一錢。石斛三錢。柴胡六分。草薢
二錢。地骨皮二錢。水煎不拘時餓則服。氣虛脾弱者加蜜
炙黃芪二錢。血虛加生地三錢。

梅瘡

李時珍曰今醫家有搜風解毒湯治楊梅瘡不犯輕粉病深者月餘淺者半月卽愈。服輕粉藥筋骨攀痛癱瘓不能動履者服之亦效。其方用土茯苓一兩薏仁金銀花防風木瓜木通白蘚皮各五分皂莢子四分氣虛加人參七分血虛加當歸七分水二大碗煎飲一日三服忌飲茶及牛羊雞鷺魚肉燒酒發麵房勞益秘方也。本草綱目 摶臣方當歸五錢淨銀花防風荆芥何首烏勿犯銖器木棒打碎各三錢胞皇子九个打碎土茯苓瓷鋒刮去皮木棒打碎四兩豬脰一具河水六碗瓦器煎濃每早中晚空心溫服一碗恪守禁忌雖年久毒重者二十劑卽收功且無後患此方平淡而有神效也

縣中陳某家有使女生廣瘡求治于方上道人其方只用乾

荷葉一味。煎濃湯當茶。日逐飲之。盡量而止。不過六七日。卽愈。親試甚驗。又一當縣甲首者。生廣瘡。傳方上道人方。用麥母子草根搗汁。和好酒同服。卽愈。其草取竹中無露水者爲上。李翊戒
菴漫筆

馮楚瞻治張姓人。曾患梅瘡。清涼解毒而愈。未幾。忽頭顱面頰牙床鼻柱疼痛不堪。飲食難進。謂餘毒爲害。復用清涼解毒。漸致飲食俱廢。坐卧不寧。精神疲困。六脉微弱。馮曰。果屬陽毒。脉宜洪大。此爲寒涼久服致陰陽失職耳。卽惡瘡初發。亦由精血元陽虧損。斯陰寒凝滯之氣得以乘之。乃與大劑熟地麥冬白朮牛膝五味附子兼八味丸。並服。

半月而愈。

雄按如果涼藥過投，陰寒凝冱為病，而六脉微弱，則當溫煦以培陽氣，何必再用大劑熟地以

滋室
膩哉。

孫文垣治吳東星瘧止腰疼白濁咳嗽肌肉大消百治不應。痛劇欲死。脉之左弦細右滑大俱六至。口渴眼赤知其昔患梅瘧。餘毒尙伏經絡。因瘧後氣血不足。舊毒感動故痛而暴也。以當歸白芍甘草牛膝鈎藤薏仁木通白蘚皮用土茯苓四兩煎湯煎藥服下痛止。嗽脈緩其半數帖大效。精神漸復。冬至日乘酒縱慾。次日腰如束縛。足面疼。左眼赤小水短。足底有火。從兩胯冲上痛不可言。再以歸芍鈎藤甘草牛膝薏仁石斛紅花生地黃柏調理三日症畧減。

適大雪寒。甚有女醫因其大便燥結。一日夜進玄明粉一
兩五錢。大便且不行。而腰痛愈猛。兩足攣縮。氣息奄奄。面
青慘。六脉俱伏。痛使然也。知服玄明粉所致。曰症雖熱。但
病在經絡筋骨間。徒瀉腸胃無益也。足攣腰痛也者。由天
氣寒極經絡凝滯。法當溫散寒邪之標。使痛定。然後治本。
乃用桂心杜仲炙草蒼朮破故紙五加皮二劑痛定。四肢
柔和。飲食始進。囑曰。病在經絡。俟春和始可除之。勿亟也。
不信。更服滋陰降火之劑。兩月無功。再求治。乃以煨腎散
進大瀉五六度。仍是瀉其腸胃矣四肢皆冷。咸以爲瀉之非也。曰
病從此減矣。夫何憂再進理脾藥數帖。神氣遂轉。腰膀柔

和漸能步履。乃以威靈仙末二錢入猪腰內煨食之。又瀉
一二度。審其梅毒溼熱已清。改用薏仁當歸生熟地白芍
牛膝黃柏丹參龜板。調理全安。雄按。煨腎用甘遂或用牽
牛皆通行經絡。不比元明
粉之直走陽明也。繼
煨以靈仙。用意尤妙。

俞東扶曰。此條病情反覆。孫公能隨其病機。曲折以赴之。就
所錄者。已有七次治法。惟始終彙載。方知其中間有效有
不效。乃可垂爲模範。苟逸其半。而存其半。則不知來路之
淵源。未明結局之成敗。何以評讐其是非乎。因不禁慨然
於臨證指南。

朱懷竹壯年客外不謹。患楊梅瘡。恐人知之。欲歸。乃求速愈。

用藥熏洗不瘳。又用藥末點之。日服煎藥三帖。治兩月。每
且入內下。則肛脫瘡滿如蕈。上則肺壅喘甚。胸脹不能仰
卧。內熱惡寒。譫語陰囊疙瘩腫痛。兩足瘡延腫大。脈之俱
洪大而數。曰病重甚。壯年猶可治。第胸中有瘀血毒物。俟
出後乃可與藥。否則反用致疑。另延醫果大發喘嗽。吐紫
黑血塊如膿者碗許。腥穢不可近。此熏藥迫毒入肺。瘀壅
肺竅。喘嗽必俟吐盡。從而消之。斯易爲力也。乃用丹皮桑
白皮白蘚皮木通前胡枳殼桔梗甘草薏仁杏仁葶苈。服
後大便急重。二十餘次。所下黑紫。膿血甚多。喘咳稍定。紅
痰稍淡。二三劑能卧。改用白芍當歸白蘚皮貝母黃連銀

花皂角薏仁麥冬木通二帖足瘡腫漸消陰囊出膿血二
碗。兩尺已不洪大。前方加丹參又二帖囊結疤。三日後落
下厚可半寸。洞見兩丸系一光薄白胞。用紅粉霜加生肌
藥敷之。日三次。膿水乾。再以人參歸芍白芷甘草白蘚皮
皂角薏仁首烏調理一月悉愈。令曰用土茯苓豬肉各半
斤同煎爛。入醬鹽如常食之。湯當茶飲。遂瘳。次年生女。
譚公亮患結毒。醫用五寶丹餌之三年不效。仲濱云。五寶丹
非完方也。無紅鉛靈柴不能奏功。時無紅鉛。姑以松脂鉛
粉麻油調敷。應手而減。公亮先用喬伯珪所贈乳香膏止
痛生肌甚捷。及用此二味功效彌良。乃知方藥中不在珍

貴之劑也。

廣筆記

陸養愚治朱少川，因感冒寒熱咳嗽、筋骨疼痛，服發散之藥寒熱已除，而疼痛咳嗽不止，或以羌活治痛，前杏治嗽，不效，又以其漁色必陰虛，投六味月餘，反口渴異常，身熱疼痛益甚，脈之沈細弦數而有力。因問其曾患梅瘡否，答曰已過矣。曰：此症正其遺毒也。疼痛者毒在經絡骨髓也，咳嗽口渴者，毒火上炎也。用養血解毒之劑，倍土茯苓數劑而減十劑全愈。

薛立齋治一男子遍身皆患梅瘡，左手脉浮而數，以荆防散敗毒散治之，表症乃退。以仙方活命飲六劑漸愈，兼飲蘿

薢湯月餘而愈。

一童子外腎患此症延及小腹數枚作痛發熱以小柴胡湯吞蘆薈丸更貼神異膏月餘而安。

一儒者患前症先外腎作痒出水後陰囊股內小腹脇脣發小瘻或乾或膿窠誤服祛風等藥肢體倦怠惡寒發熱飲食漸減大便不實脉見浮弦兩尺浮數此腎水虛熱肝木乘脾土也用六味地黃丸補中益氣湯爲主佐以換肌消毒散而愈。

一人患此症服攻毒等藥患處凸而色赤作痛肢體倦怠惡寒發熱脈浮而虛此元氣復傷而邪氣實也用補中益氣

湯二劑而愈

追士劉華甫患此症數月用輕粉硃砂等藥頭面背臂各結一塊二寸許潰而形氣消弱寒熱口乾舌燥唇烈小便淋瀝痰涎上湧飲食少思此脾胃傷諸藏弱而虛火動也先用六君子湯二十餘劑又用補中益氣湯加山藥山萸麥冬五味服之胃氣復而諸症愈惟小便未清痰涎未止用加減八味丸而痊

一男子患楊梅瘡後兩腿一臂各潰二寸許一穴膿水淋漓少食不睡久而不愈以八珍湯加棗仁茯神服之每日以蒜搗塗患處炙良久遂貼膏藥數日稍可却用豆豉餅炙

之更服十全大補湯而愈

一婦人患此症皆愈惟兩腿兩廉各爛一塊如掌兼筋攣骨痛三年不愈諸藥無效日晡熱甚飲食少思以草薢湯兼逍遙散倍用茯苓白朮數劑熱止食進貼神異膏更服八珍湯加牛膝杜仲木瓜三十餘劑而愈

薛立齋治一婦人患此症燃輕粉藥于被中熏之致遍身皮塌膿水淋漓不能起居以滑石黃柏萊豆粉末等藥鋪蓆上令可卧更服神功托裏散月餘痊

青浦四十二堡一家娶妾生楊梅瘡遍身潰爛臨終棄之于野一乞丐收養之數日不死女忽思食肉適有數盜在

孟婆墩祭賽丐者乞肉卽與一肩懷歸食婦食未盡者懸之樹枝爲蜈蚣所食毒侵肉中婦食之瘡爲毒發旬日全愈其色更麗子前丐欲送歸婦不許曰我當終身從君矣遂爲伉儷生一子丐者日操舟乞食龍潭其婦言笑不苟亦云賢矣

雲間雜志

立齋治一男子咽間先患及于身服輕粉之劑稍愈已而復發仍服之亦稍愈後大發上脣潰蝕與鼻相通臂腮數枚其狀如桃大潰年餘不歛神思倦怠飲食少思虛症悉具投以草薢湯爲主以健脾胃之劑兼服之月餘而安

一婦人患此症臉鼻俱蝕筋骨作痛脚面與跟各腫一塊三

月而潰，膿水淋漓，半載不斂。治以前藥亦愈。

一男子陰莖患此症腫痛，先以導水丸、龍膽瀉肝湯各四服少愈，再以小柴胡湯加黃柏知母蒼朮五十餘劑而平。

一男子患此症，陰莖腫潰，小便赤澀，肝脉弦數，以小柴胡湯加木通青皮龍膽草四帖，又服龍膽瀉肝湯數貼而全愈。一婦人患此症，焮腫便秘，作渴，脉沉實，以內疎黃連湯二劑裏症已退，以龍膽瀉肝湯數劑頓退，間服萆薢湯月餘而愈。

一男子患此症，發寒熱，便秘作渴，兩手脉實，以防風通聖散治之而退，以荆防敗毒散兼龍膽瀉肝湯愈。

一男子患此症愈後腿腫一塊久而潰爛不斂以蒜搗爛敷患處用艾隔蒜灸之更貼神異膏及服黑丸子並托裏藥兩月而愈。

一男子患此症皆愈但背腫一塊甚硬肉色不變年餘方潰出水三載不愈氣血俱虛飲食少思以六君子湯加當歸藿香三十餘劑少愈更飲草薢湯兩月餘而愈。

一男子患此症勢熾兼脾胃氣血皆虛亦服前藥而痊後不復發。

馬銘鞠治李行甫患痏瘡俗名廣瘡誤用水銀番礮等藥搓五心三日間舌爛齒脫喉潰穢氣滿室吐出腐肉如猪肝色湯

水不入腹脹二便不通醫皆謝去獨用治喉藥吹喉痰壅
愈甚痛難忍幾死馬按其腹不痛雖脹滿未堅猶未及心
知水銀毒入腹未深法宜以鉛收之急用黑鉛斤餘分作
百餘塊加大劑甘桔湯料銀花甘草各用四五兩水二三
十碗鍋內濃煎先取三四碗入湯注中徐灌之任其自流
逾時舌漸轉動口亦漱淨卽令恣飲數盞另取渣再煎連
前濃汁頻灌手足次日二便去黑水無算始安方用吹口
藥及敗毒托裏藥數劑而愈後賈僕有顏孝者亦患徽瘡
誤用水銀熏其症如一。行甫卽以前法治之次日立起。廣
筆

記

廣筆記治嶽瘡方。猪胰脂二兩。金銀花二錢。皂角刺一錢。芭
蕉根一兩。雪裏紅五錢。五加皮二錢。土茯苓白色者二兩。
皂莢子七粒。打碎獨核肥皂仁七粒。切片白殭蚕炙七分。
木瓜一錢。白蘚皮一錢。蟬退一錢。年久力衰者。加薏苡仁
五錢。甘草節二錢。綿黃芪三錢。生地二錢。人參二錢。久不
愈。加胡黃連三錢。胡麻仁二錢。全蝎七枚。水三大碗。煎至
一碗。不拘時餕則服。

廣筆記治結毒方。獨核肥皂仁七粒。雪裏紅一名千年矮一
兩。皂莢子七粒。甘草節一錢。半木瓜錢半。蟬退一錢。青木
香一錢。土茯苓白色者二兩。綿黃芪鹽水炒三錢。連翹一

錢。白殭蚕密炙炒研七分。鱉虱胡麻仁炒研三錢。白芷一
錢。何首烏三錢。金銀花三錢。水煎服。

又方。極木一名十大功勞。一名貓兒殘。卽本草拘骨黑子者是紅子者名樞木。亦可用。取其葉或泡湯或爲末。不住服此方。兼治積年虛勞痰火。健脾進食。

廣筆記云。凡父母正患微瘡時。生兒鮮有完者。其證渾身破爛。自頂至踵。兩目外幾無完膚。日夜號泣。或吐或瀉。似瘧似驚。變態百出。若別作治療。十無一全。治法以牛黃爲君。量加犀角羚羊角硃砂冰片。和入茯苓粉。生密調服。使兒日日利出惡毒。見有他證。隨宜治之。毋亦隨宜用藥。其外

用大粉草金銀花爲極細末。二三升破爛處洗淨。大搘敷之。半月後再易。神效。敷藥再敷數日愈。愈後一兩月當復發。再後兩三月當再復發。發漸輕。仍如法治之。自愈。愈後或口角眉角。或肛門存二三餘毒不必治矣。其渾身或癬或瘡忽聚忽散。敷之便愈。大抵年餘始得除根。若母不禁口。或兒漸大不能禁口。有延至二三年者。然不斃足矣。胎中之毒。徹骨入髓。焉能旦夕除哉。

昇藥五靈散方。膽矾治筋而滋肝。辰砂養血而益心。雄黃長肉而補脾。明矾理脂膏而入肺。滋石染骨而壯腎。此方見焦氏。外加水銀一兩。與前五味等分和勻。入陽城罐內打

火三炷香，取出加入敷藥中用之效。又神效敷藥方：合花
白者良。陰乾象皮同黃砂炒候軟切片再炒候冷方研降
香炒研乳香沒藥各去汗血竭兒茶溼紙包煨花蕊石五
倍子色帶紅者良半生半煅各一兩白占八錢珍珠五錢。
冰片一錢各研極細末方入白占研勻最後入冰片如欲
去腐每兩加五靈散二錢欲生肌每兩加前散三分或五
分如治痘後膿水淋漓下疳等瘡只加一二分治湯火傷
每兩加絲綿灰二錢剔牙松皮煅存性五六錢鉛粉煅黃
五六錢或乾膠或香油調一切外症俱效

續名醫類案卷三十五終

續名醫類案卷三十六

錢塘魏之琇編集

海昌王士雄孟英 同校

定州楊照藜素園

同校

白癥風

附紫

癥風

薛立齋治一男子常咳嗽腿患白癥風皮膚搔起白屑服消風散之類，痒益甚，起赤暈，各砭出血，亦暈開消而痒愈甚。服遇仙丹之類，成瘡出水殊類大痳風咳嗽吐痰，面色皎白，時或痿黃，此肺脾二經虛熱之症，先用五味異功散治之，虛熱稍退，又用地黃清肺飲，肺氣漸清，又用八珍湯六

味丸而尋愈後又咳嗽痰喘患處作痒用參蘇飲二劑散其風邪又用五味異功散加桔梗補其肺氣而痊二年後咳嗽作渴飲水脈洪大左尺爲甚用加減八味丸補腎水而痊

一男子素不慎房勞常患足三陰虧損治愈後兩腿腕患紫癜風延於兩腿作痒各砭出血痒處日甚服消風等藥患處微腫延及上體兩眼昏澀謂腎臟風先用四生散四服後用易老祛風丸月餘再用地黃丸兩月餘而痊後飲食起居失宜肢體色赤服二丸隨愈

一男子患白癲風過飲或勞役患處色赤作痒服消風散之

類頓起赤暈遍身皆痒。砭出血服祛風藥。患處出血。恪服遇仙丹。患處愈熑。元氣日虛。先用九味蘆薈丸。九味羌活湯。諸症頓愈。用加味逍遙散。加味四物湯。乃痊。

一婦人患白癥風。誤以爲大麻風。服蛇酒等藥。患處熑腫經水兩三月一行。曰此肝血傷而內風也。誤服風藥。必筋脈拘急。不信。仍作風治。果身起白屑。四肢拳攣。始信先用八珍湯四劑。又用四君子湯二劑。月餘乃用四君子湯。又用八珍湯二劑。又月餘。諸症漸退。元氣漸復。又以四君子湯爲主。以逍遙散爲佐。將兩月。瘡靨脫落。又月餘而愈。

斑瘡

經言醫業卷三十六

唐王琰云比歲有病天行發班瘡頭面及身須與周匝狀如火燒瘡皆帶白漿水隨破隨生不治數日必死治後瘡癥黯一歲方滅此惡毒之氣所爲以水煮升麻綿沾洗之若酒煮彌佳但躁痛不可忍也又云建武中南陽擊虜初呼爲虜瘡諸醫參詳療之方取好蜜摩瘡上以蜜煎升麻數

拭之

外臺秘要

繆仲淳治顧奉常女臂患紫雲風用稀荳蒼耳雄黃末之醇漆爲丸或疑漆有毒競沮之然竟以此藥收功製漆用生蟹黃攪和

可化作水入
藥廣筆記

一婦人患班症作痒，脈浮數，以人參敗毒散二劑少愈，更以消風散四劑而安，又用紫胡清肝散而愈。

一婦人患班症，痒痛大便秘結，脈沉實，以四物湯加芩連大黃槐花治之，而便利，用四物二連湯而瘡愈矣。

一婦人患班作痒，脈浮，以消風散四劑而愈。

一婦人患班作痒，脈浮數，以人參敗毒散二劑少愈，更以消風散四劑而安。

一男子患班，色赤紫，焮痛，發熱喜冷，脈沉實，以防風通聖散一劑頓退，又以荆防敗毒散加芩連四劑而愈。

舉人陸世明會試途中勞役，胸患班欬，赤作痛，頭痛發熱，形倦少食，大便或溏或結，小便赤澀。此勞傷元氣，而虛火內動，投補中益氣湯一劑，頓退。再劑而痊，又數劑而平復。一室女年十四，天癸未至，身發赤斑，痒痛，左關脈弦數。此因肝火血熱，以小柴胡湯加山梔、生地、丹皮治之而愈。若因怒而致者，亦宜治以前藥。

一男子面起赤暈，時或發腫，臂手亦然。搔起白屑，服癟風藥，內熱體倦，脹大而虛。此因元氣虛而陰血復傷，用六味九補中益氣湯而愈。

一婦人身如丹毒，搔破如癟，熱渴頭暈，日晡益重。此屬肝經

風熱血燥用加味道遙散而愈

一婦人身如丹毒，搔破淋漓，熱渴頭暉，日晡益甚。用逍遙散加炒山梔陳皮，而愈。又用八珍柴胡山梔丹皮，而痊。

一婦人患前症，誤服大麻風藥，破而出水，煩渴頭暉，誠類風症。六脈洪數，心肝脾爲甚。曰：風自火出，此因怒動肝火，血燥而生風耳。非真風症也。與逍遙散六味丸，以清肝火，滋脾血，生腎水，而痊。

一婦人患前症，搔破久不愈，食少體倦。此肝脾虧損，陰虛發熱也。先用補中益氣湯，加川芎、炒梔元氣漸復，更以逍遙而瘡愈。

一婦人患赤遊風，晡熱痒甚，用清肝養血之劑不信，乃服大麻風藥，臂痛筋攣，又服化痰順氣之劑，四肢痿弱。又一婦患前症，數服風藥，煎湯泡洗，以致腹脹並發。

一女子月經先期，先發赤暈，微腫作痒，若遇氣惱，赤痒益甚。服祛風之藥，患處更腫，砭出紫血甚多，其痒愈作。謂肝火血燥，風藥復傷血而爲患也。先用加味逍遙散，清肝火，益肝血，赤痒少止。用地黃丸滋腎水，生肝木，各五十餘貼而痊。後因惱怒，經水不止，發熱作渴，患處赤痒，先用加味小柴胡湯二劑，諸症頓止。又用加味逍遙散而安。

天泡瘡

其症屬元氣不足邪氣所乘亦有傳染而患主在肝腎二經故多在下體

發起楊梅下疳畧同

薛立齋治一儒者患天泡色赤作痛大便秘而不實服祛風散毒等藥舌痛口乾脈浮而數此邪氣去而陰虛所致用六味丸料加山梔當歸四劑脈症頓退又用八珍湯加山梔丹皮瘡色漸白後用四君加歸芪而愈

一儒者患天泡誤服祛風消毒之藥復傷元氣因勞役過度內熱口乾齒齦作痛右關脈洪數而虛此脾胃受傷而火動用清胃散之類而愈

一儒者患天泡或成粒或成片或出水脾肺脈俱洪數此風邪所傷先用荆防敗毒散加草薢。鈎藤數劑漸愈。但口內乾熱用四物加山梔鈎藤銀花甘草節而愈後遍身搔痒。內熱口乾佐以六味丸而瘥。

一商人每勞役飲酒後則遍身生瘡服祛風敗毒之劑面目胸背臂脇結一塊如桃票凹凸癢痛膿水淋漓氣血虛甚寒熱往來作渴痰湧此溼熱壅盛元氣虛而不能愈也外敷當歸膏內服補陰八珍加萆薢五錢並換肌消毒散加乾葛鈎藤各一錢二十餘劑諸症漸退仍以前藥爲主佐以調理之劑兩月餘氣血復而瘡愈。

一男子燬腫痛發熱服祛風清熱藥愈燬診其脈沉實乃邪
在內也用防風通聖散一劑頓愈又荆防敗毒散二劑而
安夫此症雖屬風熱當審在表裏無誤矣。

一小兒患此症燬痛發熱脈浮數挑去毒水以黃柏滑石末
敷之更飲荆防敗毒散二劑而愈

一小兒患此症燬亦發熱以黃柏滑石末敷之飲大連翹湯。
二劑少愈更以金銀花散而痊

毛閣老孫年十餘歲背側患水泡瘡數顆發熱脈數此肺胃
經風熱所致名曰天泡瘡遂以荆防敗毒散加芩連服之。
外去毒水以金黃散敷之又四劑而愈

楊文魁腹患此症及腰背燉痛飲冷脈數按之愈大乃表裏俱熱也以防風通聖散一劑更敷金黃散勢減大半再以荆防敗毒散二劑而痊

瘀血腹痛

立齋曰予於壬申年被重車碾傷悶瞀良久復甦胸滿如築氣息不通隨飲熱童便一碗胸寬氣利惟小腹作痛吾鄉徐銀臺東濤先生與復元活血湯一劑便血數升許痛腫悉退更服養氣血藥而痊大凡損傷不問壯弱及有無瘀血停積俱宜服熱童便以酒佐之推陳致新其功甚大若

脇脹或作痛或發熱煩躁口乾喜冷惟飲熱童便一甌勝
服他藥不動臟腑不傷氣血萬無一失嘗詢諸營操軍常
有墮馬傷者何以愈之俱曰惟服熱童便卽愈此其屢試
之驗亦明矣戊辰年公事居庸關見覆車被傷者七人仆
地呻吟一人未蘇俱令以熱童便灌之皆得無事又凡腫
或傷損者以葱搗爛熱罨之尤妙

治一人仲秋夜歸墮馬腹內作痛飲酒數杯翌早大便自下
瘀血卽安此元氣充實挾酒勢而行散也

一男子跌傷腹痛作渴食梨子二枚益甚大便不通血欲逆
上用當歸承氣湯加桃仁瘀血下而瘥此因元氣不足瘀

血得寒而凝聚也。故產婦金瘡不宜食此。

一男子孟仲墜梯腹停瘀血用大黃等藥而其血不下更加胸膈脹腫喘促短氣用肉桂木香末各三錢溫酒調服卽下黑血及前所服之藥而蘇此因寒凝滯而不行故用辛溫之劑散之。

一老人墜馬腹作痛以復元通氣散用童便調進二服少愈更以四物湯加柴胡桃仁紅花四劑而安

一男子墜馬傷作痛以桃仁承氣湯加蘇木紅花下之頓愈更以四物湯加花粉柴胡二劑而愈

脾傷腹痛

附血虛脹

陳侍御墜馬腿痛作嘔服下藥一劑胸腹脹痛按之卽止惟倦怠少氣診其脈細而濶曰非瘀血也乃痛傷氣血復因藥損脾氣而然耳投養脾胃生氣血之藥而愈
李進士季夏傷手出血不止發熱作渴兩脇作脹按之卽止此血虛也用八珍加軟柴胡花粉治之而愈更用養氣血之藥調理而痊

孫文垣治桂亭兄壯年原有溼熱痰積年逾艾偶墜轎跌傷背脇外敷內攻而愈越十五年左脇痛手不可近左脈弦

數堅勁博指小腹亦痛知爲舊瘀及痰積作祟以青皮赤芍黃連當歸尾各一錢桃仁錢半大黃二錢滑石三錢臨服調元明粉一錢服下吐痰碗餘大便僅行一次左脇及腿膝皆痛臥不安小腹痛甚此瘀血欲行而未能也再與前方加減便三次皆沈香色稠黏瘀物腹痛除脇痛仍在再與加減便行四次所下紫黑如筋膜者甚夥諸症悉減因食雞湯牛肉腹痛復重此餘積未盡欲再下之恐年高不任曰藥力已到積已動行而後補庶無反顧之憂仍以前藥去大黃調元明粉下二次瘀物如前之半諸痛俱平用人參白芍甘草陳皮山楂桂心當歸半夏調理半月而

愈。

一男子跌仆皮膚不破兩脇作脹發熱口乾自汗類風症令先飲重便一甌煩渴頓止隨進復元活血湯倍用柴胡青皮一劑脹痛悉愈再劑而安發明經云夫從高墜下惡血流于內不分十二經絡聖人俱作風中肝經留於脇下以中風療之血者皆肝之所主惡血必歸於肝不問何經之傷必留於脇下蓋肝主血故也甚痛則必有自汗但人汗出皆爲風症諸痛皆屬於肝木況敗血凝滯從其所屬入於肝也從高墜下逆其所行之血氣非肝而何以破血行

經藥治之

一男子墜馬。兩脇作痛。以復元活血湯二劑頓止。更以小柴

胡加當歸桃仁二劑而安。

血虛煩躁

附亡血出汗

亡血昏憒

吳給事墜馬傷首。出血過多。發熱煩躁。肉瞞筋惕。或欲投破傷風藥。曰此血虛火動所致。當峻補其血爲善。遂用聖愈湯。二劑卽安。又養氣血而瘥。

一男子損臂出血過多。又下之。致煩熱不止。瘀肉不腐。以聖愈湯四劑少安。以八珍湯加五味子。麥冬而安。更以六君子湯加芎歸黃芪四劑而潰。又二十餘劑而歟。大抵此症。

須分所患輕重有無瘀血及元氣虛實不可概下。蓋恐有傷氣血難以潰歛。常治先以童便和酒飲之或加紅花蘇木其功甚捷。若概用攻利之劑鮮有不誤。凡瘡愈之遲速在血氣之虛實故也。

張進士季秋墜馬亡血過多出汗煩躁翌日其汗自止。熱躁益甚口噤手顫此陰血虛陽火乘之而汗出爲寒氣收歛腠理故汗不得出。火不得泄怫鬱內甚而益增他症也。一切病火盛而汗出者若驟歛之反增他症乃用四物加柴胡黃芩山梔四劑少止。又用四物參耆軟柴胡五味麥冬治之而痊。

一婦人孟冬傷足亡血頭汗內熱作渴短氣煩躁不時昏憒。

其脈洪大按之微弱此陰血虛於下孤陽炎於上故發厥而頭出汗也以四物合小柴胡湯一劑汗即止以四物去川芎加參芪麥冬五味炙草少用肉桂四劑諸症悉去又三十餘劑血氣復而愈

一男子孟夏折腿出血過多其初眩暈眼花後則昏憒此陰血傷損陽火熾甚制金不能平木木旺生風所致急灌童便更用人身當歸各五錢荆芥川芎柴胡白芍白朮各二錢山梔黃芩桔梗各一錢甘草五分服之隨瘳又用四物參芪各三錢生地柴胡各一錢四劑煩躁悉去

溼痰作痛

附肝火作痛

大宗伯沈立齋。孟冬。閃腰作痛。胸間痰氣不利。以枳殼。青皮。柴胡。升麻。木香。商當歸。川芎。赤芍。神麴。紅花四劑而瘥。但飲食不甘。微有潮熱。以參芪。白朮。陳皮。白芍各一錢。歸身二錢。川芎八錢。軟柴胡。地骨皮。炙草各五分。十餘劑而康。劉尙寶體臂閃作痛。服透骨丹。反致肢節俱痛。下體益甚。以二陳。南星。羌活。防風。牛膝。木瓜。蒼朮。黃芩。黃柏。治之身痛遂安。以前藥再加歸尾。赤芍。桔梗治之而痊。

鄭吏部素有溼痰。孟冬墜馬。服辛熱破血之藥。遍身作痛。發

熱口乾脈大而滑此熱劑激動痰火爲患耳治以清燥湯
去人參當歸黃芪加黃芩山梔半夏黃柏熱痛頓去患處
少愈更用二陳羌活桔梗蒼朮黃柏姜製生地當歸遂痊
楊司天骨已入骱患處仍痛服藥不應肝脈洪大而急此肝
火盛而作痛也用小柴胡湯加山梔黃連二劑痛止用四
物山梔知柏調理而康

一婦人磕臂出血骨痛熱渴煩悶頭暈日晡益甚此陰虛內
熱之症用八珍湯加丹皮麥冬五味骨碎補肉桂及地黃
丸治之悉愈去桂加牛膝續斷二十餘劑而瘡愈

骨傷作痛

附氣虛血滯
氣虛不潰

一小兒足傷作痛肉色不變傷在骨也頻用炒葱慰之五更用和血定痛丸間用健胃生氣血之劑數日後服地黃丸。

三月餘而瘥

一小兒臂骨出骱接入腫痛發熱服流氣等藥益甚飲食少思以葱熨之其痛卽止以六君黃芪柴胡桔梗續斷骨碎補治之飲食進而痛腫消又用補中益氣加麥冬五味治之氣血和而熱退愈矣

戴給事墜馬腿腫痛而色黯食少倦怠此元氣虛弱不能運

散瘀血而然耳。遂用補中益氣去升麻柴胡加木瓜茯苓
白芍白朮治之而愈。

少宗伯劉五清，廉傷一塊，微痛，少食。用六君子湯倍加當歸、黃芪。其痛漸止。月餘瘀血內癟而不潰。彼以爲瘻。此陽氣虛極，須用調補不從。至來春頭暈痰涎壅塞，服清氣化痰病勢愈盛。脈洪大而微細。此或輕取重取之分欲以參芪歸朮附子之類補之。不信。至秋初旬，因怒昏潰而厥。雄按瘀之內癟未始非初治失品所致也佐流通之。

氣虛雍上腎

附瘀血腫痛

一婦人腫臂腕腫大已三月。手臂日細肌瘦惡寒食少。短氣脈息細微屬形病俱虛也。遂投補中益氣加肉桂引諸藥以行至臂。再加貝母香附以解久病之鬱。間服和血定痛丸。以葱熨之。腫消二三。因怒患處仍脹。胸膈兩脇微痛以前湯更加木香。山梔。半夏。桔梗。服之少可服。因驚不寐。少食盜汗。以歸脾湯加五味。麥冬二十餘劑而安。腫消三四手臂漸肥。但經水過期而少。此心脾之血尙未充足而然也。乃用八珍加五味。麥冬。丹皮。遠志。香附。貝母。桔梗四十餘劑。諸症悉愈。後因怒發。熱譖語。經水如涌。此怒動肝火。以小柴胡湯加生地二錢。一劑遂止。以四物加柴胡調理。

而康。

州守陳克明子閃右臂，腕腫痛，肉色不變。久服流氣等藥，加寒熱少食，舌乾作渴，曰傷損等症，腫不消，色不變。此氣虛而不能愈，當助脾胃，壯氣血爲主。如法治之，不二月，形氣漸充，腫漸消，半載諸症悉退，體臂如常。

一小兒閃腿腕壅腫，形氣怯弱，欲治以補氣血爲主，佐以行散之劑。不信，乃內服流氣飲，外敷寒涼藥，加寒熱體倦，日發寒熱，脈息洪大，氣血虛極也。治之無功，後肉潰瘍盡氣血而亡。

一男子閃傷右腿，壅腫作痛，謂急砭去滯血，以補元氣，庶無

後患不信乃外敷大黃等藥內服流氣飲後涌出穢膿枕
許其膿不止乃復請治視其膿細而脈大作渴發熱辭不
治後果歿

窗友王汝道環跳穴處閃傷瘀血腫痛發熱作渴遂砭去瘀
血知其下焦素有虛火用八珍加知柏牛膝骨碎補四劑
頓止用十全大補少加知柏麥冬五味三十餘劑而愈。

李考功子十四歲脚腕閃傷腫而色天日出青膿少許肝脈
微澁此肝經受傷氣血虛而不能潰難消之症急止刺伐
之劑不信乃雜用流氣等藥後果出爛而死。雄按此名蹬
筋毒潰後最難收功初起宜以燒酒于患處蘸拍數百下後以韭菜杵
爛罨之日日如此以散爲度甚效且簡易也若經外科每

致不

肺火衄血

附肝火出血
胃火作嘔

張地官墜馬傷腿，服草烏藥，致衄血，咳嗽，臂痛，目黃，口渴，齒痛，小便短少。此因燥劑傷肺，與大腸而致。用生地、黃芩、連知柏、山梔、山藥、甘草，以潤肺燥而生腎水，小便頓長。諸症並止。以山藥五味、麥冬、參芪、葛歸、知柏、黃芩、炙草，以滋陰血，養元氣，而瘡歎。

俞進士折腿骨已接，三月尚發熱，出血不止。正體醫治不應，左關脈洪數，此肝火熾甚，血得熱而妄行也。遂投小柴胡

湯加山梔白芍生地防風血止熱退又用八珍五味麥冬
治之瘡口卽愈

田宗伯姪仲秋因怒跌仆遍身作痛發熱衄血肝脈弦洪曰
久衄脈弦洪乃肝火盛而制金也至春則肝木茂盛而自
焚或戕賊脾土非易治之症當滋腎水以生肝木益脾土
以生肺金乃雜用瀉肝火等劑歿於仲春之月

一婦人因怒仆地傷面出血瘀盛昏憒牙關緊急曰此怒動
肝火氣逆拂鬱神明昏冒而卒倒也兩手脈洪而無倫次
以小柴胡湯加黃連山梔芍歸桂橘紅茯苓羌活而甦

一膏梁之人跌腿青腫作痛服辛熱之藥反發熱作喘患處

益痛口乾唇揭此膏梁之人內多積熱更服辛熱之劑益其胃火而使然也。頻飲童便以清胃散加山梔黃芩甘草治之頓止。患處以葱熨之腫即消散。

陰虛作喘

附陰虛發熱

氣血虛熱

舉人杜克宏墮馬服下血藥反作喘日益甚此血虛所致而然非瘀血爲患遂以四物加參芪五味麥冬治之其喘頓止又用補中益氣加五味麥冬而愈此症果係瘀血蒸熏於肺而喘宣活血行血不可下若面黑胸脹或膈痛作喘當用人參一兩蘇木二兩作一劑水煎急服緩則不治產

婦多有此疾

楊進土傷手指，焮痛發熱，服寒涼之藥致飲食頓減，患處不潰，用托裏養血之藥食進而潰，後因勞每日晡發熱，此陰虛而內熱也。以四物軟柴胡、地骨皮乃退，更用養血氣之藥而瘡歛。

一男子墜馬，腹有瘀血，服藥下之，致發熱，盜汗自汗，脈浮濶，以爲重劑過傷氣血所致，投以十全大補湯，益甚，時或譖語，此藥力未及而然也。以前藥加炮附子五分服之卽睡覺來，頓安，再劑而痊。

陽氣脫陷

附膽經血少

腎經虛怯

梁閣老姪跌傷腿，外敷大黃等藥，內服破血之劑，遂致內潰爲針出穢膿三碗許。虛症悉具，用大補之劑兩月餘，稍能步履。因勞心手，撒眼閃汗出如水，或欲用祛風之劑，曰此氣血尙未充足而然也。急以艾炒熱，頻熨肚臍。此法羅謙父嘗用之并氣海穴處，又以人參四兩炮附子五錢煎灌。良久臂少動，又灌一劑，眼開能言，但氣不能接續。乃以參芪歸朮四味共一月，附子五錢水煎成。徐徐服之，元氣漸復，飲食已進，刀去附子服之而瘡愈。

一女子年十七，門右臂微腫，作痛。寅申時發熱，決其膽經血虛火盛，經水果先期而至。先以四物合小柴胡湯四劑，熱退。更加以四物湯加香附、地骨皮、山梔各五分，芩連炙草各二分，二十餘劑，其腫亦消。乃去黃連、山梔，又五十餘劑，經水調而元氣充矣。

儒者王清之跌腰作痛，用定痛等藥不愈。氣血日衰，面耳黧色。曰：腰爲腎之府，雖曰門傷，實腎經虛弱所致。遂用杜仲補骨脂、五味山萸、菟絲子、山藥空心服。又以六君、當歸白朮神麪各二錢，食遠服。不月而差。

一三歲兒，門腰作痛，服流氣等藥半載不愈。此稟腎氣不足。

不治之症也。後果歿。

痛傷胃門口叩

附氣遏肉死

一婦人指傷背俱腫微嘔少食。彼以爲毒氣內攻。診視其脈沈細。此痛傷胃氣所致也。遂刺出膿碗許。先以六君子疊香當歸而食進。繼以八珍黃芪白芷桔梗月餘而愈。

一男子修傷足。指色黑不痛而欲脫。此因陽氣虛不能運達於患處也。急去之速服補劑以壯元氣。否則死肉延足必不救矣。不信果爛上腔而死。

一女子數歲嚴寒上京。兩足受凍不仁。用湯泡潰至春十指

俱爛牽連未落先用托裏之劑助其陽氣自潰脫得保其生此因寒邪遏絕運氣不至又加熱湯泡潰故死而不痛也常見人嚴寒而出凍傷其耳不知痒若以手觸之其耳卽落當以緩處良久或熱手熨之無恙若以火烘湯泡其耳卽死至春必潰脱落矣北方寒氣損人若此可不察之

涼藥過經

靈間曹子容爲室人中風灌藥誤咬去指半節焮痛寒熱外敷大黃等內服清熱敗毒患處不痛不潰膿清寒熱愈甚此因涼藥遏絕墜道而然也遂敷玉龍膏以散寒氣更服

六君子湯以壯脾胃。數日後患處微痛。腫處漸消。此陽氣運達患處也。果出稠膿。不數日半指潰脫。更服托裏藥而歟。

上舍王天爵。傷足焮腫。內熱作渴。外敷內服。皆寒涼敗毒。患處益腫而不潰。且惡寒少食欲。作嘔吐。此氣血俱虛。又因寒藥凝結墜道。傷損胃氣。以致前症耳。遂用香砂六君子。菖歸炮薑。外症悉退。惟體倦。晡熱。飲食不甘。以補中益氣湯加地骨皮。五味麥冬。治之而愈。

州守王廷用。傷指卽用帛裹之。瘀血內潰。焮痛至手。謂宜解患處。以出瘀血。更用推陳致新之劑。不信而敷涼藥。雖少

止次日復作又敷之數日後手心背俱潰出瘀穢膿水尙
服敗毒之劑氣血益虛色黯膿清飲食少思仍請治投以
壯脾胃氣血之劑由是膿水漸稠而愈

錢國賓曰甲子春余舟泊清江浦時征遼官兵沙船兩岸打
閘水急索斷頭目王元跌倒頭向地腳朝天正對石椿腦
蓋骨圓圓如鍾大竟離頭墜地去人丈許衆兵圍看余見
而呼曰某知接骨今病者破腦魂魄驚散怕人不敢歸竅
汝等在此此人立死矣且暫散診其脈洪浮腦骨雖墜腦
膜未破可救先安腦骨急取舟中接骨藥散於周圍內用
四物湯加桃仁大黃各一錢紅花五分恐血攻心移病者

於無風之室，令倚勿睡，睡則血上，至半日始甦醒，次日能飲食。日日與接骨藥一劑，十日而痊。接骨神方：土鱉蟲四十九个，酒炙黃暴死人骨一兩，螃蟹殼黃五錢，象虱十个，半兩錢十个，蝦紅醋淬取末，自然銅三錢，蝦紅醋淬乳香沒藥各三錢，木香二錢，射香五分，爲末，每服七分，熱酒調下，照量加酒，以行藥力。服後骨中自嚮，輕者數服，重者十餘服，接骨如故。

杖傷

分症三十條

張子和治一男子被杖，瘡痛焮發，毒氣入裏，驚涎堵塞，牙噤

不開粥藥不下前後月餘百治無功甘分於死先以三聖
散吐青痰驚涎約半大匙次以利膈丸百餘粒下臭惡燥
糞又一大匙復煎通聖散數錢熱服之更以酸辣葱醋湯
發其汗斯須汗吐交出其人活矣此法可以救奄人

鄭金曜有杖丹一方用水蛭爲末和朴消少許以水調傅瘡

上屢施於人良驗

志雅堂
雜抄

崇禎庚辰黃公石齋解公石帆葉公潤山被杖士夫皆謀蚺
蛇胆愚謂此太寒令人絕嗣不如三七無名異地龍蠟丸
酒服則杖不知痛如不卽得則白蠟一兩麝蟲一枚酒服
亦妙王午則熊公魚山羌公卿墅復以直言受杖遣人急

白如須用之中州集曰貞祐中高琪柄國土夫被垂辱醫
家以酒下地龍散投以蠟丸則受杖失痛范中歌曰嚼蠟
誰知味最長一杯卯酒地龍香年來紙價長安貴不重新
詩重藥方偶書及此爲之一嘆痕痏青腫用萊菔搗爛敷
之卽消或用菜豆粉調敷客中間集

薛立齋治文刑部用晦伏闕諫南巡受杖瘀血已散壞肉不
潰用托裏之藥稍潰而膿清此血氣虛也非大劑參耆不
能補文君亦善醫以爲恐腹羸強之飲食稍思遂加大補
劑飲食日進肉潰膿稠而愈嘗治江翰林姚王鄭三吏部
李姜陳三禮部南吳二刑部皆與文同事者先散其瘀血

漸用排膿托裏之藥俱愈夫叫號則傷氣忍痛則傷血此氣血之虛明矣况脾主肌肉脾氣受傷飲食必減血一水則肌肉不旺故必理脾脾健肉自生若非參丸歸芪之類培養脾土則肌肉何由而生然又須分病人虛實及有無瘀血停積蓋打撲墜墮皮肉不破肚腹作痛者必有瘀血在內宜以復元活血湯攻之老弱者四物湯加紅花桃仁穿山甲補而行之若血去多而煩躁此血虛也名曰亡血以獨參湯補之有損傷稍輕別無瘀血等症但瘀痛不止者惟和血氣調經脈其痛自止更以養血氣健脾胃無有不效亦有傷痛胃氣作嘔或不飲食者以四君子湯加藿

香砂仁當歸治之。若有瘀血不先消散而加補劑則成實
塞之禍設無瘀血而妄行政利則致虛虛之禍。
夏鳳北京人因杖瘡醫膝通潰膿瘀未出時發昏憤此膿毒
內作而然也急與開之昏憤愈盛此虛也以八珍湯一服
少可數服死肉自腐頓取之令用猪蹄湯洗淨以神效當
歸膏塗貼再以十全大補湯兩月而愈若更投破血之帖
則危矣大抵杖瘡一症皆瘀血爲患治療淺者砭之深者
針之更以活血流氣藥和之內潰者開之有腐肉取之以
壯胃生血藥托之可保無虞有傷筋骨而作痛者以沒藥
降聖丹治之若牙關緊急或腰背反張者以玉真散治之。

並效

薛立齋治一人杖後兩脇脹悶欲飲不飲口覺血腥遍身脣
腿脹痛倦怠不食煩躁脈大此血脫煩躁也與童便酒及
砭患處出死血糜肉甚多忽發熱煩躁汗出投以獨參湯
三劑少止又用補氣血清肝火之藥數劑飲食少進後用
獨參湯間服諸症悉退飲食頓加但不能多寐以歸脾湯
加山梔竹茹四劑而熟睡因勞心遂煩渴自汗脈大無力
以當歸補血湯二劑而安又以十全大補去川芎加麥冬
五味牡丹地骨麻黃根炒浮麥數劑而汗止死肉且潰又
二十餘劑而新肉生

一人頑躁面赤口乾作渴脈洪大按之如無此血虛發躁也以當歸補血湯二劑卽止後日晡發熱更以四物加柴胡牡丹地骨知柏治之熱退而瘡斂東垣云發熱惡寒大渴不止其脈大無力者非白虎湯症此血虛發躁宜用當歸補血湯治之斐先生云肌熱躁熱目赤面紅其脈洪大而虛此血虛也若誤服白虎湯輕則危重則斃

一人杖後頭額出汗熱渴氣短煩躁骨痛瘀血不潰此氣虛血熱也遂割去之出血服芩連之藥益甚其脈洪大而微此氣血俱虛邪火熾甚所致以四物加參耆朮草少用柴胡炒芩二劑頭汗頓止又加麥冬五味肉桂二劑諸症悉

退後用參芪歸朮炒熟地麥冬五味十餘劑，瘀血潰而
膿水稠矣。但新肉不生以前藥倍用白朮而斂。

一人杖後瘀血流注腰脇兩足俱黑。此瘀泛注也。隨飲童便
酒砭出瘀血糜肉。投以小柴胡湯去半夏加山梔芩連骨
碎補以清肝火。用八珍茯苓以壯脾胃。死肉潰而新肉生。
後瘡復潰得靜調治年餘而痊。

一人瘀血攻注陰囊。潰而成漏。膿水清稀所服皆寒涼之劑。
診其肝脈短澀。餘脈浮而無力。此肝木受肺金克制。又元
氣虛不能收歛。遂用壯脾胃生氣血之方。元氣少復後終
歿於金旺之日。

卷三十一
一人傷處腫痛發熱作渴汗出此瘀血作痛也先砭去惡穢以通壅塞後用四物柴芩山梔丹皮骨碎補以清肝火而愈

一人傷處揉散惟腫不消此瘀血在內宜急砭之不從乃以蘿蔔自然汁調山梔末敷之破處則以膏貼之更服活血之劑而瘥數年後但遇天陰仍作痒痛始知不砭之失

一人杖後臀腿黑腫而皮不破但脹痛重墜皆以爲內無瘀血惟敷涼藥可以止痛診其尺脈濶而結此因體肥肉厚瘀血蓄深刺去卽愈否則肉潰有爛筋傷骨之患乃入針四寸漂黑血數升腫痛遂止是日發熱惡寒煩渴頭痛此

氣血俱虛而然也以十全大補之劑遂愈

一人杖後瘀血內脹，燉痛發熱，口乾作渴，飲食不甘，四肢倦怠，此肝火作痛也。脾土受制，故患此症。喜其稟實年壯，第用降火清活血之劑而愈。

一人杖後患處脹痛悲哀忿怒，此肝火忿怒也。厥陽之火爲七情激之而然耳。遂砭去瘀血，以小柴胡湯加山梔、黃連、桔梗而安。後用生肝血養脾氣之藥，瘡潰而歛。

一人杖後患處腫脹痛發熱，欲吐嘔，兩脇熱脹，肝脈洪大，此肝火脇脹也。但令飲童便，并小柴胡湯加黃連、山梔歸尾、紅花諸症果退。此症若左關脈浮而無力，以手按其腹反

不脹者此血虛而肝脹也當以四物參芩青皮甘草之類治之若左關脈洪而有力胸脇脹痛按之亦痛者此怒氣傷肝之症也以小柴胡芎歸青皮白芍桔梗枳殼主之蓋此症不必論其受責之輕重問其患處去血之曾否但被人扭按甚重努力恚怒以傷其氣瘀血歸肝多致前症甚則胸脇脹滿氣隧不通或血溢口鼻多致不救

一人受杖愈後口苦腰脇脹痛服補腎行氣等藥不效按其肝脹浮而無力此肝膽虛症也用參芪芎歸地黃白朮麥冬五味治之而愈

一人杖後服四物桃仁紅花大黃等劑以逐瘀血腹反痛更

服一劑痛益甚此血虛腹痛也宜溫補之劑遂以歸身白朮參芪草二劑痛即止

一人杖後瘀血已去飲食少思死肉未潰又用托裏之藥膿稍潰而清此血虛不潰也非大補不可彼不從乃強與大補之劑飲食進而死肉潰但少寐以歸脾湯加山梔二劑而愈因勞心煩躁作渴脈浮洪大以當歸補血湯二劑而安

一人受刑太重外皮傷破瘀血如注內肉糜爛黯腫上引胸背下至足指昏憊不食此寒凝不潰也隨以黑羊皮熟貼患處灌以童便酒薄粥更以清肝活血調血健脾之劑神

思稍甦始言遍身強痛又用大劑養血補氣之藥腫消食進時仲冬瘀血凝結不能潰膿又用大補之劑壯其陽氣其膿方熟遂砭去洞見其骨塗當歸膏及服前藥百餘劑肌肉漸生

一人杖後而傷虛漬甚以內有熱毒欲用涼藥此脾虛不歛也非歸尤參芪之類培養脾土則肌肉何由而生豈可復用寒涼尅伐之藥重損氣血耶遂用前藥而愈

一人杖後腹脹嘔吐眩暈筋骨痛此血虛筋攣也用柴胡黃芩山梔紫蘇杏仁枳殼桔梗川芎當歸赤芍紅花桃仁四劑而定後又出血過多昏憊目黑用十全大補等藥而蘇

時肌肉潰爛膿水淋漓筋攀骨痛切其脈浮而濇沈而弱
皆因氣血耗損不能養筋筋虛不能束骨遂用養氣血之
藥治之而愈

一人杖瘡愈後失于調理頭目不清此腎虛氣逆也服祛風
化痰藥反眩暈服牛黃清心丸又肚腹瘀痛杖痕腫痒發
熱作渴飲食不思痰氣上升以爲杖瘡餘毒復作診之左
尺脈洪大按之如無此腎經不足不能歸源遂用人參黃
耆茯苓陳皮當歸川芎熟地山藥山萸五味麥冬炙草服
之尋愈後因勞熱渴頭痛倦怠少食用補中益氣加麥冬
五味而痊

一人受杖愈後腿作痛，意體血過多，瘡雖愈，肝經血尙未充，而溼熱乘肝也。遂以八珍加牛膝、木瓜、蒼朮、黃柏、防己、炙草，以祛溼熱，養陰血，痛漸止。乃去防己、黃柏，服之，遂瘳。

一人杖後瘀血失竅，脹痛煩渴，縱飲涼童便，脹頓止。以蘿蔔細搗塗之，血漸散，已而患處作痒，仍塗之，痒止。後口乾作渴，小腹引陰莖作痛，小便如淋，時出白津，此肝經鬱火也。遂以小柴胡湯加大黃、黃連、山梔，飲之，諸症悉退。再用養血藥而安。夫小腹引陰莖作痛等症，往往誤認爲寒症，投以熱藥，則諸竅出血，或二便不通，以及危殆，輕亦損其目矣。

凡肝鬱病誤用熱藥皆貽大患

一人杖後痛甚發熱嘔吐少食胸膈痞滿用行氣破血之劑
益甚口乾作渴大便不調患處色黯此痛傷胃嘔也遂以
四君當歸炒芩軟柴胡藿香二劑諸症漸愈又用大補之
劑瀆之而瘳

一人杖後發熱煥痛服寒涼藥更加口乾作渴肚腹亦痛自
以爲瘀血欲下之按其肚腹不痛脈微細而遲飲食惡寒
而嘔此涼藥傷胃也急用六君加白芍當歸炮附子各一
錢服之前症益甚反加譖語面赤意其藥力未至耳前藥
再加附子五分非明眼不能服之卽睡覺來諸病頓退而安

一人杖後瘀血雖去飲食形氣如故但熱渴煥痛膈間有痰

以小柴胡湯加花粉貝母桔梗山梔二劑少愈又加生地
歸尾黃芩柴胡山梔花粉而愈凡治百餘人其受杖血氣
不損者惟此一人耳治者審之

一人杖後悞服行氣之劑胸痞氣促食少體倦色黯膿清此
形氣俱虛之症也先用六君桔梗二劑胸膈氣和後用補
中益氣去升麻加茯苓半夏五味麥冬治之元氣漸復而
愈若用前劑戕伐元氣多致不救

一人去其患處瘀血用四物柴胡紅花治之煩痛頓止但寒
熱口乾飲食少思用四物白朮茯苓柴胡黃芩花粉四劑
寒熱即退用六君子歸養香而飲食進腐肉雖潰膿水漸

稠悞服下藥一鍾連瀉四次患處色黯喜其脈不洪數乃以十全大補倍加肉桂麥冬五味數劑肉色紅活新肉漸生喜在壯年易於調理又月餘而愈否則不救凡杖瘡跌撲之症患處如有瘀血止宜砭去服壯元氣之藥蓋其氣血已損切不可再用行氣下血之藥復損脾胃則運氣愈難營達於下而反爲敗症怯弱者多致天枉

一人受杖腫痛敷寒涼之藥欲內消瘀血反致臂腿俱冷瘀血并胸腹痞悶急去所敷之藥以熱的童便酒洗患處服六君木香肉桂四劑瘀血解乃刺之更以壯脾胃養氣血得痊愈蓋氣血得溫則行得寒則凝寒極生熱變化爲膿

腐潰深大血氣既敗肌肉無由而生欲望其生難矣

一人杖後發熱煩躁宜用四物黃芩紅花軟柴胡山梔子花
粉煩熱已清瘀血深蓄欲針出之不從忽牙關緊急患處
作痛始針去膿血即安也用托裏養血新肉漸長忽患處
癰痒此風熱也用祛風消毒之劑而痊

有一人杖後臂腿脹痛發熱煩躁刺去死血脹痛少寬熱躁
愈甚此血脫邪火旺而然也急宜用獨參湯以補之少愈
又以健脾養氣血藥以治之而腐漸潰遂愈大抵有此症
則宜預爲調補以顧收斂切勿使伐其氣與血不行補益
遂致不能收斂也

一人仲夏受杖傷手腰背發脹牙關緊急脈浮而散此表症也遂用羌活防風湯一劑卽解此症若在秋冬腠理緻密之時須用麻黃之類以發汗此乃暴傷氣血不損治法也一人杖處畧破而患痛脈洪大而實此裏症也用大葛黃湯一劑大便微行一次悉退若投表藥必死宜急分表裏虛實而治之庶無誤也

一人杖後寒熱日乾用四物參耆白朮軟柴炒芩麥冬五味四劑少退欲砭去瘀血不從後恆忡不寐飲食少思牙關牽緊頭目痺痛惡寒發熱此膿內焮類破傷風也遂砭去之卽安以八珍棗仁麥冬五味五十劑前症漸愈又用前

藥及獨參湯瘀血潰後因勞又寐盜汗以歸脾湯加麥冬
五味遠志而痘後牙關脹悶面目焮赤又似破傷風仍以
爲虛用八珍等藥亦安

一人杖後腹脹喘促作渴寒熱脣腿糜爛與死肉相加和如
皮囊盛糊用童便煎四物桃仁紅花柴胡黃芩麥冬花粉
之類頓退彼用黑羊皮貼之益甚後砭去膿血甚多氣息
奄奄唇口微動牙關急緊患處色黯或欲用破傷風藥曰
此氣血虛而變症也用參芪歸白丸并獨參湯人乳元
氣復而儲症愈乃用十全大補調理而安此症若膿瘀內
熑者宜針之若潰後口噤遺尿類破傷風等症者乃氣血

虛極也急用大補之劑若素多痰患風症者宜清痰降火。若因怒而見風症者宜清肝降火。若不慎房勞忽患前症此由腎水不足心火熾甚宜滋陰補氣血爲主。若誤作風症治之卽死。

一人受杖內潰針出膿二五碗遂用大補之劑翌日熱甚汗出足冷口噤腰背反張衆欲投發散之劑曰此氣血虛極而變痙也若作風治誤矣用十全大補等藥而愈此症或傷寒汗下過度與產婦潰瘍氣血虧損所致但當調補氣血爲善若服克伐之劑多致不救。

一人杖後兩月餘瘡口未完因怒發痙瘽口出血此怒動肝

火而爲患耳。用柴胡芩連山梔防風桔梗天麻鈞藤甘草治之頓愈。劉宗厚云瘻有屬風火之熱而作者有因七情怒氣而作者亦有溼熱內盛痰涎壅遏經絡而作者惟宜補虛降火。敦土平木清痰去溼。

一男子杖瘡瘀血不腐。以大補之劑漸腐。更以托裏健脾藥而歟。

一男子風入杖瘡牙關緊急。以玉真散一服少愈。再服而安。小渠袁三因強寇人家傷其兩脅外瞼作瘡數年不已。濃汁常涓涓然但飲冷則瘡間冷水浸淫而出延爲溼瘡。求治

張曰爾中焦當有綠水二三升涎數掬袁曰何也張曰當

被盜時驚氣入腹驚則傷胆病在少陽經也兼兩外廉皆少陽之部此胆之甲木受邪甲木色青當有綠水少陽在中焦如漚既伏驚涎在中焦飲冷水咽爲驚涎所阻水隨經而旁入瘡故飲水則瘡中水出乃上涌寒痰汙如流水次下綠水果二三升一夕而癥乾真可怪也

王涇以高宗疾奉御無狀鞭背都市流遠方後歸自言不會受杖嘗袒而示某以背完瑩無症初不解其如何也後見他醫言杖皆有瘢唯噬膚之初傳以金箔則瘢立消意金木之性相制耳程史載

岳珂

金瘡

卷之二十一

蜀志關雲長常爲流矢所中貫其左臂瘡雖愈每至陰兩骨常疼痛醫曰矢镞有毒入骨當破臂刮骨去毒乃除雲長便伸臂令劈時方請諸將飲食相對臂血流離盈於盤器而割炙飲酒言笑自若隋末高開道被箭鏃入骨命一工拔之不得開道問之云畏王痛開道斬之更命一醫云我能拔之以一小斧當刺下瘡際用小棒打入骨一寸以鉗拔之開道飲啖自若賜醫二絹三百匹桂菴
小乘

七釐散專治金瘡跌打損傷骨斷筋折血流不止先以藥七

釐燒酒沖服復用藥以燒酒調敷傷處瘡口大則乾繆之定痛止血立時見效上硃砂一錢二分水飛淨麝香一分二釐冰片一分二釐乳香一錢五分紅花一錢五分明沒藥一錢五分血竭一兩兒茶一錢四分於五月五日午時爲極細末密貯每服七釐不可多服

劉涓子於丹陽郊外較射忽有一物高二丈許因射而中之走如電激聲若風雨夜不敢進明日率數十人尋其蹤跡至山下見一小兒問曰何往答曰主人昨夜爲劉涓子所射取水以洗瘡因問主人是誰答曰是黃父鬼乃將小兒還未幾聞搗聲遙見三人一人臥一人閱書一人搗藥卽

齊聲叫突而前，三人並走，遺一帙癰疽方。一白藥時涓子得之，從宋武帝北征，有被瘡者，以藥塗之，隨手而愈。涓子用方爲治，于無一失。演爲十卷，號鬼遺方。龔慶先鬼遺方敘

宋元泰中，青州劉燾射一鹿，部五臟，拾青草塞之，蹶然而起。燾怪而拔草復倒如此三度。燾錄此草種之，多主傷折俗呼劉燾草。亦曰天名精。此草亦寄奴之項、嗟、乘

秀按：前劉涓子及此則皆胎宋祖荻洲事要。其藥皆寄奴也。

斐昊旻山行，有山蜘蛛，垂絲如疋布，將及旻，旻引弓射殺之。大如車輪，因斷其絲數尺收之，部下有金瘡者，翦方寸貼。

之血立止。

南部
新書

夏侯鄆爲閬州。有人額上有箭痕。問之云。從馬侍中征田悅。中箭。侍中與一藥。乃用巴豆微炒。同蟻蟎搗塗。斯須痛定。微痒。待極痒不可忍。乃撼動拔之。拔之立出。後以生肌藥傅之。乃愈。因以方付鄆。云。凡諸瘡皆可療。後鄆至洪州。逆旅主人妻患瘡。呻吟。用此立愈。本草綱目

受箭鏃不出者。以蟻蟎巴豆同塗。痒不可當。以雄慈石挾之。卽出象牙牡鼠肝腦。粟屑。烏雞尾。灰白梅仁。瓜仁。齒噙和黑豆。皆能出箭頭。又針錢在肉者。張子和。儒門事親方。端午取蕡苔作丸。黃丹衣之。置臍而箭頭自出。劉薦叔曰。近

日行伍。惟以乾莧菜與沙糖塗之能出箭頭與鉛砲子。此常驗者。則古方所未載也。

昔有人肩髀中瘡血如涌出。醫用原蠶沙爲細末。傅之血立止。一云用真降香煅存性爲末。貼之尤效。吹劍續醫

王肯堂云。余近得一金瘡方。大有神效。功在三日。長肌肉。以黃牛胆。燉金性爲細末。敷之。此實一奇方也。續錄醫說

布智爾從太祖征回。身中數矢。血流滿體。悶仆幾絕。太祖命取一牛剖其腹。納之。牛腹中浸熱血中移時。遂甦。又李庭從巴延攻郢州。砲傷左脇。矢貫於胸。幾絕。巴延命剖水牛腹。納其中。良久而甦。何孟春云。予在職方間。各邊將無

知此術者非讀元史弗知也故書於此以備緩急

本草綱目

孫法宗苦頭瘡夜有女人至曰我天使也事不關善人使者

誤及耳但取牛糞煮敷之卽驗如其驗果愈

宋書本草綱目

張禧身中十八矢一矢貫腹悶絕世祖卽取血竭遣人往療

元史

蒙古中有墨爾根綽爾濟者精岐黃有正白旗先鋒鄂碩與蒙古戰中流矢殆甚濟爲拔鏃傳以藥遂愈又都統吳拜交戰時身被三十餘矢已昏絕濟令剖白橐駝腹置拜其中遂甦又黃冠苗君稷之徒臂屈不伸濟先以熱鑊熏蒸次用斧椎其骨手捏有聲使骨穴對好卽愈

餘文節公常撫軍宦遊筆

記

薛衣道人祝巢夫名堯民洛陽諸生也少以文名明亡遂棄置舉藝爲醫自號薛衣道人得仙傳瘍醫凡諸惡瘍傳其藥少許卽愈人或有斷脰折臂者清治之無不完好若剗腹洗腸破腦濯髓則如華陀之神里有被賊斷頭者頭已殊其子知其神謂家人曰祝巢夫仙人也速爲我請來家人曰郎君何妄也頸不連項矣彼卽有返魂丹烏能合既離之形骸哉其子因強之旣至祝撫其胸曰頭雖斷身尙有煖氣煖氣者生氣也有生氣尙可以治急以銀針紉其頭於頸旣合塗以末藥一刀圭熨以炭火少須煎人參湯

雜以他藥啟其齒灌之須臾則鼻微有息矣復以熱酒灌之逾一晝夜則出聲矣呼其子而語之矣乃進以糜粥又一晝夜則可舉手足矣七日而創合半月而如故舉家作謝願產之半醉之堯民不受後入終南山修道不知所終無子其術不傳

虞初新志
原定九

薛立齋治大尹劉國信金瘡出血發熱煩躁屬陰虛爲患用聖愈湯治之虛火熄而血歸經矣

梁閣老姪金瘡腫痛出血不止寒熱口乾此氣虛血無所附而血不歸經也用補中益氣五味麥冬主之陽氣復而愈舉人余時正金瘡焮痛出血不止惡寒發熱用敗毒等藥愈

甚此亡血過多氣無所附而然耳遂以四物加知柏軟柴
胡參五味麥冬治之卽愈

淮西總管趙領衛名寓殿巖密之子云取箭簇法仇防禦方
張循王屢求不得因奏知德壽宣取以賜之有奇效以天
水牛一角獨角者尤繁以小瓶盛之用硝砂一錢細研水
少許化開浸天水牛自然成水右以藥水滴箭簇處當自
出也是齋方

凡刀刃傷用石灰不以多少端午日午時取百草搗汁濾過
和作餅子入韭菜汁尤妙陰乾遇有傷卽以未繆之如腸
胃出桑白皮縫繫之白繫吳內翰父少保守南雄州有刀

傷人腸潰者以此藥治之全二人之命一方只用韭汁和

石灰端午日合又治刀刃傷用五倍子爲末乾貼神效亦

名小血竭

同上

回回田地有年七八木歲老人自願捨身濟衆者絕不飲食惟澡身啖蜜經月便溺皆蜜旣死國人殮以石棺仍滿用蜜浸鑄誌歲月於棺蓋瘞之俟百年後啟封則蜜剝下凡人損折肢體食少許立愈雖彼中亦不多得俗曰蜜人番

言木乃伊

輟耕錄

杭州赤山之陰日宵箕泉黃大癡所嘗結廬處其徒弟沈生狎近側一女道姑同門有欲白之於師沈懼引厨刀自割

勢幾死衆救得活而瘡口流血經月餘不合偶問諸閹奴
教以燬所割勢搗粉酒服如其言不數日而差

同上

聞萬夫長陳君臨陣爲刀斫其面瘡已愈而瘍與鼻不能合
甚惡時時仰泣曰吾面無完膚生何以見妻子死何以見
父母乎乃拜頃彥章求治頃命壯士按其面膚肉盡熟腐
施之以法卽面亦如頰盤左右賀曰復故也

九靈山房集

湯火傷

薛立齋治一男子孟冬火傷脣作痛喘咳發熱此火毒刑肺
金之症用人參平肺散治之喘咳乃止因勞又惡寒發熱

此氣血虛也。以八珍湯加枳梗白芷治之而退。再加薄桂三分。以助藥勢。溫氣血。壞肉潰之而愈。若初起焮赤作痛。用神效當歸膏敷之。輕者自愈。重者自腐生肌神效。

或用側柏葉末。蠟油調敷亦效。若發熱作渴。小便赤色。其脈洪數而實者。用四物。茯苓。木通。生甘草。炒黃連。脈雖洪數而虛者。用八珍。若患處不潰。而色黯者。四君。芎歸。黃芪。之類。若死肉已潰而不生肌者。用四君。黃耆。當歸。炮薑。若愈後而惡寒。陽氣未復也。急用十全大補湯。切勿用寒涼。反傷脾胃。

一男子因醉被湯傷腮。潰爛發熱。作渴飲水。脈洪數而有力。

此火毒爲患。用生地。當歸。芩連。木通。葛根。甘草。十餘劑。諸症漸退。却用參芪。朮草。芎歸。芍藥。白芷。木瓜。新肉。將完。因勞忽寒熱。此氣血虛而然也。仍用參芪之藥。加五味。棗仁。而安。又月餘而瘡歟。

一男子火傷兩臂。焮痛。大小便不利。此火毒傳於下焦。用生地。當歸。白芍。黃連。木通。山梔。赤芩。甘草。一帖二便清利。其痛亦止。乃以四物參耆。白芷。甘草。而壞肉去。又數劑而新肉生。

一婦人湯傷胸大潰。兩月不斂。脹大而無力。口乾發熱。日晡益甚。此陰血虛火毒乘之而爲患耳。用四物湯。加柴胡。丹

皮熱退身涼更用逍遙散加陳皮以養陰血壯脾胃腐肉去而新肉生

凡湯盪火燒痛不可忍或潰爛或惡瘡用松樹皮剥下陰乾爲細末入輕粉少許生油調稀傅如傅不住紗絹帛縛定卽生痂神妙不可言然宜預先合下以備急自剥落而薄者尤妙李莫安撫方用牛皮膠入少湯于火上溶稠狗毛剪碎以膠和毛攤軟帛封之直至痂脫不痛吳內翰家婢夜炊米釜翻傷腿膝以夜不敢日比曉已潰爛用此治之而愈百乙

而愈方

立齋治馮氏子患火瘡驟用涼藥敷貼更加腹脹不食以人

參敗毒散加木通。山厄治之外以柏葉炒爲末。麻油調搽。
漸愈。嘗用煮犬汁上浮脂調銀硃塗之更效。若用涼藥逼
火毒入內多致不救。

王洪緒治一婦小腿經燙。醫用水片研雪水敷之。不一刻腿
腫如斗。痛極難忍。曰幸在小腿。若腰腹間逼毒入內。難挽
回矣。以地榆研細。調油拂上。半刻痛止。再拂數次全愈。

一使女炭火燙足背爛一孔。以伏龍肝散乳調敷。不三日而
愈。

一孩被滾湯澆腹。因痛拆破皮。麻油拂上一次。痛止。以地榆
未乾。繆破處。次日肌生。未破者全愈。

錢國賓曰余欲之遂昌宿旅次聞隔房人呼痛夜不安枕次
日問店主對曰小价提滾水一桶上樓與客洗面其子拿
盆後上舊桶底脫滾水灌子之頭今腫如斗面目皆平七
日不食矣余卽往視滿室皆臭用夏枯草一斤爲末以香
油調腫處厚厚敷上卽時止痛止臭三日消腫八日痂落
切忌食醬料面有黑斑店主如言藥治而愈後余回其子
叩謝

竹木刺傷

曾氏榮曰元貞乙未春有王千戶來自廣西安船河下一子

僅二周患頭痛服藥針灸不效召曾診視色脈俱好惟額上微紅以手法驗之大哭淚下其母怒而見給曾亦置之勿論但究心以病爲事再問當時得病之因于戶云初在靜江時大風吹篷撲著便不快曾曰此疾若令細揣頭上便知其症彼諾之遂遣家人出外探親其父自抱曾揣之果有小箇簽刺在顙上皮下卽蓬簽也以酥油潤透用鑷摘出痛定卽安若以匹婦饒舌而退則及幼之心不溥矣後之醫流倘見嬰兒色脈好而病者用藥不應必有他故宜細心推原切勿拘泥可也

幼幼
心書

富次律云治竹木刺出聖惠方曾用救一庄僕極妙其人有

一脚心刺痛楚瀕死黃昏傳藥痛尤甚至四更視之刺已
出遂安 用烏羊糞爛搗水和罨傷處厚傅之爲佳

百乙方

蟲獸傷

張薦員外住劍南張延賞判官忽被蜘蛛咬頭上一宿咬處
有二度赤色細如筋繞項上從胸前下至心經兩宿頭腫
瘻大如升椀肚漸腫幾至不救張公出錢五百千并薦家
財又數百千募能療者忽一人應召云可治張公甚不信
之欲驗其方其人云不諳方但療人性命耳遂取大藍汁
一椀以蜘蛛投之至汁而死又取藍汁加麝香紅黃更以

蜘蛛投入隨化爲水張公因甚異之遂令點於咬處兩日悉

平非小瘡而愈

本草綱目

字林云蠚聽形如蜥蜴出魏興居樹上見人則跳來囁之囁已還樹垂頭聽哭聲乃去卽千歲蝮也其狀頭尾一般大如搗衣杵俗名合木蛇長一二尺談野翁方名研木蛇又名望板歸救之用嫩黃荆葉搗爛敷之

本草綱目

處士劉易隱居王屋山嘗於齋中見一蜂盲於蛛網蜘蛛爲蜂所螫墜地俄頃蜘蛛鼓腹欲裂除行人草囁芋根微破以瘡就囁處磨之良久腹漸消輕躁如故自後人有被

蜂螫者芋根傅之則愈

筆談

蚯蚓糞能治蜂螯余少時摘黃柑爲蜂所毒急以井泉調蚯
蚓糞塗之立止聞之昔人納涼檐際見有蜂爲蜘蛛所罥
蛛出取蜂受螫而墮少甦爬沙牆角以後足抵蚯蚓糞掩
其傷須臾健行卒啖其蜂於網信乎物亦有知也沈存中
筆談亦記一事與此相類但謂以芋梗耳姑識之

客中閒集

麻知幾村行爲犬所噉昇至家頸腫如罐堅石鐵石毒氣入
裏嘔不下食頭痛而重往問戴人女僮曰痛墮利減以柅
榔丸下之見兩行不瘥適戴人自舞陽回問麻曰脰腫如
此足之二陰三陽可行乎麻曰俱不可行戴人曰當大下
之乃命臨夜臥服舟車丸百五十粒通經散三四錢比至

夜半去十四行腫立消作胡桃紋反細於不傷之腫屬其
慎勿貼膏紙當令毒氣出流腫血水又一日恐毒氣未盡
又服舟車丸百餘粒濟川散三四錢見六行病人曰十四
行易當六行反難何也曰病盛則勝藥病衰則不勝其藥
也六日其膿水盡又囑其膿水行時不畏風盡後畏風也
乃以愈風餅子日三服之又二日方與生肌散一傅之而
成痴嗚呼用藥有多寡便差別相懸向使不見戴人則利
減之言非也以此知醫之難用醫尤難戴人則
張子和

凡風狗毒蛇咬傷者只以人糞塗傷處新糞尤佳諸藥不及

此褚記室出

江懷禪師爲驢咬下鼻。一僧用髮入罐子。塗泥固濟。煅過爲
末。急以鼻蘸灰綴定。以軟絹縛定。效用此擦落耳鼻亦效。

醫學
綱目

薛立齋治一男子被犬傷痛甚。惡心。令急吮去毒血。隔蒜灸
患處數壯。痛卽止。更貼太乙膏。服玉真散而愈。

一男子風犬所傷。牙關緊閉。不省人事。急針患處。出毒血。更
隔蒜灸。良久而醒。用太乙膏封貼。用玉真散二服。卽愈。更
以解數散二服而痊。若患重者。先須以蘇合香丸灌之後。
進湯藥。

針灸經云。外邱穴治猘犬卽風犬所傷。發寒熱。速灸三壯。更

灸患處立愈春末夏初狂犬咬人過百日得安終身禁犬肉蠶蛹食此則發不可救也宜先去惡血灸咬處十壯明日以後灸一壯百日乃止忌酒七日搗韭汁飲二二盞又方治狂犬傷令人吮去惡血灸百壯神效

治蛇入七竅急以艾灸蛇尾又法以刀破蛇尾少許入花椒七粒蛇自出卽用雄黃硃砂末煎人參湯調灌之內毒卽解山居人被蛇傷急用湯洗咬處拭乾以艾灸之立效又方用獨頭大蒜切片置患處以艾於蒜上灸之每三壯換蒜多灸爲妙

立齋治陳鑑居庸關人蝎螫手瘀痛徹心領刻焮痛至腋寒

熱拘急頭痛惡心此邪正二氣相搏而然以飛龍奪命丹塗患處及服止痛之藥俱不應乃以隔蒜灸法灸之遂愈薛母及薛皆嘗被蟻如前炙之痛卽止薛母又嘗爲蜈蚣傷脂亦用前法而愈凡蜈蚣毒之類所傷依此療之並效本草謂蒜療瘡毒有回生之功

一獵戶腿被狼咬痛甚治以乳香定痛散不應思至陰之下血氣凝結藥力難達今隔蒜灸至五十餘壯瘀痛悉去仍以託裏藥及膏藥貼之而愈

王生被狂犬傷腿頃間劇痛至股翌日牙關緊急以玉真散治之不應亦隔蒜灸三十餘壯而蘇仍以玉真散及託裏

消毒藥而愈

立齋父嘗睡間有蟲入耳痛督將薑擦猫鼻尿自出取尿滴耳內蟲卽出而愈又百戶張錦自謂耳內生瘡不時作痛痛而欲死痛止如故診其脈皆安靜謂非瘡也話間忽痛作度其有蟲入耳令回急取猫尿滴耳果出一臭蟲遂不復痛或用麻油滴之則蟲死難出或用炒芝麻枕之則蟲亦出但不及猫尿之速也此案耳門亦收之非重出也恐患此者不知是蟲便縕聞耳

華陀傳彭城夫人夜之廁躉齧其手呻吟無賴佗令溫湯近熱漬手其中卒可得寐但旁人數爲易湯湯冷令煖之其

旦即愈三國志

一僧爲蛇傷。一脚潰爛。百藥不愈。一遊僧以薪水數斗洗淨。
腐敗見白筋。挹乾以白芷末入胆礬。麝香少許。繆之。惡水
涌出。日日如此。一月平復。奇疾方

蘇韜光寓婺女城外魁星館。有人書一方於壁間。曰此方治
諸蟲咬。神效。韜光屢以救人。皆驗。其方用貝母爲末。酒調。
令病者量飲之。飲不得卽止。頃之酒自傷處爲水流出。水
盡爲度。卻以貝母塞瘡口。卽愈。雖傷已死。但有微氣。可以
下藥者。卽活。神效不可言。集成

崇甯末年。隴西兵士暑月中在倅廳下跣立。廳下爲蚯蚓所
中。遂不救。後數日。又有人被其毒。博識者教以先飲鹽湯。

一盃次以鹽湯浸足乃愈

譚氏方治蜘蛛咬遍身瘡子以葱一枚去尖頭作孔將蚯蚓入葱葉中緊捏兩頭勿泄氣搖動卽化爲水水點咬處瘡

本草

孫真人以武德中六月得蠻蛷尿疾經五六日覺心悶不住以他法治不愈又有人敎畫地作蠻蛷形以刀仔細細盡取蠻蛷腹中土就以唾和成泥塗之再塗卽愈方知天下萬物相感莫曉其由矣千金方

立齋治一男子大傷青腫作痛以蘿蔔汁調梔子末敷之以四物湯加柴胡黃芩花粉穿山甲二劑少愈更以託裏散

加生地柴胡紅花數劑而潰再以託裏健脾藥而愈

馬銘鞠傳治蜈蚣傷方
蜒蟠塗上其痛立止屢試神效又一
法用舊竹筋火中將頭上燒黑取下少許研細敷患處立

愈廣筆記

破傷風

雄按史指臣云冒風者曰破傷風染濕者曰破傷濕今但列傷風而不及傷濕猶有缺漏也

官使明光祖向任統制官被重傷患破傷風牙關緊急口噤不開口面喎邪肢體弛緩用土虺蛇一條去頭尾腸皮骨醋炙地龍五条去泥醋炙天南星八錢重一枚炮右爲末醋炙麵糊爲丸菜豆大每服三丸五七九生薑酒下仍食

稀蕊白粥取汗卽瘥

曹濟方本草綱目

萬密齋治一婦人年四十餘形黑而瘠性躁急先患左腿發內癰潰後起坐萬曰瘡口未合當禁風其婦自恃強健不聽忽一日眩仆目貶口渴身反張手足攀曲亟求治曰此破傷風症病也用桂枝湯加熟附子黃芪防風一劑而病減再服十全大補湯三劑而安

胡念菴曰一人因拔鬚一莖忽然腫起不食有友人詢余余曰此破傷風也速炙爲妙醫乃認作鬚疔治以寒涼不數日發瘻而死

醫林指月

有男子年六十一腳腫生瘻忽食豬肉不安醫以藥利之稍

愈時出外中風汗出頭面暴腫起紫黑色多睡耳輪上有

浮泡小瘡黃汁出乃與小續命湯加薑活一倍服之遂愈

醫說

續篇

薛立齋云一男子背瘡未歛以膏藥翦孔貼之患破傷風症而歿此先失於內補外邪集其虛耳余見此症貼膏藥翦孔欲其通氣而反思破傷風擦歛藥生肌欲其收口而助其餘毒以致歿者多矣可不慎哉

一男子風襲瘡口牙關緊急腰背反張以玉真散一服而愈仍以託裏藥而歛

薛立齋治一婦人臂癰將愈患破傷風發熱搐搦脈浮數以

當歸地黃湯治之不信乃服發散敗毒藥果甚始信服數劑而痊是症須分表裏別虛實不可概治原病式云破傷風因瘡熱甚鬱結榮衛不得宣通怫熱遍身故多白痴是時瘡口閉塞氣難通泄熱甚則生風也不已則表傳於裏但有風熱微甚兼化故殊異矣大法風熱燥甚怫屈在表而裏氣尙平者善伸數欠筋脈拘急時或惡寒或筋惕而搐脈浮數而弦者宜以辛熱治風之藥開衝結滯是與怫屈而以麻黃湯辛熱發者同也凡用辛熱宜以寒藥佐之免至藥中病而風熱轉甚也如治傷寒發熱用麻黃桂枝加黃芩石羔知母之類是也或以甘草滑石葱豉寒藥發

散之妙若表不已漸入裏裏又未甚而脈在肌內者宜以退風熱開結滯之寒藥調之或微加治風辛熱亦得猶風寒半表半裏以小柴胡和解之意也若裏熱已甚舌強口噤項背反張驚惕搐搦涎唾稠粘胸腹滿塞或便溺閉結或時汗出脈洪數而弦此由風熱屈甚於裏而表熱稍罷則腠理疎泄而心火熱甚故汗出也法宜除風散結寒藥下之後以退風熱開屈滯之寒藥調之熱除結散則風自愈矣凡治此宜按摩導引及以藥幹開牙關勿令口噤使粥藥不得下也

治破傷風及金刃傷打撲傷損方名玉真散本事必用兩方

皆有但人不知張叔潛知府云此方極奇居官不可闕是
齋宰清流日以授直廳醫救欲死者數人奇甚用天南星
防風一味等分爲末破傷風以藥敷貼瘡口然後以溫酒
調下一錢如牙關緊急角弓反張用藥一錢童子小便調
下或因鬪毆相打內有傷損以藥二錢溫酒下打傷至死
但心頭微溫以童小便灌下二錢併進三服天南星爲防
風所製服之不麻是齋方

按衛生寶鑑以此方兼治狂犬所傷并諸犬咬神效

附柳洲遺稿序

魏君柳洲詩名嶺雲集者友人鮑君以文刻以行世集甫
出人爭傳誦遂一遊嶺表越歲歸優游里中者十餘年而
柳洲辭世鮑君與胡君滄來頃君金門復刻其手所自訂
後集以弁首之語屬余讀卒業愀然嘆曰柳洲生平成就
所造甚爲難耳柳洲少孤貧無遺資乃於街市閒勤十指
操作自給旣而佐生於質庫中幾二十年晝勞所職至夜
篝燈讀書爲同事所憎乃展卷默誦復以燈光逼射爲詬
於是卷跼坐帳中翳其光而閱膏盡爲度向無師授自以
堅思力探苦索積學旣久由漸而致豁然貫通家本業醫

兼攻其先人所遺岐黃書亦臻奧窓辭歸懸壺取資以俯
蓄妻子暇則取市扇需畫者應其請得資以助不足當其
畫時手一扇于前置一卷於左勞憊甚乃能自拔於庸
雜儕偶中成大雅材之詩人同事筆硯吟哦輩排矣直出
其上據壇執耳莫敢枝梧及壯歲將過向之積勞漸發疾
漸不可治年逾五旬而終嗚呼柳洲學既成人皆羨之慕
之舉爲一時作手豈知其從艱瘁中來如此其甚哉今其
詩具在吾不敢謂於今之負重名者優劣若何於古作者
詩品位置若何然展帙案取吾儕倫類中推云軼倫超羣
亦平心之論也嗚呼讀書不勝功名仰屋而思聯猿行而

覓索句於杳渺無何有之處自矜得意雖工亦何可藉賴
世不笑其狂必笑其拙耳而柳洲終身抱此癖貧困不振
終不自悔人各有嗜難爲不相謀者道也乾隆丁酉仲冬

臨江鄉人吳頴芳序

月

日

附先友記一則

魏柳洲先生名之琇字玉橫錢塘人幼孤貧力學先府君十餘歲卽與定交以齒長於府君接之在師友之間歿爲刊其暮年詩卽世所傳柳州遺稿也先是鮑大綠飲嘗爲刊嶺南詩鈔才氣縱橫落花詩一時膾炙人口晚乃悔其少作力持風格造詣益上矣墓在赤山埠青龍山題曰錢塘詩人魏柳洲之墓買山營塋皆先府君任之值春秋改序率同人具斗酒隻雞拜奠墓下今古歡堂集中詩人歿後新吟少世味嘗來古道稀宿草更彈知已淚清尊難起故人顏句皆展先生墓作也先生精于醫著續名醫類案

五雄按當卷邀錄四庫館書吾母嘗言敬時多病先生來
必乞爲診視先生歿于乾隆壬辰時敬甫離襁褓身受其
惠而先生之音容了不復記可慨也夫仁和胡敬

續名醫類案書後

提要謂此書網羅衆富變證咸備惜編次潦草不免蕪雜
雄按十一卷瘧門陸祖愚治陳雅初案後云己丑長至後
一日錄是案嗣攷胡書農學士先友記言先生沒于乾隆
壬辰然則以六十卷之書僅三年而藏事縱極敏捷殆不
過草創初就耳倘天假以年重爲刪定斷無以上諸病矣
雄不才於先生無以爲役然孤貧艱瘁少境頗同讀其書
而不覺感慨流涕焉爰忘斧陋略附按語圈其佳案用質
宗工鑒定且臚目次以便繙繹併采柳州遺稿序暨胡
氏先友記於篇末俾讀是書者得見先生大概云

舊後

卷三十六

三

咸豐元年冬十一月杭州王士雄

續名醫類卷三十六終

1647